


21



Q
11
14

מחזורי חן וחסד

DEVITIS

REBUSQUE GESTIS

PROPHETARVM DEI, AC

Sanctarum Mulierum ve-
teris Testamenti, libri
duo planè aurei,

A'

Ioachimo Perionio Benedictino Cormœria-
ceno, Græcarum literarum Regio Inter-
prete, paulò ante eius obitum conscripti,
nuncque primùm typis excusi.




LVTETIÆ,

In officina Federici Morelli, vico Bel-
louaco, ad vrbanam Morum.

M. D. LXV.

CVM PRIVILEGIO REGIS. ^{1 *}

Capuccinorum  Romæ.

DE VITIS

DE VITIS

DE VITIS

DE VITIS

DE VITIS

DE VITIS

DE VITIS

DE VITIS

DE VITIS

DE VITIS

DE VITIS

DE VITIS

DE VITIS

DE VITIS

DE VITIS

DE VITIS

DE VITIS

DE VITIS

DE VITIS

DE VITIS

DE VITIS

DE VITIS

DE VITIS

DE VITIS

DE VITIS

DE VITIS

DE VITIS

DE VITIS

DE VITIS



PETRO DANESIO
VAVRENSI EPISCOPO

G. Genebrardus Bened.



vo sunt, Præsul amplif-
sime, quæ me in perpe-
tuam Ioachimi Perio-
nij, viri optimi & do-
ctissimi, admirationem
rapuerūt, quorū etiam
nota iucundam eius recordationem ab
omnibus bonis coli & obseruari video,
Eloquentia, & rerum cognitio multi-
plex. Alterum cum altero ita ab adole-
scentia coniunxit, vt ad omne politio-
rum disciplinarum genus ab infantia, ne
dicam barbarie, in qua squallidæ ante id
tempus per multos annos iacuerant,
vindican- dum, diuina (vt aiunt) virgula
suppeditatus esse videatur. Ex quo enim
Arabes, homines potiùs sti- uæ quàm li-
teris nati, quorum animis vera Dei reli-

gio aut nunquam, aut non per diu, instillari potuit, Mineruæ sacra mysteria contrectare ausi sunt, dici non potest, quantum barbariem, ut ingenio sunt fero, inculto & agresti, in totum orbem terrarum induxerint. Qui enim toto illius ætatis ambitu scripserunt Hebræi, Græci, Latini, non modò sibi malè, verùm etiam nouè & peregrinè dicendi licentiam assumpsere. Ac, ut præteream Medicinam & Mathematicas, quæ totis illis seculis pro Hippocrate & Galeno, Auicennam & Rasin: pro Euclide & Ptolomæo, Algazelem & Albagtenium coluere: quam tum putas fuisse veræ philosophiæ formam? quam speciem? quod decus? Plato, Aristoteles, Cicero, Seneca, & reliqui nitidi scriptores, in puluere neglecti, nec intellecti volutabantur, ut non mirum sit, tot præstantium ingeniorum monumenta, quæ non ita pridem à Clemente, Eusebio, Arnobio, Lactantio, citabantur, penitus breui tempore intercidisse, aut magna ex parte mutila atque mendosa ad nos peruenisse. Legebatur in scholis Auerroïs, & Commentatoris nomen obtinebat: Halis, sophistæ quæ si-

miles, qui etiã nostros eiusmodi captio-
nibus, quantumuis ab eis diuisos toto or-
be, ita ceperant, vt illos ignorare, esset ne-
scire omnem philosophiam. Hoc philo-
sophãdi genus, vbi semel inter homines
irrepisset, ad Theologiam sensim trans-
latum, Ecclesiam sponsam Christi in tot-
tãque repugnantes sectas ita dissecuit,
vt iam veteris & noui Testamenti pro-
positiones in mille formas à quibusdam
rerum nouatoribus mutatae sint. Haben-
dæ igitur gratiæ viris doctis & probis, qui
quod donum à Deo acceperant, in vtili-
tatem Ecclesiæ, remque publicam, totum
contulerunt, vt eiecta Hagare ancilla, in
suam hæreditatem Saram, quæ nobis ve-
ram & sinceram doctrinam significat, re-
stituerent. Inter hos sedulam, &, quod
citra aliorum reprehensionem dixerim,
præcipuam operã posuisse nostrum Pe-
rionium, idque iam omnes Academias,
quas nulla inuidiæ labes infecerit, com-
muni suffragio comprobasse, existimo.
Mirè sauciatam philosophiam, vt antea
dictum est, ex bonis græcis bene Roma-
nam fecit: nec primas tantùm lineas du-
xit, sed viuos etiam colores sic apposuit,

vt ceteros ad ornatius scribendum de iisdem rebus non modò non excitarit, sed etiam planè perterruerit. Quod idem cùm in sacris literis moliretur, primùm Topica theologica conscripsit, vt quæ in scholis minus eleganter tractabàtur, melius ad Dei scripturam possent exigi. Deinde veterum Theologorum Dionysij, Iustini, Origenis, Basilij, Damasceni, & similibus, qui Græcè scripserant, varia Opera Latino sermone disertissimè expressit. Denique ipsum Dei verbū Theologiæ fontem, & quasi principium, variis libris eadem dicendi fœlicitate complexus est. Monotessaron, id est vnum ex quatuor iis, qui Euangelia scripserūt, de vita rebusque Domini nostri IESV CHRISTI, generis hominum conseruatoris, edidit. Ab eodẽ extat liber de Mariæ virginis Christi matris, & Ioannis eiusdem Baptistæ & præcursoris, vita. Item historiæ de vitis gestisque Apostolorum, Patriarcharum, & quas nunc in lucem prodire volumus, Prophetarum Dei atque sanctarum Mulierum veteris Testamenti. Nec dubito quin reliquum æui, si cum nobis diutiùs fatum siue Pro-

uidentia Domini commodasset, rebus
describendis Ecclesiæ noui Testamenti
fuiſſet ſimiliter deuoturus. Iam enim
veluti viam vniuerſæ terræ ſibi impen-
dentem præſentiens, totus deinceps in
his eſſe volebat, quæ ad ſolidam animi
pacem tranquillitatẽque pertinerent,
& ſe mortalem ad piam mortem inſtrue-
rent. Quod vel ex his opusculis intelli-
ges, in quorum altero non tam diuino-
rum vatum facta, quàm doctrinam, ita
dilucidè explicat, vt qui Prophetas ver-
ſaturus eſt, nullum ad intelligendum aut
maius aut expeditius cõpendium, quàm
huius prælectionem, habeat. Quare pri-
uatim factò periculo, Reipub. intereſſe
putaui, ſi eiꝰſmodi diutiꝰs tincis & blat-
tis relinquerentur: iisqꝰ decurſis, mihi
laudandam eſſe piam Iacobi Chriſtiani
præſtantiffimi Theologi Pariſienſis, &
auctori, dum ille viueret, coniunctiffi-
mi, voluntatem, quòd Exempla apud ſe
depoſita cum publico communicata cu-
peret: & inuitandum Federicum Morel-
lum, vt quam diligentiam præbuiſſet in
aliis doctis ſcriptoribus vindicandis, eam
noſtro Perionio impenderet. Tuo ve-

rò nomine diuulgatum volui, vt homi-
nem elegantissimum & sapientissimum,
Præsul eloquentissime & doctissime, tua
authoritate ab improborum criminatio-
nibus defendas, ac Prophetarum,
in quos quatuor Hebræorum

Commentarios Latinè

parturimus, vitam

résque præci-

pias. Vale.

* *

¶

DE PROPHETICA

Facultate nonnulla ex Hebræis
& Christianis scriptoribus.

ANTEQUAM vitæ resque acta Prophetarum explicentur, ne Perionius noster, qui in illorum numero, Israëllem, Mosem, Dauidem, & similes qui futura prædixere, non posuit, temerè carpatur, de Prophetiæ facultate pauca differere nobis commodum visum est. Non enim idem est, certam futurorum præsentationem habere, & Prophetam esse, cum modus in animi qualitatibus speciem mutet. Alioqui Diui, qui iam claro æterni illius speculi conspectu perfruuntur, Prophetarum nomine censendi essent: cum præsertim multos venturarum rerum euentus limpidissimè contemplantur, ac si permitterentur, certò respondere possent. Videamus igitur quam ob rem Iacob, Dauid, Iob (non enim is rectè Prophetis annumeratus est) propriè Prophetæ non sint: contra Esaias, Ieremias, Ezechiel, maximè propriè hanc appellationem sortiantur. Nimirum diuinarum reuelationum tria sunt distincta genera. Prophetia illa est species, quæ aut in somnis fit, aut in vigiliis quidem, sed cum humanos sensus vates amittit, & diuinos consequitur, ut Cicero

loquitur 2. de Diuinat. sentitque quasdam imagines, per quas rerum arcanarum & diuinarum conscius efficitur. Tale quid significabat Aristoteles, cum ex omnibus diuinandi generibus, solas diuinationes, quæ per furorem & per insomnium existerent, reciperet. Quod etiam confirmat liber Numerorum: Cum propheta, inquit, vester fuerit Domini, in visione ei me patefaciam, in insomnio eum alloquar. Proinde similitudinum & visorum frequens apud Prophetas mentio. Vidi Dominum sedentem in solio; Num. 12. Vidi, vidi, &c. Et apud Ioannem, Fui in spiritu Dominica die, & audiui post me vocem magnam, &c. Reuelatio verò quæ contingit integris sensibus, nec sopitis somno vel extasi, quoniam sine visis fit, Prophetia non est, sed potius numen, afflatus, illapsus, inspiratio Dei. Hinc illam non Nebuá, sed Rúah haccódes Hebraei nominant. Talis erat Dauidis, Iobi, & aliorum, quos Agiographos appellamus, & quorum mentibus, cogitationibus, & linguis, spiritus Domini sine ullis spectaculis & imaginibus insidebat. Vt de se Dauid, dum extrema loqueretur, inquit: Spiritus Domini locutus est in me, & sermocinatio eius in lingua mea: Vt 1. Reg. 23. illum propterea sacræ literæ virum Dei appellant. 2. Para. 25. Huius sententiæ astipulatores habeo, He-

braeorum quidem Rabbi Mosè, Ben Maimon libro *Nebuchim*, R. Abraham initio commentariorum in *Ionam*, R. Tybbon in sua *Phyfica*, R. David præfatione in *Psalms*, R. Leui, libro de præliis domini: Nostrorum verò, Augustinum, Cassiodorum, & Nicolaum. Est & aliud genus, quod ἐπιφάνεια .i. apparitionem, Græci dicunt, cum verè oculus corporeus re quadam extrinsecus subiecta mouetur atque afficitur. Sic enim tres homines se Abrahamo obiecerunt: sic Moses rubum ardentem conspexit: sic Apostoli Mosem & Eliam transformatos contuiti sunt.

Istius generis esse visiones Danielis recentes Hebræi contendunt. Neque enim cum accensent Prophetarum catalogo, (in quo à Nostris, atque adeò veritate, dissentiunt) etsi futura præsensisse fateantur. Fortasse quoniam, ut est in eius libro, sedebat in porta, hoc est, iuridicundo præerat, nec docebat populum. Quia autem spiritu Dei afflante, illum scripsisse non dubitant, eius librum inter Agiographos referunt, quasi vtriusque reuelationis, & huius, quam illapsum diximus appellari, & ἐπιφανείας fuerit particeps. Quanquam dissimulandum non est, Prophetiæ vocem latius sæpè in Scriptura accipi pro diuina voluntati interpre-

- tatione , translatione ex eo ducta , quòd quem-
admodum Propheta , reuelatione Dei homines
futurorum monens , de illius erga ipsos proposito
concionatur: ita sacrorum interpretes, & ut vo-
cat Magnus Dionysius, ἱεροφάνταις, Dei Ver-
bum , consilia atque mysteria populo enuntiat,
quod non rectè fit sine Domini reuelatione &
spiritu . Exemplum habeo in promptu apud Mo-
sem: Aharon (inquit) frater, erit propheta tuus,
nempe voluntatis consiliorumque tuorum inter-
pres disertissimus: ac , sicuti antè dixerat, oris
vice tibi erit. Quam loquendi formulam imi-
tatus videtur Paulus, dum ait: Qui prophetat,
hominibus loquitur ad ædificationem , ad ex-
hortationem , ad consolationem . Nam in ἀνα-
κρίσει, in prophetiæ locum interpretatio-
nem sufficit. Cum unusquisque (inquit) ve-
strum, psalmum habet, doctrinam habet, Apo-
calypsim habet, linguam habet , interpretatio-
nem habet, omnia ad ædificationem fiant. Præ-
terea Prophetiæ nomen ad cultum & laudatio-
nem Dei extenditur, ut cum Apostolus scribit,
mulierem laudantem, aut prophetantem, id est,
Deum laudantem non velato capite, deturpare
caput suum . Huic enim affine est quod legitur
apud Samuelem , Misit Saul nuncios ut com-
prehenderent Dauidem: repperunt autem cœ-

rum prophetarum prophetatium, presidente Samuele. Ad quem locum R. Kimhi, Prophetantes dicit laudantes, secundum Chaldaeam paraphrasim: Videlicet, hymnos & laudationes Deo dicebant, in spiritu sancto.

Verum, ut ad institutam de visionibus prophetis disputationem redeam, haud dissimile est, quod nostri Theologi post Augustinum Cap. 28. contra Adamantium, de triplici visione disputant. Vnam esse dicunt sensus, cum corpora aut sentimus, aut sentire videmur, quo modo Baltazar scribentis hominis manum vidit, Moses ignem in rubo. Alteram imaginationis & phantasiae, cum rerum seu corporum imagines contuemur, ut evenire solet in mentis excessu seu extasi, vel in somno, ubi non corpora, sed rerum imagines conspiciuntur, ut B. Petrus vigilans, linteum quadrupedum, serpentum, atque volatilium plenum, Rex vero Aegyptiorum dormiens, vaccas & spicas graciles spectavit. Postremam intelligentiae, quando neque corpora, neque simulachra corporum cernuntur, sed quadam mentis serenitate subleuatus animus ad Deum, & substantias separatas, media sapientiae luce ingreditur. Quo modo Paulus sensum omnem & imaginationem supergressus puro mentis adiectu ad divinarum & caelestium

contemplationem in tertium calum raptius ferebatur. Similiter & Moses, cum quo aduersa facie Deus cōgressus est, nempe absque medio, ut Abben Ezra interpretatur, non Angelo interposito, nō alia re. De his ita etiam philosophatur

In 19. cap.
Exodi.

R: Isaac, Diuersitas, ait, est visionum propheticarum. In vno facultas intelligens aestimātem vincit: in altero, existimatio intelligētiam. Vincente existimatione visiones, & species sunt tantum vmbrales, ut cum Zacharias videt candelabrum planē aureū, & hominem insidētem equo rufo, stantem inter myrtos, subsequētibus equis rubeis, grandineis & candidis. Quod de ceteris eius generis visionibus eodem modo sentiendum est. Intelligentia autē superiore, visiones solidæ sunt & veræ, ut cum Ezechiel cernit quadrigam, & tres mundos, Angelicum, Cælestem, & Elementarem. Caterum contemplationis Mosaïcæ alia ratio est. Is nullam vidit similitudinem siue vmbralem, siue solidā, dicente scriptura, Aduerso ore colloquar cum eo, & in aspectu, non in enigmatibus. Iam, opinor, intelligis, quorum, quamque diuinorum hominum vitas describere Auctor instituat. Lege & perfruere.

Num. 12.

PRIVILEGII SENTENTIA.

REGIA auctoritate cautum est, ne quis alius, præter Federicum Morellum, duos hosce libros de viis rebusque gestis Prophetarum Dei, ac sanctarum Mulierum veteris Testamenti, à toachimo Perionio Henrici Gallorum Regis Interprete conscriptos, ante sexennium, ab hac prima editione, excudat, néue vendat. Qui secus fecerit, libris & pœna in sanctione æstimata multabitur. Priuilegium Parisiis irrogatum ac consignatum, pridie Cal. Mart. Anno M. D. LIX. subscriptum de consilij sententia,

DE LVC.

PROPHETARVM DEI, QVORVM
vitæ lib. i. describuntur, Catalogus.

Iob.	Pagina 1.	Eliezer.	pag.81.
Samuël.	pag. 12.	Esaïas.	pag.81.
Nathan.	pag.22.	Ioël.	pag.86.
Gad.	pag.26.	Michæas Morasthites,	
Ahias.	pag.28.	pagina	86.
Ioam.	pag.30.	Oded.	pag.87.
Iehu.	pag.32.	Nahum.	pag.88.
Azarias.	pag. 33.	Hieremias.	pag.89.
Hanani.	pag.34.	Baruch.	pag.104.
Michæas.	pag. 35.	Ezechiel.	pag.106.
Elias.	pag. 38.	Daniel.	pag.112.
Elissæus.	pag.49.	Abacuc.	pag.132.
Amos.	pag.65.	Sophonias.	pag.134.
Abdias.	pag.68.	Aggæus.	pag.134.
Osêe	pag.72.	Zacharias.	pag.136.
Ionas.	pag.74.	Esdra.	pag.139.
Iahaziel.	pag.79.	Malachias.	pag.147.

SANCTARVM MVLIERVVM, QVARVM
vitæ altero libro continentur, Index.

Eua.	pagina 148.	Abigaïl.	pag.201.
Sara.	pag.154.	Bethsabec.	pag.203.
Rebecca.	pag.161.	Sara Tobiaë filij vxor,	
Lia.	pag.168.	pagina	207.
Rachel.	pag.172.	Olda.	pag.214.
Maria.	pag.177.	Iudith.	pag.217.
Debora.	pag.183.	Ester.	pag.232.
Noëmi.	pag.188.	Sufanna.	pag.243.
Anna.	pag.193.	Mater 7. fratrum Ma-	
Michol.	pag.196.	chab.	pag.249.

DE VITIS REBUSQUE

GESTIS PROPHETARVM DEI,

Liber à Ioachimo Perïonio Be-
nedictino Cormœriace-
no scriptus.

IOB PROPHETÆ VITA.



IO B Propheta, qui etiam Iobad, vt septuaginta Interpretes extremo libro ipsius, aut de eo scripto, narrant, appellatus est, fuit caput quintæ familie ab Abrahamo, vt iidem eodem loco tradunt. Abrahamus enim Isaac, Isaac Esau, Esau ex Basemath vxore, Ismaelis filia, Zaram, Zara Iobad, qui etiam Iob vocatus est, procreauit. Is etsi inter scelestos facinorososque homines versabatur, habitabatque in regione, quæ Ausotis, siue Hus dicebatur, in sinibus Idumæ: tamen nihil ab eis vitij, nihilque mali quasi contagione contraxit, sed ab incunte etate vitium declinauit, & virtutem secutus est, eo animi proposito, vt nunquam ab officio discesserit, amissis etiam iis omnibus, quæ hominibus charissima sunt, facultatibus, ac li-

beris, corporeque toto sic vlceribus affecto, ut ne amici quidem, eum cernere sustinerent. Quæ quoniam præclarissima sunt, valentque ad maiorem eius laudem, quam si modestè se in rebus tantum secundis gessisset: ego, ut omnes in aduersa fortuna, & rebus aduersis propositum sibi in hoc homine clarum exemplum habeant, constitui sigillatim hæc omnia exponere. Et quoniam non est magna laus, nec virtus singularis, si quis paruas aut mediocres opes amittat, & casum illum forti animo ferat: hoc intelligendum est, Iob non obscurum hominem fuisse, aut exiguas mediocrisue habuisse facultates. Fuit enim Rex secundus regionis Edom, cum in Bela, siue Balach primi regis locum successisset. Prædiues autem fuit, ut illis temporibus, quibus hominum opes in gregibus armentisque posita erant. Itaque diuinis literis, quæ eum locupletem fuisse loquuntur, ei septem milia ouium, tria milia camelorum, quingenta iuga bouum, quingentæque asinas, & maximam familiam fuisse mandatum est. Ante quàm dico quoniam pacto hæc omnia ei crepta sint, quoque animo eorum amissionem tulerit: narrabo quomodo se gesserit rebus secundis. Cum Rex ac princeps, ut dixi, esset, tantisque facultatibus præditus, tamen nec principatu & auctoritate ad suorum aut alic-

norum iniurias ut superbus, nec bonis ad libidine abutebatur. Tanta enim æquitate ius dicebat, ut cum ad portam urbis procedebat, & in area ei sedes parabatur, omnes qui eum audiebant & videbāt, cum ei senes cōsurrexissent, principesq; atque optimates desissent loqui honoris causa, beatum eum esse ducerent, eiq; testimoniū dicerent liberationis pauperū clamātium et pupillorum, quibus patrocinium cōstitutum erat in nemine. Causam quā ignorabat, diligenter inuestigabat, ne si illa ignorata sententiā tulisset: et alteri faceret iniuriā, & sibi dedecus pareret. Quē verò erga pares aut superiores se præstaret, siue in causis & controuersis quæ illi cum eis erant, siue aliis in negotiis, hinc intelligi licet, quod nunquam declinauit iudicium cum seruo vel ancilla, si quando cum ipso disceptare voluissent. Tanta porro in omni vita benignitate, & commiseratione, quæ cum eo à prima ætate creuerat, fuit præditus, ut nunquam solus sine pupillo frustum panis ederet, nunquam pauperibus quod petebant denegauerit, nunquam viduam moratus sit, nunquam hominem sine veste perire viderit, aut deesse tunicam pauperi, nunquam denique peregrinū foris manere passus sit, sed viatori fores suas semper patere voluerit. Itaque & oculus cæci erat, & pes clau-

di, & pater pauperum. Quæ etsi magna sunt, tamen mirari desinemus, si contemptum diuitiarum qui in eo fuit, cōsideremus. Neque enim in auro posuit robur suum, aut fiduciam spemque collocauit: neque multis opibus, cum eas nactus esset, letatus est. Alias virtutes eius exponam. Non solum amicos diligebat, sed etiam hostes & inimicos, sic vt nunquam rebus aduersis eorum gauisus sit, nunquam in eos dixerit. Pudicitia autem ea erat, & castimonia, vt si mulier animum ipsius vnquam decepisset, aut ipse insidias parasset ad ostium amici sui, quod minus scortum alterius vxor sua esset, non recusaret. Ea verò integritate animi, innocentia vitæ, & equitate in omnes, vt si deflexisset de via, & rem alienam vidisset vnquam appetendi animo, aut rem aliquam cuiuspiam eripuisset, optaret quæ sereret esse aliorum, ac perire familiam suam. Atque hæc optabat, aut potius hanc conditionem proponebat iis qui coarguere vellent, non prima etate aut media, vel rebus secundis, sed iam senex, & rebus aduersis, in quibus inuidi, quod potentiam metuere iam non possint, multa comminisci solent. Neque hoc de superiore vita intelligebat, & reliqua mutauit propositum, sed in miseriis iacens, dum spiritum duceret, constanti animo nunquam se ab inno-

centia vitæ discessurum esse, nunquam de mendacio cogitaturum, nunquam ex ore suo verbum iniquum exiturum profiteretur. Atque ita se ille erga proximos gerebat. Deo autem quem se præstabat, dicendum est. Rebus prosperis tot ac tantis, quæ sæpe beatos & potentes à Dei metu, cultu, ac religione detorquere solent, nunquam solem, aut lunam, vel stellas, aut terram, ut solebant ij apud quos & inter quos vivebat, veneratus est, sed solum & verum Deum tanta religione, ut cum Arabissam uxorem duxisset, ex qua filios septem, filias tres suscepisset, filii-que inuitatis sororibus suo quisque die conuiuia darent alij alius, ipse veritus ne quid Deo peccassent, aut ei animo maledixissent, soleret, cum dies in orbem transissent, eos accersere, & ad rem diuinam præparare, primaque luce totidem hostias, quot erant, immolare. Sequitur, ut de miseris, in quas cum Deus non pro sceleribus suis, sed eius patientiæ probandæ, aliisque declarandæ, proponendæque adimitandum, causa, incidere tantas passus est, quantas nemo completi animo potuisset, dicendum esse videatur. Satanas quidem in eum inuidia flagrauit tâta, nocendique libidine adeò cæcus fuit, ut testimonium illum innocentie, virtuti atque religioni danti Deo, credere noluerit: sed illis eius tantis

virtutibus, quasi non veris, sed temporis tantum causa, id est, propter res secundas, cultis, extenuatis, id ita denique ipsum experturum esse dixerit, si facultates, quibus abundaret, ei eriperentur, atque ex beato miser fieret. Deus qui athletæ sui virtutem fortitudinemque cognitam & spectatam haberet, Satana fecit bonorum eripiendorum liberorumque interficiendorum potestatem. Ille data facultate, cum maximus natu liberorum ceteris prandium daret, Sabæos impulit, ut impetu facto boues arantes, & asinas omnes in agris raperent, bubulcosque omnes interficerent præter unum, qui calamitatem ei nuntiatum venit. Quem cum audiret, alter intervenit, qui oves tactas de cælo, & pueros consumptos igni diceret: quo etiam loquente, ingressus est qui camelos omnes à Chaldæis ablatos, puerosque interfectos præter unum se nuntiaret: isque finem dicendi nondum fecerat, cum quartus nuntium superioribus tristius nuntiavit, mortis liberorum omnium, qui cum in maximi natu ædibus cœnarent aut pranderent, ruina domus oppressi fuissent. Quid Iob inter tot & tantas, tamque crebras clades fecisse aut dixisse, aut quo eas animo tulisse existimamus? Forti eas animo tulit, discissa veste, tonsoque capite se proiciens humi, Deum veneratus est, hancque vocem

misit maximæ fortitudinis & constantiæ indicem: Nudus egressus sum ex Utero matris meæ, & nudus eodem reuertar. Dominus dedit, Dominus abstulit: Sit nomen Domini benedictum. Clarum est hoc, & à posteritate notandum, fortis patientisque animi exemplum: sed quod sequitur multò est & clarius & illustrius. Satanas qui hæc damna omnia Iob dederat, eis cõtentus non fuit, (eum enim à constantia animi miseris certis deiectum vinci posse iudicabat) sed multò grauiora procurauit. Nam cùm Deus illum iactantem se obuiisse orbem, interrogasset, num Iob seruum suum considerasset, virum probum ac religiosum, quique retineret innocentiam suam, quem tamen illius impulsu frustra oppressisset calamitatibus: respondit, pro inuidia sua, quæ satiari nisi exitio non potest, cutem alienam pro cute sua hominem & facultates suas solitum dare, conseruandæ vitæ causa: quod cùm fecisset Iob in liberis ac bonis suis, nō magnæ ei laudidandum esse, nec mirum, si ipsum non negasset, aut vexasset maledictus. At si corpus eius affligeret morbo, tum denique ipsum ab eo maledicta accepturum esse. Deus, qui athletam suum non superatum iri malis corporis, sed victurum aduersarium sciret, eius libidini corpus ipsius dedit, vetans ne quid in eius siue animum, qui

sui arbitrij est, siue in vitam moliretur. Hac ille
 accepta potestate, prima quaque hora totū cor-
 pus Iob vlcere infecit & afflixit eiusmodi, vt
 ne particula quidē integra remaneret. Ipse quid
 in hac calamitate fecerit aut dixerit, operaspre-
 cium est cōsiderare, & cognoscere. Vt primum
 sensit malum, quasi expulsus, & ex vrbe &
 domo, in sterquilinio sedens, testa saniem excu-
 riebat. Vxor autem, quæ ci sola ex tam magna
 familia relicta, consolationis causa, videbatur,
 cū eum tanta animi constātia hanc miseriam
 summam ferre cerneret, non hoc fortitudini tri-
 buens, sed stupiditati & lētitudini, illum quod
 etiam simplicitatem retineret, obiurgauit, mo-
 nuitque vt Deum maledictis vexaret, atq; ita
 moreretur: siue, quēadmodum alij interpretan-
 tur, vt supplex ab eo peteret, vt à vita migra-
 ret, ne langueret diutius. Ipse, qui se ad res ad-
 uersas forti animo tolerandas preparasset, eam
 placidē stultarum ritu loquentam esse dixit: si
 enim bona à Deo accepissent, cur mala non fer-
 rent? Quod verbum si in simili parique rerum
 statu vsurparemus: neque ita molles, & effœ-
 minati essemus, neque de Dei prouidentia que-
 reremur. Nec verò dubium est, quin eius dolo-
 rem illa vxoris auxerit oratio. Cū enim in mœ-
 rare, aut miseria versamur, si ij qui cōsolari de-

berent, non dico, ab officio discedunt, hoc prætermittentes, sed aliquid faciunt aut dicunt alienum ab officio: tum profectò, tum inquam, cumulus hoc ipso accedit ad dolorem superiorem. Sed vehementius etiam eum auxerunt tres amici illius Eliphaz Themanorū rex, Baldad Suhitarum, & Sophar Naamathitarum. Ii enim cum accepto tantæ illius calamitatis nūcio, magnis itineribus vnà constituto die ex loco, quem communi profectiōni constituerant, eius consolandi causa venissent, primūque id quod officij erat, eminus eum ita malè affectum conspicati, non cognouissent, deinde propius accedentes cum clamore lachrymas edidissent, discissisque vestibus puluerem doloris declarandi causa capitibus aspersissent, sedissentque cum eo septem diebus totidēque noctibus, nec verbum vllum præ dolore, quem eum ferre videbant, facere potuissent: tamen cum ipse loqui cœpisset, atque illi vicissim respondentes, aut differentes, primū quæ ferret, pro sceleribus suis ferre obiecissent, deinde audacem & temerarium dicerent, qui se Deo compararet, vellētque iudicium cum eo subire, postremò arrogantem appellarēt, quòd de se diceret, tantāsque virtutes sibi tribueret, quas nullas aut falsas esse ex iis quæ tolerabat, intelligi posse dicebant: vicissim eorū sen-

tentiam ita refellit grauiſſimis ponderibus ſententiarum, cùm illos qui conſolâdi cauſa veniſſent, & leuandi doloris, ſibi arena grauiores videri dixiſſet, vt nihil habentes quod dicerent, tandem obmutuerint. Eliu verò illis tacentibus partim Iob excuſauit & defendit, partim accuſauit. Quæ illorū de Iob ſententia Deus quàm ſibi diſpliceret, duobus modis docuit: primùm cùm non ſclerum cauſa de illo à ſe ſumptū ſupplicium dixit, ſed vt Satana ſuperato, conſequeretur gloriam: deinde cùm Eliphaz Themano- rum regem obiurgauit, quòd non verè dixiſſet, vt Iob: ob eamque cauſam expiâdi ſcleris cauſa ſumeret, ipſe & ſocij duo, ſeptem tauros, ac totidem arietes, & ſe ad Iob conſerrent, què pro eis cùm immolarent hoſtias precantem ſe audiret. Quod cùm & illi & Iob feciſſent, Deus illis, Iob precibus adductus, ignouit. Qua in re Iob & amor ac charitas eluxit, qui pro malè de ſe exiſtimantibus, & in ſe dicentibus, precatus eſt, & gloria maxima, qui contemptus non ſolùm ab alienis, verùm etiam à ſuis, dignus eſt habitus, quicum Deus in colloquium veniret. Nec verò illius eiufmodi tolerantia & patientia hæc vnâ gloriam cōſequuta eſt, ſed quæ Dei con- ceſſu Satanas ei ſimpla eripuerat, ei dupla reſtituta ſunt omnia, oues, cameli, iuga boum, &

asine. Vixit etiam post has misérias centum & quadraginta annis fœlix & beatus, generauitque septem filios, & filias tres. Qua quidem in duplicata rerum copia & abundantia, non morosus & difficilis, superbúsque ac seuerus in eos qui ipsum rebus aduersis neglexissent, aut contempsissent, illos aditu, colloquio, salutatione indignos iudicās, aut prætermiſſionem officiorum obui-ciens, aut vlturum se iniurias promittēs: sed commodos mores retinens, fratres, sorores, propinquos, eósque omneis, qui ei aliqua de causa noti erant, venientes, cum mutata ei omnia in melius accepissent, comiter excepit, & accepit ab eis exigua munera, id est, ab vnoquoq; ouem vnā, & in aurem auream vnā, quibus tum, vt omnes intelligunt, carere potuisset, sed accepit, ne rebus prosperis elatus, ipsos contemnere videretur. Sermo ab illo cum amicis habitus, quoniam in libro qui eius nomine inscriptus extat, continetur, non necesse habui cum hoc loco exponere. Hoc tantum satis erit intelligi, eum ab illo habitum esse magna ex parte, de humana vitæ miseriis, de Dei prouidentia & potentia, de vita sua superiore, quam præclarā sanctā-que egisset, de improborum suppliciis, de præmiis bonorum & gloria. Prædixit etiam multa de generali corporum resurrectione, quæ illius ser-

monis particula me maximè impulit, ut cum in Prophetarum numerum ascribens, eius vitam inter Prophetarum vitas scriberem: quam propterea primam posui, quòd multis seculis ceteros antecesserit.

SAMVELIS PROPHETAE VITA.

SAMVEL Vates siue Propheta, Elcana Annæque parètibus, ita natus est. Cùm Elcana ipse vxores duas, id quod tum licebat, accepisset, Annam, & Phenennam, Phenenna quæ liberos peperisset, Annæ ut probrum obiciebat sterilitatem. Anna, quæ diuini consilij ignara esset, æmula conuiciis maledictisq; permota erumpebat in lachrymas, nec capiebat cibum, quotānis statis diebus, quibus Elcana domo, id est, ex monte Ephraïmo, in Silo, vbi Dei arca locata erat, solenne iter venerationis, sacrificijq; causa faciebat cum liberis & vxoribus. Is cognita doloris mærorisq; Annæ causa, eam consolari cœpit, cùm illi se decem liberis meliorem esse dixisset. Illa, etsi leuamentū doloris tantum ex hac viri consolatione sensit, ut cibum caperet, tamen intelligens Deum vnū esse, qui sibi planè dolorē adimere posset, cum lachry-

mis votum nuncupans, cum ibi rogare secum in animo cœpit, ut se respiceret, sibi que daret filiū, quem ipsi per omne tempus ætatis consecraret. Heli qui quod labra mouētem videbat, nō vocē illius exaudiebat, temulentam eam putaret, partim obiurgabat ipsam, partim monebat, ut vinum quo madēret, concoqueret: cū ea negare, se vino ad illud diei tempus usam, cœpit: se enim miseram Deum precatā esse tristi animo. Cū Heli ei beneprecatus, illam ita dimississet, ut quod optaret ac peteret, consequeretur: Vterque veneratus Deum domum rediit, atque paulō pōst Anna Dei munere concepit, peperitque Samuli hūc, cuius vitam scribimus. Triennio pōst, cū ablactatus esset, eadem & voti, quo se obstrinxerat, memor, et beneficij quod acceperat à Deo, illū cum hostiis solennibus Deo obtulit, seque Heli sacerdoti mulierem esse, quæ pueri illius impetrādi causa Deum nuper rogasset, ob eāque causam illum ei cōsecraret, indicauit. Nec solū Deo puerum consecrauit, sed multis etiam verbis ei egit gratias, maximisque illum, ac verissimis extulit laudibus. Relicto puero, qui semper Deo ministraret, ipsa cum viro domum rediit. Ibi Samuelis ita gratum Deo officium fuit, ut eum ad munus vaticinationis prædictionisque rerum futurarum, quam

prophetiam vocamus , à prima ætate hoc modo vocauerit . Heli sacerdos liberos duos Ophni & Phinees , quoniam senex erat , sacerdotes , quod tum munus apud Iudæos instituto diuino summa potestate & auctoritate valebat , præfecerat . Ii in illo munere , ea quæ immolabatur , sibi contra Dei imperiū sumebant , & præterea rebus venereis utebantur . Quod cum Heli pater eorum rescuisset , verbo tantum , non re , eos correxit . Itaque istam eius in liberos indulgentiam Deus , ita ingratam atque adeò exosam habuit , vt per prophetam , cuius nomen non est proditum literis , ei significauerit , fore , vt duo eius liberi , Ophni & Phinees , vno die morerentur , quòd plus eis , quàm sibi , honoris tribuisset : excitaretq; sibi sacerdotem fidelē , qui in omnibus quæ faceret , sibi morem gereret . Hanc vatis prædictionem paulò post sequuta est Samuelis creatio . Cum enim penè puer in templo , haud procul à latere Heli sacerdotis , dormiret , ter à Deo vocatus est : expergefactusque , cum ab Heli se accersitum putaret , toties se præsto esse respondit . Heli qui rem ignoraret , toties eum dormitum remisit , sed tertio cum illum à Deo vocatum esse cognosceret , iussit eum dicere Deo , se paratum esse ad audiendum , itaque loqueretur . Hæc dicenti Samueli , Deus ea omnia comme-

morauit de Heli, quæ ei per Vatem, vt iam dixi, prædixerat. Non imperauerat ei Deus, vt Heli hæc omnia exponeret: sed ab illo verbis quibusdam, quæ iurisiurandi religionem continebāt, vt ita dicam, adiuratus, exposuit. Hinc fama longè latèque peruagata est, fidelem Dei prophetam esse Samuelem. Heli autem nec ita multò post mortuo, præterea sacerdos fuit & iudex, qui summus erat apud Hebræos magistratus. Eum summa cum integritate gessit, totius populi cōfessione & testimonio. Cū enim constituto, vt petierat, rege, in conspectu omnium liberè loquendi fecisset potestatem, num bouem cuiusquam abstulisset, aut cuiquam asinum eripuisset, aut aliquem calumnia vel vi oppressisset, aut munus à quopiā accepisset, vt si quis testificaretur, ipse redderet: omnes negauerunt, cuiusque rei produxerūt testem Deum. Quæ quidem vox, vt digna est omnibus, qui publicum aliquod munus & negotium gerūt, sic vtinam ab illis verè usurparetur cum populi testimonio, & confessione coniuncta. Eundem se in administrando gerendoque pōtificatu præstitit. Nam cū sit pontificis sacrū facere, precarique Deum pro populo, eius preces populus ita semper & Deo acceptas, & sibi vtilis sensit, vt ad extremum, cū ei ipse exposuisset, quàm grauiter, pe-

tens sibi dari regem, Deum offendisset, tum populus ab eo maiorem in modum supplex petierit, ut pro se Deum rogaret, ne moreretur: ipse tum, illo multis verbis confirmato, hanc vocem pontifice dignissimam miserit, Deus prohibeat, ne tam graviter sibi peccem, ut pro vobis precandi finem faciam, docendique vos viam ad virtutem ferentem. Sed de his sigillatim aliquid dicendum est. Deus quidem quotiescunque populum suum, id est, Israëliticum, cōtempso se ad deorum cultum religionemque verti cognovit, eius auocandi & abstrahendi causa, hostes semper ei parare solitus est, qui illum opprimerent, ut vel malo coactus, neglecta, spretaque deorum religione, imploraret fidem suam. Id quod sæpe à me demonstratum est in libro, quem scripsi de Vitis Patriarcharum. Hoc etiam consilio Palæstinos Heli sacerdote in illum concitavit, quòd deos peregrinos, maximèque eum qui *Astaro* dicebatur, coleret atque retineret. Illi autem concessu Dei ob tale crimen triginta milia peditum, duosque Heli filios *Ophni* & *Phinees* interfecerunt, capta etià Dei arca, quam præsidiij causa ex Silo in locum, in quo pugnandum erat, portandam curauerant. Anno verò vicesimo post arcam captam, cùm restituta esset à Palæstinis propter clades, quibus opprimebantur,

bantur, quęcunque in locum suum eam transtu-
lissent: Samuel qui causam calamitatis, quę ac-
cepta erat in bello, intelligeret, vniuersum po-
pulū admonuit, vt si planē ex animo ad Deum
redirent omnes, iam deos peregrinos & Asta-
roth de medio tollerēt, Deoque animos suos præ-
pararent, & solum eum colerent: sic enim fo-
re, vt ipsos è faucibus ac potestate Palæstino-
rum eriperet. Assensi sunt omnes Samuëli, de-
iectisque & sublati peregrinis diis, in iis Baa-
lim & Astarothe, Deum solum coluerūt. Hinc
in Masphat eos omnes iussit conuenire, vt pro
ipsis Deum precaretur. Eò cum venissent, hau-
stam aquam in conspectu Dei effuderunt, ieiunioque illo die seruato, se Deo peccasse professi
sunt. Palæstini cum primū Iudæos eò conue-
nisse intellexissent, in eos venerunt præfecti, in-
festo exercitu, tantęque ex eo apud Iudæos se-
quuta trepidatio est, vt statim cum Samuele
egerint, vt nullum faceret rogandi Dei finem,
quoad Palæstinis essent liberati. Ipse lactētem
agnum vstum integrum primò immolauit Deo,
deinde eum pro Israele precatus est. Deus au-
tem illum apertē audiuit. Nam cum, illo sacrum
faciente, Palæstini in Iudæos impetum fecissent,
Deus eos fragore tonitruī exterritos Iudæi cæ-
dendos tradidit. Hac clade ita repressi afflictique;

sunt, ut nunquam postea viuo Samuele in Iudæorum fines ausi sint irrumpere: hinc vrbes quas ceperant, malo coacti, ut pacem cum Iudæis facerent, reddiderunt. Atque hac ipse munera quâdiu per atatem licuit, sustinuit. Cùm autem senex iudicandi munere fungi non posset, liberos suos Ioelem & Abiam Iudices creauit. Ii cùm patrem non imitarentur, sed ob iudicandum pecuniam & munera acciperet, maiores natu Iudæorum ad eum adierunt, petētes, ut quoniam senuerat ipse, liberique sui eum non imitabatur, regem sibi daret & cōstitueret, quo iudice vterentur. Samuelem vox ista offendit, ob eamque causam Deum sibi consulendum censuit. Deus illum facere iussit, quod petiissent: neque enim eum ab illis, sed se abiectum repudiatumque esse, ne ipsis præffet. Saulēque Cis filium, quem regem vngeret ac crearet, indicauit. Eum cùm inuenisset, quoniam maximum quemque ab humero magnitudine corporis superabat, vniuersum populum monuit, ut videret, ei quem elegisset Deus similem esse neminē. Populum autem, cùm vitam clamore nouo regi se optare significasset, regni lege recitata, mandatāque literis, ac reposita in tabernaculo, dimisit. Hinc beneficiorum diuinorum, quæ & ipsi & patres eorum semper neglexissent, commemoratione,

eis exposuit, quàm graue scelus admisisset, cùm regem petiuissent. Quod quò facilius intelligerent, fragores auditi sunt, & effusa pluuia eius rogatu, sicuti illis fore prædixerat: qua tam noua re & inusitata perterriti, egerunt cum illo, vt Deum rogaret, ne morerentur, quòd se petendo regē graue scelus admisisse faterentur. Ipse multis verbis, vt bono animo esset, neque timerent, hortatus est. Eos enim grauius quidē peccasse, non tamen Deum deserere oportere, sed colere eum omni animi studio & contentione, spreto contemptoque peregrinorum deorum cultu, qui cùm inanes vanique essent, illos malis liberare non possent. Sic enim fore, vt ipsos Deus non desereret, propter nomen suum magnū, cùm præsertim iureiurando confirmasset, eos sibi populum esse facturum. Quòd si pergerent peccare, & illos, & regē ipsorum, esse perituros. Saul rex paulò post contra Dei præceptum, cùm Samuel intra septimū diem, quo se adfuturum dixerat, non venisset, Iudæique metū Palæstinorum innumerabilium, qui ad prælium venerāt, dilaberentur, hostias immolauerat, cùm Samuel ipse interueniens grauius eum obiurgauit, prædixitque illi regni sui adesse terminum, atque in eius locum successurum virum, qui Deo gratus foret. Iterum ipse Sauli ob eandē causam, finem

regni, aut interitum potius, ut Vates Dei nunciavit. Amalecitis & Iudæis ex Ægypto decedentibus restiterant, quorum iniurias cum per Saulem ulcisci Deus instituisset, Samuelem ad eum misit, qui imperaret, ut comparato ingenti exercitu, Amalecitas resque eorum omnes penitus deleteret. At ille Agag regi capto pepercit, armenta que & greges, ac res omnes quæ alicuius precij erant, reservauit. Hinc Deus Samueli dixit, a grè se ferre ac pœnitere, quod Saulem, qui præcepta sua contemneret, creasset regem. Ex his Dei verbis, reque quam Saul perfecerat, tantum animo dolore cepit Samuel, ut reliquam noctis partem in clamore precibusque consumpsit: prima autem luce magnis itineribus ad Saulem cõtendit, quem cum seuerè obiurgaret, commemoratis Dei in ipsum beneficiis, quod iterum Deo non paruisset, isque contrà obedisse illi se contenderet, ac tantum reservasse populum optima spolia, ut ex iis immolaret Deo: ipse Deum non victimas optare dixit, sed velle potius obedi sibi ac præceptis suis: Meliorem enim esse obedientiam, quam victimas. Itaque hoc intelligeret, ac sibi persuaderet, quod ipse abiecisset Deum, à Deo etiam se abiectum esse, ne regia iam potestate præset. Cum Saul se peccasse fateretur, & Deo & ipsi, metu populi, rogaretque

illum, ut peccatum suum etiam ferret, ac reuerteretur secum, adorandi Dei causa: negaretque Samuel id se esse facturum, quod præceptum Dei contempsisset, ob eamque causam illum Deus contemneret, ne iam rex Iudæis præficeret: apprehendit summam pallij partem eius abeuntis, tanta vi, ut discissa sit: ex quo quasi augurio Samuel, discissum à Deo regnum ipsius dixit, eoque meliori traditum. Cum ille iterum se peccasse fateretur, Samuelémque rogaret, ut sibi honorem tribueret in conspectu principum ac populi sui, redirétque secum, ut Deum veneraretur: cum sequutus est, regémque Agag obsisissimum discerpsit, cum his verbis, Ut gladius tuus matres liberis priuauit: sic inter mulieres erit sine liberis mater tua. Inde Samuel domum in Ramatha rediit, nec ex eo die vidit Saulem, cuius tamen vicem & casum dolebat. Dolentem Deus obiurgauit, quærens quousque illum lugeret, quem ex regno expulisset. Itaque oppleret cornu oleo, ut ipsum ad Isai Bethlehemitanum mitteret, cuius filium regem ipse delegisset. Cum rogaret, quâ ire posset, quin à Saule cum rescuisset, quàm primum occideretur: viam rationémque docuit, qua facile illius furorẽ vitaret. Ita deniq; bonæ spei plenus diligenter & officiosè mandatum Dei curatum perrexit, Dau-

démque regem vnxit à Deo sibi declaratū & ostensum. His præclare sanctæque gestis omnibus, Samuel in Ramatha domi suæ, in senectute sanctissima, à vita migravit: quod cum accepissent Iudæi, vniuersi conuenientes eum luxerūt, ibique sepelierunt. Si ordinem sequimur eorum, quæ primo libro Regum scripta sunt, ante Saulis mortem, regnique Dauidis principium, siue initum ab eo regnum & magistratū, excessisse è vita videbitur: Sin rationem habemus eorum, quæ priore libro Paralipoménon prodita sunt memoria, Dauidem & Samuelem videntem, id est, prophetam, ducentos duodecim ianitores qui ibi enumerātur, delegisse, id quod viuo Saule fecisse non videntur, non ante Saulis mortem discessit à vita.

NATHAN PROPHETA.

NATHAN Propheta fuit Dauidæ rege, ex tribu Thoc, vt ait Epiphanius, qui etiam scribit eum Gabathanum fuisse, ac prænouisse graue flagitium quod Dauid rex cum Bersabee admissurus erat, magnisque itineribus ex Gabath Hierosolyma, Regis à tali facinore arcendi causa venientem, impeditum à facinoroso


homine , qui hominem interfecerat , quē nudum humi iacentem cū inuenisset , eius sepeliendi causa ibi mansisse , ne à feris deuoraretur : eundemq; illa ipsa nocte cognouisse , à Davide illud admissum esse flagitium , ob eamq; causam cum mœrore in Gabath rediisse : atque ut primum Vrias vir Bersabee à Davide interfectus esset , illum ad ipsum , quem reprehēderet , missum esse à Deo . Atque hæc sunt , quæ de Nathan Epiphanius scribit . Quæ autem de eo literis diuinis mandata sunt , ipse dicam . David rex arcam Dei maximo cum honore ac veneratione , adhibitis omnium generum instrumentis musicis , adiunctisque triginta milibus delectorum hominum , primum domū Obededom , propter repentinam Oze mortem qui eam attigerat : deinde cū arcæ causa illi omnia prosperè euenire intellexisset , domum suam ducendam curauerat : paulò post idem , qui indignum existimaret , se in ædibus cedrinis habitare , arcam autem Dei sub pellibus , id est , in tabernaculo , Nathan in consilium adhibuit , eique rem illam exposuit . Nathan primum , qui nondum Dei consilium cognitum haberet , ei quod de re illa statuisset , faciendum esse censuit . Deinde nocte , quæ diem illū sequuta est , Deus ei præcepit , ut ad Davidem adiens illi exponeret , non ab ipso adifican-

dam domum quam cogitaret, sed cùm excessisset è vita ab eius filio, cuius solium constitueret: quod cùm illi Nathan narraisset, ab opere, quod facere instituerat, destitit, Deoque pro summis ipsius in se beneficiis, maximas, pro eo ac debuit, egit gratias. Iterum Deus illum ad Davidem in planè dissimili causa misit. Nā cùm ille stupro Bersabee illato, Vriam eius virum in bello interficiendum curasset, collatione hac per illum ei sceleris sui gravitatem ita exposuit, vt se imprudens, cùm rem non intelligeret, ipse condemnauerit. Nathan Dei iussu illi narrauit, duos viros esse in vrbe vna, quorum is qui diues esset, abundaretque ouibus & bobus, abstulisset à paupere ouem, quam vnā haberet, hospitique, qui ad illum diuertisset, apposisset in conuiuio. Itaque se ad illum venisse, vt quam in eum sententiam ferri vellet, intelligeret. Cùm David ira incitatus in illū, quem hoc perfecisse putabat, dignum eum morte, ac quadrupli iudicium in eum ferendum dixisset: Nathan, ipsum illum esse hominem cōfirmavit, quippe qui concupratam à se Bersabee accepisset vxorem, interfecissetque Vriam illius virum. Ob eamque causam nunquam ab eius familia malum abfuturum. Eaque mala omnia & aduersas res, quæ ei paulo post euenerunt, prædixit. Grauitèr se

Domino peccasse tū deniq; David sensit, et cōfessus est: quā eius pœnitētiā verā sciēs Deus, Nathan iussit illi dicere, ob eam causam translatum esse peccatum ipsius, cūmque non esse moriturum, sed filium, qui ei natus esset, quod hostes hoc eius scelere impulsī de Dei nomine & honore detraxissent. Quæ cūm Nathan dixisset, domum rediit, illa autem omnia quæ prædixit, consequuta sunt. David summa senectute erat, sic, ut vestibis opertus, non caleret, Adonias eius filius ex Haggith, qui ex hoc mortem patris appropinquare sciret, illo inscio regnum occupauerat, neque eum pater cū rescivisset, obiurgauerat. Nathan tamen ab illo stare noluit. Itaque Bersabee Salomonis matri auctor fuit, ut si sibi ac filio consultum vellet, adiens ad regem, eum admoneret, Adoniam esse, qui ipso viuo & inuito regnum usurparet, cū iurasset, sibi in regnum successurum esse Salomonem: pollicitusque est, se interuenturum, atque absoluturum esse orationem, quam habere cœpisset. Illa prior intromissa, exponebat Regi quæ ad rem pertinebant, cū Nathan adesse regi nunciatur. Ingressus, multis verbis rei indignitatem auxit, Salomonemque anteponendum, sicuti ab ipso acceperat, censuit. Quod cū Regi iterum placuisset, Nathan dedit negotiū, & Sadoc sa-

cerdoti aliisque tribus, vt Salomonem in mulam suam impositū, in Gihon deducerent, ibique Sadoe eū oleo vngeret: id quod quàm primum cum omnium fausta acclamatione perfectum est. Atque hæc sola de eius vita inueni. Excessit autem è vita admodum senex, sepultusque est in Gabath patria sua, vt Epiphanius scribit.

G A D P R O P H E T A .

 AD Prophetam iisdem ferè temporibus, quibus Nathan, prophetiæ munere & donatus & functus est. Quanquam semel eum ante illum ad Dauidem à Deo missum esse inuenio. Cum enim Dauid Saulis conspectum vitanda certæ mortis causa fugiēs, ad Achis regem Gethæorum venisset, isque illum se insanire salutis causa simulantem cōtempnisset, atque inde in speluncam Odollam fugiēs princeps quadringentorum obælatorum delectus esset, & inde profectus in Maspha, quæ erat iuris ac ditionis regis Moabitæ, regem rogasset, vt vtrūque parentem suum apud ipsum manere sineret, quoad sciret, quid sibi Deus faceret, quo impetrato, maneret in præsidio: Gad Prophetam hic, inde ei abeundum, & in Iudææ

partem, quæ Iudæ eiûsque posteris in partitione obtigerat, veniendum censuit. Cuius ille, aut Dei potius consilio & imperio parens, in saltum Hareth se recepit. Iterum ad Davidem à Deo missus est. David suos omnes qui ferre arma possent, per Ioab magistrum militum recenseri iusserat, in quo cùm Dei voluntatem eius munere se offendisse intelligeret, & se peccasse confessus est, & rogavit Deum, ut transferret peccatum suum. Prima luce cùm surrexisset, Gad prophetam, qui, ut scriptum est, Davidi res prædicere solitus erat, ad eum misit Deus, qui ei trium optionem daret, aut famis septem annorum in imperio suo: aut fugam hostium, qui eum tribus mensibus persequeretur: aut certè pestem trium dierum in suo imperio. Quæ cùm exposuisset, rogavit eum, ut responderet, quod illorum trium mallet, ut ei à quo missus esset, renunciaret. Pestem cùm maluisset, quod diceret se malle in Dei manus, quàm in hominum incidere, quippe quoniam valde misericors esset: peste intra constitutum tempus septuaginta milia virorum mortua sunt. Fecerat Deus, ut ipse angelum cadentem & interficientem videret: quo quidem tempore usus est voce rege dignissima. Se enim dixit qui peccasset, illos autem, qui oves erant & interficiebantur, nihil sceleris ad-

misisse: itaque rogare se illum, ut manum suam in se & in domum patris sui verteret. Quibus illius verbis impulsus Deus, ad eum Gad prophetam misit, qui ei præciperet, ut in area Arcunæ Iebusæi aram edificaret sibi. Extructa ara cum Deo immolasset, tum & Dei ira deferbuit, & clades sedata est.

Ahias, siue Achias Prophetæ.

AHIAS, siue Achias Silonita. Is, ut ait Epiphanius, prædixit Salomoni, fore, ut Deum offenderet, mulieresque ipsum à Deo abducerent & auerterent. Hieroboam etiam, ut idem scribit, reprehendit, quod si regia potestate præfesset, dolo ac fidele sequeretur Deum: eidemque prædixit, fore, ut pari buccularum aduersaretur Deo, & genus eius servitute premeretur. Nos autem hæc pauca, quæ diuinis literis mandata sunt, de eo narrabimus. Salomon rex, Hieroboam Ephrathæum, cum eum bonæ indolis esse perspexisset, tributis uniuersæ familiæ Ioseph præfecerat. Ei Hierosolymis egredienti Ahias hic amictus pallio nouo, in via obuiam factus est: arreptumque pallium

suum nouū cū discidisset in partes duodecim, Hieroboam monuit, vt partes decem sibi sumeret. Deum enim diuisurum esse regnum Salomonis, ei que decem tribus daturum, illi autem tribum vnā reliquam futuram Dauidis causa: hæc verò Salomoni ipsi euentura esse, quòd peregrinos deos coluisset, nec Dei præceptis paruisset, Dauidis patris imitatione. Si in imperio, mortuo Salomone (neque enim eo viuo illū decem tribubus imperaturū) præceptis Dei parèret, sicuti Dauid paruisset, illum ei nullo loco defuturum. Cū autem Hieroboam iam rege, Abia eius filius agrotaret, venit ei in mentem eorum quæ Ahias Prophetæ ipsi prædixerat. Itaque vxori suæ præcepit, vt mutata veste, ne agnosceretur, ad eū in Silo proficisceretur, consultum quid puero euenturum esset. Illa paratis iis omnibus, quæ necessaria erant, se dat in viā. Ahia autem, qui præ senectute cernere non poterat, & patefecit vxorem esse Hieroboam quæ illum de filio consultum venerat, & suggessit, quid illi responsi daret. Eam igitur ingredientem & nomine suo appellauit, & grauiter obiurgauit, quòd simulatè venisset. Prædixit etiā ei filij mortem, familiæque euersionem propter Hieroboam viri scelera. Puer quidem in eius introitu, vt Ahias prædixerat, discessit à vita:

Aſa autem regem Iudæ, Baſa interfecto Nabad Hieroboam filio, domum eius euertit. Migravit autem à vita Ahiaſ in Silo, Vt ait Epiphanius, atque haud procul à quercu, quæ ibi erat, ſepultus eſt. Semeias, cum defeciſſent à Roboam ad Hieroboam, Vt Ahiaſ Prophetæ prædixerat, tribus decem, ob eamque cauſam Roboam Hieroſolymam proſectus, ingentem exercitum Vt illas reciperet, comparaffet, miſſus eſt à Deo, qui Roboam Vniuerſisq; iis qui ei parebant, Vetaret, ne proficiſcerentur, neq; bellum gererent cum fratribus ſuis Iſraeliticis. Ita- que in ſuam quiſque domum redirent: hoc enim à ſe eſſe perfectum. Parentes autem Dei præcepto, re infecta reuerſi ſunt.

I O A M P R O P H E T A.

IOAM appellat Epiphanius Prophetam eum, quem ſcripta diuina commemorant, ex Iudæ, iuſſu Dei, in Bethel veniſſe, tū cum Hieroboam ad aram incēdendi thuris cauſa ſtaret. Is quidem primo ſuo aduentu in altare ex Dei mandato clamare cœperat, *Altare, altare: Hæc ait Deus, Naſcetur familie Dauidis filius Ioſias nomine, & in te ſacer-*

dotes excelſorum, qui nunc in te thura incēdunt, immolabit, & oſſa hominum in te incēdet. Dixitque illud hinc intellectum iri, quòd tum altare diſcindendum eſſet, & cinis qui in eo erat effundendus. Hunc Prophetæ, aut Dei potius, ſermonem ferre non potuit Hieroboam, ſed porrecta manu in eum ex altari, circumſtantibus imperauerat, vt illum comprehenderent, cūm repētē manus eius exaruit ſic, vt eam ad ſe iam retrahere non poſſet. Vim autem Dei illam eſſe ſentiens, prophetam rogat, vt pro ſe Deum precetur, vt ſibi manum ſaluam & integram reſtituat. Quod cūm feciſſet, reſtituta manu, prophetam, memor beneficij, rogat, vt ſecum prænſum domum veniat, vbi munera à ſe ſit accepturus pro beneficio. Ipſe negauit hoc ſe facturum eſſe, etiam ſi dimidiam partem imperij ſui daturus eſſet. Sic enim ſibi in mandatis datum eſſe à Deo, ne etiam eadem via qua venerat, rediret. Itaque alia via reuerſus eſt. Sed cūm ſuſceptum curſum conficeret, propheta quidam ſenex, cui liberi ſui ea quæ acta ab eo erant, narrauerant, in aſino ſedēs, eum ſub terebintho ſedentem aſequutus, cūm rogātī, vt ad ſe capiendi cibi cauſa diuerteret, eadem de cauſa ſe facturum negaſſet, ad extremum confirmani ſe etiam prophetam eſſe, cui Deus hoc in mādatis

dedisset, nimium credulus malo suo assensus est. Accumbenti enim vnâ cum illo mensa, Propheta, qui cum reduxerat, iussu Dei ei prædixit, quòd eius præcepto non paruisset, cadauer ipsius non illatum iri in patrum suorum sepulchrum. Itaque abeuntem, paulò post, leo interfecit. Quod cum propheta illi seni nunciatum esset, confestim eò profectus est, integrumque cadauer in asinum impositum domum suam tulit, sepeliuitque cum omni officio, rogans liberos, vt se, cum excessisset è vita, ad illum sepelirent.

IEHV PROPHETAE VITA.

IE H V, Hanani filius, Propheta Asa rege Iudæ, fuit. Eum ad Baasa Israelis regem Deus misit, qui ei prædiceret, quoniam quasi ex puluere ab ipso elatus, & præfectus dux Israeli, tamen Hieroboam imitabatur, suoque exemplo & iussu Israelem ad peccatum impellebat, fore vt illius res & memoria deleantur. Hæc autem Dei verba Baasa non solum non eo animo quo debuit, accepit, verum etiam Iehu Prophetam legatumque Dei morte mulctauit. Idem Iosaphat regem Iudæ reuersum ex bello, in quo Achab auxilium

xilium tulerat, grauiter obiurgauit, dixitque ob illud factum, cum ira Dei & odio dignum esse, sed opera bona in eo esse inuenta.

Azarias Propheta Obed filius.

IS ad Asa Iudæ regē, qui, quòd altaribus peregrinorū deorum euerfis, sublatóq; eorum cultu, populum suū quærere ac colere Deum docuerat, cum suis Dei cōcessu ac munere AE. thiopū qui infesti irruerāt, infinitam multitudinem, cum Deum precatus esset, vt sibi ac suis ferret auxiliū, vicerat, iussu Dei venit anno eius imperij quintodecimo, nunciatum, quoniam ipse ac populus eius cum Deo fuissent, cūmq; coluissēt, Deum etiam cum eis fuisse: prædictūque, multis diebus in populo Israelitico nullū Deum verum futurum, nullum sacerdotem, doctore, nullāque legem. Cū autem reuersirebus aduersis Deū quæsiuissent, fore vt illum inuenirēt. Tum verò non fore in pace egredientē & ingredientem, sed in metu ac terrore omnes terræ incolas. Itaque forti essent animo omnes, neque manus eorum dissoluerentur, id est, opera firma & stabilia essent. Operi enim eorum mercedem esse propositam, quam essent cōsequuturi. His Azariæ verbis Asa fortior effectus est ad deorū peregrinorum vbique tollendam religionem, & veri Dei restituendā, in eaq; confirmādos suos.

HANANI PROPHETA.

HANANI Iehu Prophetæ pater, prophetiæ munere functus est apud Asam regem Iudæ, anno imperij ipsius sexto & tricesimo. Causa autem hæc fuit eius legationis. Baasa rex Israelis infesto exercitu in Iudam venerat, muroque cingebat Rama, sic, ut nemo tuto ex regno Iudæ egredi, aut in illud ingredi posset. Quod cum Asa nunciatum esset, prolatum ex thesauris domus Dei aurum & argentum, & ex suis, misit ad Benadab regem Syriæ, qui Damasci regiam collocauerat, petens ab eo auxilium. Rex Syriæ, principes cum ingenti exercitu misit, qui cum multas Israelis vrbes munitas cinctasque muris euertisset, huius rei nuncio accepto, Baasa ab opere destitit. Ita facile Asa conuocatis suis adhibitisque operis, quicquid ille iam excitauerat, euertit ac diruit. Deus autem improbens ac detestans Asæ factum, ad eum Hanani prophetam hunc misit, qui ei diceret, quia in rege Syriæ spem suam collocauerat, non in Deo suo, qui potestati ipsius Aethiopum maiorem exercitum, quam Assyriorum esset, tradidisset, idcirco Syriæ exercitum ex eius manibus elapsum esse, et prædiceret ex illo tem-

pore in eum conflatum iri bella plurima. *Aſa* qui *Azaria* Hanani filij oratione adductus, antea, vt docui, multò meliorem & fortiorem se præſtiterat, non modò non Hanani patris, atque adeò Dei verbis ad ſuperiorem virtutem ſe retulit, ſed prophetam quoque cõiecit in carcerẽ.

MICHÆÆ PROPHETÆ

IEMLA FILII VITA.



MICHABAS Iemla filius, Iofaphat rege Iudæ, prophetia munere clarruit. Vnius fuit cauſa talis, Iofaphat affinitate cum Achab Iſraelis rege cõiunctus, ab illo ad belli ſocietatẽ in Ramoth Galaad vocatus fuerat. Cũ ad eum proſectus cum ſuis, egiſſet cum illo, vt conſuleret Deum, num eò ad bellum proficiſci nẽcne deberent: conuocauit Achab quadringentos pſeudoprophetas, vt eos de loco belli conſuleret. Cũ reſpondiſſent, illi eò proficiſcendum eſſe, hoſtes enim in ipſius venturos eſſe poteſtatem: Iofaphat, qui eis fidem non haberet, eum rogauit, num quis ibi eſſet Dei propheta, quem etiam conſulere poſſent. Reſpõderat ille, eſſe quidẽ Michæam Iemla filium, ſed eum ſibi ſolitũ eſſe ſemper mali aduerſi quẽ ali-

quid prædicere, cùm Iosaphat eum monuit, ne ita de Michæa loqueretur. Itaque spadonem vnum è suis misit, qui Michæam accerferet. Spado cùm illum inuenisset, ei nunciauit, omnes prophetas & vates domino regi fausta omnia prædicere: itaque se eum rogare, ne ab illis dissentiret. Michæas iureiurando confirmauit, se quicquid Deus suggereret esse dicturum. Ad regem cùm venisset, consulenti vtrum in Ramoth-galaad ipsis proficiscendum esset ad bellum, an manendum, responderat, eundem: eis enim prosperè euentura esse omnia: cùm idem iureiurando illum adegit, & vt nostri dicunt, adiurauit semel atque iterum, ne sibi, nisi quod res esset, Dei nomine nunciaret. Ipse respondit, se vniuersum Israël dispersum in motib. more ouium quæ pastore carent, vidisse: itaque Deum imperasse, vt in suam quisque domum redirent omnes, quod dominos non haberent. Tum Achab, Iosaphat, An non, inquit, tibi hoc verè dixi, istum mihi nihil prædicturum esse, nisi quod infaustum esset? Michæas his verbis nihil deterritus, quod non crederet verbis suis, narrauit præterea se Deum vidisse in solio suo sedentem, omnemque cæli exercitum ei præsto fuisse à dextra & sinistra, ac tum quasiuisse, quisnam decepturus impulsurusque esset Achab regem Israël, vt

eat Ramothgalaad, ibique corruat: cui cum alij aliud responderent, Spiritum improbum accessisse, qui hoc negotij sibi depoposcisset, respondisseque Deo quærenti, qui illum deciperet, se spiritum mendacem fessurum in ore prophetarum illius omnium. His verbis concitatus Sedechias prophetarum vnus, collaphum ei infregit, quærens ab ipso qua via à se ad illum transisset spiritus. Cum respondisset, id illum tum experturum, cum ex cubiculo in cubiculum se abdendi causa transferret, Achab iussit duci eum ad Ammon principem ciuitatis, & ad Ioas Amelech filium, qui illum in carcerem cõiicerent, vbi ei tantum panem & aquam darent, quoad cum pace, rebusque ex animi sententia gestis, rediret. Michæas qui hoc sibi à Deo patefactum sciret, respondit, si ille cum pace reuerteretur, per se non esse loquentum Deum: eiusque sermonis sui, omnes qui aderant, vt testes ac memores esset, monuit. Ita Achab & Iosaphat in Ramothgalaad profecti sunt cum suis. In via Achab mutato ornatu, Iosaphat ornatu regio voluit procedere. Rex autem Syriæ principibus imperauerat, vt solum regem Israelis peterent. Itaque cum ex ornatu illum esse intelligerent, vniuersi toto impetu in Iosaphat ferebatur. Iosaphat in tam certo mortis discrimine, Dei fidem implorauit, qui

eum audiuit. Cùm enim duces illũ non esse eum quẽ peterent, viderũt, pepercerunt. Accidit autem paulò post, vt vnus de plebe sagittam in incertum iaceret, quæ casu suo Achab inter ceruicem & humeros sauciauit, quo ex vulnere, occidente sole, mortuus est.

ELIÆ PROPHETÆ VITA.

ELIAS Tesbanus non solum prophetiæ munere præstitit, sed clarus etiam edendis miris ac nouis operibus fuit, Achab rege Israelis, qui ei præesse cœpit anno tricesimo octauo Asæ regis Iudæ, annisq; duobus et viginti præfuit. Primum ad ipsum Achab eũ Deus misit, qui illi prædiceret, non delapsuram pluuiam certo tẽpore, nisi ipse loqueretur. Quo quidem tempore iussu Dei se ad torrentem Carith qui erat è regione Iordanis, ex quo biberet, se contulit, cùm ipse promississet, missurum se coruos, qui illum pascerẽt. Eò cùm venisset, panem ei & carnes manẽ ac vesperi corui ferebant: ipse ex torrente aquam hauriebat. Exiccato autem torrente post aliquot dies præ siccitate, præcepit ei Deus, vt Sareptã Sidoniorum vrbem ad

viduam cui iussisset, ut ipsi ea quæ ad victum pertinent præberet, proficisceretur. Iam ad portam Urbis peruenerat, cum viduam offendit ligna colligentem. Accersitam rogat, ut sibi paululum aquæ in vase daret. Pergenti, à tergo clamauit, orans ut frustum etiam panis afferret. Negauit illa se panem habere, sed solum tantum farinae quantum pugillus capere posset, quem iret coctum sibi ac puero, ut cum comedissent, morerentur. Ipse eam monuit, ne timeret, sed iret, ac faceret ut dixerat, ita tamen ut ipsi primum cibarium panem faceret, deinde sibi ac puero. Deum enim dixisse, hydriam farinae non defuturam, nec lecythum olei defecturum, ad eum diem, quo ipse pluuiam in terram effusus esset. Credidit mulier, atque ex cocto pane & Elias edit, & mulier, & puer eius: nec ex eo die hydria farinae imminuta est, aut lecythus olei defecit. Maxima in hac re vis & virtus Eliæ excelluit, sed multò maior in ea quæ sequitur. Acciderat, ut filius viduæ illius ita egrotaret, ut iam spiritum non duceret. Ea ad Eliam veniens querebatur, quòd eius aduentus causam mortis filio attulisset. Arreptum ex eius sinu tulit in cœnaculum, in quo ipse manebat: collocatòque eo in lectulo, cum clamore Deum rogauit, cum se extendisset, tẽrque dimensus es-

set puerum suo corpore, ut eius animus in corpus rediret. Eius preces audiuit Deus, excitauitque puerum, quem uiuum Elias matri reddidit. Illa ex facto illo se intelligere dixit, illum esse virum Dei, & verum esse verbum eius, quod in ore illius esset. Anno tertio siccitatis iussit eum Deus se Achab regi ostendere, ut aquam in terram effunderet. Erat tum in Samaria fames tanta, ut Achab Abdiam præfectum pratorio, qui Deum colebat & timebat, coactus sit, diuisis regionibus, in aliam mittere, ipse in aliam proficisci pabulatum, ubicunque fontes esse cognoscerent, ne equi, muli, & iumenta fame interirerent. Abdia in via sua Elias factus est obuiam, quem cum agnouisset, humi in faciem decidit, rogauitque, num ipse Elias esset. Elias, cum se esse dixisset, ei que præcepisset, ut iret nunciatum domino suo adesse Eliam: rogauit, quid meruisset, ut se Achab interficiendum traderet. Neque enim esse nationem aut regnum, quod non misisset, qui eum quaererent: qui cum renunciaissent, illum visum esse à nemine: tum illum, ut ita dicam, adiurasse regna singula & nationes. Et tamen eum se ad illud mittere nunciatum adesse ipsum, quem subito Spiritus abriperet atque transferret in locum sibi incognitum: tumque Achab, qui illum non in-

ueniret, certa morte se mulctaturū esse. Cū illi cum iureiurando affirmasset, se illi eo die ostensurū esse: tū Abdias eius fide profectus est nunciatum Achab, adesse Eliam. Achab illi obuiam prodiit: quo aspecto, Tū ne es, inquit, qui Israellem conturbas? Ipse eum se esse negauit, sed illum, patrisque eius genus, & familiā, qui præceptis Dei contemptis, Baalim sequerentur & colerent. Eadem animi fiducia ei tum præcepit, Vt prophetas Baal quadringentos quinquaginta, vniuersūque populum ad se in Carmelum montem conuocaret. Cū illi conuenissent, ipse ad populum accedens, rogauit vniuersos, quousque in duas partes claudicarent. Si Dominus esset Deus, eum sequerentur: sin Baal, sequerentur illum. Tacētibus vniuersis iterum dixit, se vnum Dei prophetam remāsisse, Baal autem quadringentos & quinquaginta. Hanc tamen se illis conditionem proponere. Datis bobus duobus, se dixit prophetis Baalim optionem daturū: Vtrum mallent, eum in frustra cōcisum, in lignis ponerēt, ignem autem non supponerent: se etiam alterum discerptum, in lignis positurū, igne non supposito. Cū populus hanc Eliæ conditionem optimam esse acclamasset, iussit illos priores id quod inter ipsos conuenerat facere, actum denique implorare fidem deorum suorum. Illi perfe-

Etis omnibus ex pacto, non supposito igne, Baal
 rogabant à prima luce ad meridiem, Vt se audi-
 ret: nec vox erat, neque qui responderet. Meri-
 die Elias eos irridens, hortabatur, Vt quoniam
 Deus erat, & forsitan loquebatur, aut erat in
 diuersorio, aut in itinere, aut certè dormiebat,
 excitandi eius causa, voce maiore clamarent.
 Illi ergo magna voce clamabant, seque cultris
 ac lanceolis ritu suo incidebant, ad eum finem,
 dum sanguine perfunderetur. Cùm meridiei ho-
 ra cessisset, illisque vaticinātibus venisset tem-
 pus, quo sacrificiū offerri solenne erat, nec vox
 exaudiretur, nec quisquam responderet, aut at-
 tenderet: tum demum Elias accito ad se vniuer-
 so populo, cùm accessisset, dirutum Dei altare
 primò restituit ac refecit, ex duodecim lapidibus
 quos pro filiorum Iacob numero sumpserat, &
 ex alia materia, quā cōmodam & necessariam
 operi putabat: deinde cùm imperasset tertio, Vt
 toties in aquaductum aquam infunderent, ve-
 niſſetque tempus sacrificij, ipse compositis lignis
 sine igne accedens, rogare cœpit Deum his ver-
 bis, Domine Deus Abraham, & Isaac & Ia-
 cob, ostende te hodie esse Deum Israelis, ac me
 seruum tuum, fecisseque hæc omnia iussu tuo.
 Audi me Domine, audi me, Vt discat hic po-
 pulus te esse Dominum Deum, & te conuertis-

se iterum cor suum. Vix finem dicendi fecerat, cum ignis de cælo hostiam incensam cōsumpsit, ligna quoque, lapides, pulverem & aquam quæ erat in aquæductu. Populus rei admiratione cadens in faciem, statim clamare, semel atque iterum, Dominum Deum esse. Ipse iussit prophetas Baal comprehēsos ab illis duci ad torrentem Cison, eosque ibi omnes interfecit. Tum iussit Achab venire, vesci ac bibere: aquarū enim multarum fremitū audiri dicebat. Cū venisset, ipse in montis Carmeli verticem ascendit, pronusque humi, facie sua inter genua posita, puerum septies iussit mare versus aspiciere, quod cū ille fecisset, tum demum visa est parua nubes ex mari excitari, qua aspecta, Achab monuit, ut iuncto curru descenderet, ne ipsum pluvia opprimeret: paulo post ingēs vis pluviæ effusa est. Achab ex loco illo veniens ad Iezabel reginam, ei cū omnia ordine narrauit, quæ gesserat Elias, tum eadem prophetarum: quo nuncio ita conturbata est & concitata in Eliam, ut statim miserit qui ei dicerent, se non recusare, quominus à diis malè acciperetur, nisi postero die illa ipsa hora ipsum interficeret, quemadmodum illorum vnus interfectus fuisset. Perterritus his minis Elias, abiit quocunque cum voluntas sua ferebat, venitque in Bersabee Iudæ,

relictôque ibi puero suo in solitudinem, via diei
vnius se recepit. Ibi sedens subter iuniperum,
mortē optauit, & quieti se dedit in vmbra ar-
boris. Angelus Dei interueniens, eum monuit
semel atque iterum, vt surgeret ac vesceretur.
Primum quidem comedit & bibit, sed iterum
se dedit quieti. Itaque angelus rediens præcepit
ei, vt quia ei magna via restabat, surgeret ac
vesceretur. Ipse surgens cū cibum cepisset, id
est, cibariū panem quem angelus apposuerat,
& aquam bibisset: vi cibi illius quadraginta
diebus, totidēque noctibus, vsque ad montem
Horeb ambulauit. Ibi in specu delitescēti Deus
ostensus est, qui ab eo quæsiuit, quid illic ageret.
Cū respondisset, magnum studium suum in
Deum fuisse in iis quæ gessisset, quod præceptis
illius contemptis eius & altaria diruissent perfi-
di, & prophetas gladio occidissent, sic, vt ipse
solus relictus fuga salutem quæsisset, quē tamen
persequerentur, stare eum coram se in mōte ius-
sit. Ei tum signa quædam ostendit aduentus sui,
quibus perterritus operuit pallio faciem, egres-
susque stetit in speluncæ ostio. Eò ad illum vox
venit quærentis, quid ibi rei gereret. Cū idem
quod prius respondisset, iussit eum Damascum
proficisci, ibique Hazaelem regem Syriæ vnge-
re, et Iehu Namsi filium regē Israelis, Eliseum

autem filium Saphat pro se prophetam. Futurum enim esse postea, ut qui Hæzælis gladium effugisset, cum Iehu interficeret: qui Iehu, cum Elifæus morte mulctaret. Sed tamen reliquisse septem milia virorum in Israele, qui genua Baal non flexissent. Profectus inde, inuenit Elifæum arantem, iniecitque in eum pallio suo, cum ille rem intelligens, eum rogasset, ut pateretur primum se parentes osculari, ac tum denique se illum sequuturum promississet: ire eum, & redire iussit. Re perfecta Elifæus rediit, ac deinceps Eliæ ministravit. Achab vineam Nabuthi Iezraelitæ emere voluerat, quam cum ille venditurum se negasset, quod eam iure hereditario accepisset à maioribus suis, responsum hoc eius ita molestè tulit, ut præ iracundia & dolore abiens se in lectum proiiceret, nec caperet cibum. Iezabel regina, cognita causa doloris, hortata est virum, ut surgeret ac comederet, essetque bono animo: se enim ei Nabuthi vineam daturam. Itaque scripsit literas nomine Achab, eius annulo obsignatas, ad seniores & nobiles Iezraelitas, quibus eos hortabatur ad subornandos testes qui Nabuthum læsæ maiestatis accusarent, quæ condemnatum ipsi lapidibus obruerent. Subornant illi testes: accusant testes Nabuthum: cōdemnarum lapidibus obruunt: tū ad Iezabel eius mor-

tis certum nūcium mittūt. Illa cū rem Achab
 narrasset, ipse omni dolore liberatus, ibat ad vi-
 neam, cū Elias Dei iussu ei obuiā factus, gra-
 uiter eum obiurgauit, quòd occidisset, & præ-
 terea possedisset, ob eāque rem tam nefariam
 prædixit fore, vt illo ipso in loco, in quo canes
 lambendo hausissent Nabuthi sanguinem, eius
 etiam lamberent. Cū Achab, qui Eliam gra-
 tuito & sponte sua, atque adeò inimicitii im-
 pulsum hac dicere existimaret, ex illo quasiisset,
 num ipsum inimicum sibi aliquo loco expertus
 esset, ipse respondit, certè expertum esse, pro-
 pterea quòd vltro ac sponte scelus in Deum ad-
 misisset, qui ea de causa familiam eius eo modo
 deleturus esset, quo illam Hieroboam & Baasa
 deleuisset. His tandem minis adductus Achab,
 laceratis vestibus, cilicio se operuit, ieiunium
 seruauit, dormiuit in sacco, ambulauitque de-
 misso & abiecto capite, vt Deum iratum pla-
 caret. Quæ illius pœnitentia Deum impulit,
 vt Eliæ diceret, quòd ita se ille abiecisset, non
 eo viuo, sed mortuo, ac rege illius filio, ea mala
 quæ prædixisset, euentura esse. Achab autem
 mortuo, Ochozias eius filius, qui illi in regnum
 successit, ex cæcellis cœnaculi sui in Samaria ca-
 dens vulnus acceperat. Is dubitans, nū lethale
 vulnus esset, consulendum censuerat nō Deum,

sed Beelzebub, Vtrum ex morbo illo necne conualefceret. Itaque hoc eius factò offensus Deus, iussit Eliam ire obuiam legatis Ochozias, & quærere, primùm, an non Deus in Israele esset, quòd irent consultum Beelzebub Deum Accaron: deinde eis imperare, Vt domino suo renūciarent, illū ob eam causam nūquam è lecto surreturum esse incolumem, sed moriturum. Ochozias cū hac legatos renunciātes audiuisset, rogatūque illi quis vir esset, à quo hæc accepisset, hirsutum eum esse, & Zona pellicea accinctum renibus respondissent, intellexit ex habitu & ornatu esse Eliam. Itaque misit quinquaginta homines & præfectum illorum, qui eum accerferent. Legati Eliam hominem Dei appellātes, narrant se ab Ochozia rege Israelis ad eū missos, qui ei dicerent, illum ipsi præcipere, Vt ad se veniret. Elias audita legatione, respondit, Si ipse homo Dei esset, ignis è cælo delaberetur, qui eos omnes consumeret: quod statim accidit. Totidem iterum misit, qui cū iisdem verbis vsi essent, ipse iisdem etiam vsus, ignem de cælo deuocauit, quo eodem modo confecti sunt, quo superiores. Tercios pari numero misit, sed præfectus cum suis genu inflexo Eliam precatus est, Vt sui suorumque misereretur, ne idem sibi accideret, quod superioribus. Ipse angeli iussu, qui

Ut bono animo esset hortatus est, venit ad Ocho-
 ziam, cui cum eadem quæ primis legatis, dixis-
 set, paulò post excessit è vita. His tam præclaris
 & egregiis rebus gestis Elias, tandem non mor-
 tuus est, sed raptus in cælum, ut sit testis & præ-
 co secundi Christi aduentus. Raptus is cum illi
 à Deo patefactus esset, in via Eliseo, qui ei, ut
 dixi, ministrabat, imperauerat, ut ibi sederet,
 quòd se Deus Bethel mitteret: cum ille iureiu-
 rando affirmavit, se illum non esse relicturum.
 Itaque eum Bethel sequutus est. Ibi propheta-
 rum liberi Eliseum rogarunt, scirèt ne domi-
 num suum illo ipso die in cælum per turbinem
 elatum iri à Deo: quibus se id scire respondit,
 eosque ut tacerent, rogavit. Elias iterum illi ut
 ibi maneret, imperauerat, cum id se facturum
 eodem modo negavit. Ad Iordanem euntes unà
 sequuti sunt quinquaginta prophetarum liberi,
 sed hi procul stabant: illi ad Iordanem cum ve-
 nissent, Elias detractum pallium inuoluit, eoque
 percussit aquas, quibus diuisis in duas partes,
 ambo sicco vestigio Iordanem transierunt. Tra-
 iecto amne, Eliseum Elias monuit, ut quod
 vellet à se peteret, antè quàm ipsi eriperetur. Cũ
 Eliseus spiritum duplo maiore quàm in ipso es-
 set, postulasset: ipse rem eum difficilem petere
 dixit, quam tamen si ipsum, cum eriperetur, vi-
 deret,

deret, assequeretur: nō assequeretur antē, si non videret. Inde vnā iter facientes sermonē habebant, cū currus igneus, & equi ignei Eliam in cælum per turbīnē extulerunt, Elisæo spectāte & clamante, Pater mi, pater mi, currus Israel, & auriga eius. Cū iam eum non cerneret, pallium illius, quod ei ceciderat, arripuit: eoque vt magister fecerat, cū semel atque iterum percussisset, diuise sunt aquæ. Eliam Epiphanius scribit ex tribu Aaronis leuitam fuisse, & Sobac eius patri, cū illum mater peperit, ostensos esse viros candido habitu, qui eum salutabant, atque in igne fasciis inuoluebant, & flammam ignis ei comedendam dabant. Quod cū Hierosolymis ad Deum retulisset, ei rē sponsum esse, ne timeret. Pueri enim ignem fore domicilium, & orationem, sentētiam, eūque Israelem gladio & igne iudicaturum.

ELISSAEI PROPHETAE VITA.

ELISSAEVS Prophetæ, Saphat patre ex tribu Ruben, in vico Abelmeula natus est. Is clarissimus fuit & vir, & propheta, mirisq; ac inusitatis operibus insignis. Eius magnitudinis & præstatiæ futura omen index fuit, vt scribit Epiphanius.

Cùm enim in lucem editus est in Galgalis, bu-
 cula, quæ in Silo erat, tam clarè clamavit, ut
 Hierosolymis exaudita dicatur. Itaque sacerdos
 hinc dixit perspicuum esse, eo die natum esse
 prophetam, qui & sculpta simulachra deorum
 dirueret, & conflata frangeret. Illum Elias pe-
 nè puerum iussu Dei ab aratro ad ministerium
 & famulatum primò vocavit, deinde ad pro-
 phetia societatem: quod quemadmodum gestum
 sit, quoniam in Elia vita dixi, de eo dicendi ini-
 tium faciam ab eo tēpore, cùm ille, hoc spectan-
 te, in cælum elatus est. Elias quidem eum mo-
 nuerat, ut à se quod vellet peteret, antè quàm
 ipsi eriperetur. Elissæus autem postulauerat, ut
 duplum spiritum acciperet: cùm ille ipsum id
 quod difficile factu esset, petiuisse dixit: sed ta-
 men ita duntaxat illud eum cōsequuturum esse,
 si se in raptu cerneret. Eū, cùm efferretur in cœ-
 lum turbine in curru igneo et equis igneis, se vi-
 disse docuit clamans, Pater mi, pater mi, currus
 Israel, & auriga eius. Itaque, ut quod petierat,
 acciperet, Elia pallio, quod illi ascendentī ceci-
 derat, cùm Iordanem iterum trāsire vellet, pe-
 riculi faciundi causa, aquas, ut magister fece-
 rat, percussit: quæ cùm diuisæ non essent, clama-
 re cœpit, Vbi Deus Elia esset etiā tum: sed cùm
 iterum eas percussisset, diuisæ in partes duas, ei

facilem transitum præbuerunt. Quod cum prophetarum liberi qui Hierichonte erant, animaduvertissent, ex eo dixerunt, in illo Elise spiritum insidere. Itaque prodeunt ei obuiam, eumque cum se proiecissent humi, venerati sunt. Hinc ei narrant esse quinquaginta viros fortes cum eius seruis, qui ire possent & querere illius dominum, si forte cum spiritus in montem aliquem aut vallem detulisset. Cum vetaret, aut rogaret ne mitterent, non conquieuerunt illi, nisi expressa ab eo voce, quam mittendi ipsis fecit potestatem. Missi ab eis quinquaginta viri, cum re infecta rediissent tertio die, ipse cum hoc ab eis intellexisset, An non, inquit, vetui, ne mitteretis? Habitabat Hierichonte, quæ in vrbe aqua mortem afferebat iis qui bibissent, & præterea terra erat sterilis. Quod cum ei ciues sui significassent, aut potius apud eum conquesti essent: ipse vas nouum & salem ab eis poposcit, quo infuso, Deus aquas curasse dixit, ita ut nec mortem iam afferrent, nec in terra sterilitas inesset. Quod Hiericontini eius in se beneficium diu senserunt. Inde proficiscenti Bethel, pueri egressi ex vrbe ei illudebant his verbis, Ascende calue, ascende calue. Ipse eos animaduertens, illis malè precatus erat, cum vrsi duo ex saltu prodeuntes, duos & quadraginta vulnerauerunt. Quantum eius preces

apud Deum valerent, ex eo quod sequitur, facile intelligi poterit. Ioram rex Israelis Ochozias filius, Iosaphat regem Iudæ, & regem Edom ad bellum in Moabitas, qui mortuo rege Achab stipendium negabant, acciuerat. Cùm viam septem dierum cõfecissent, aqua exercitui & iumentis defuit. Ex Ioram, qui de Deo querebatur, cùm Eliffaum prophetam in proximo esse Iosaphat cognouisset, eundum ad illum censuit. Ipse primùm Ioram iussit ire consultum parentum suorum prophetas, deinde quærẽti cur Deus conuocasset tres reges, vt in Moabitarum potestatem venirent, respondit, nisi Iosaphat vereretur, eius se non habiturum fuisset rationem: postremò iussit psalter accedere, quo canente, afflatus Dei spiritu, iussit in aluco subiecto elices fieri, in quo sine vento, & pluuia, tantam vim aquæ erumpere viderunt, quanta satis esset & ipsis, & iumentis, & familiæ. Nec contentus fuit hoc beneficio, quod optabant: sed prædixit etiam eis futuram victoriam. Quanta autem in egentes liberalitate, aut misericordia potius, fuerit, sequens exemplum indicabit. Mulier quædam vxorum prophetarum ei exposuerat, virum suum qui timeret ac coleret Deum, mortuum esse, cuius creditor veniret, ipsi ereptum liberos ad seruitutem. Ipse misertus eius,

rogat quid domi haberet. Cum respondisset, nihil præter paululum olei quo se ungeret, illi suavit, ut vasa multa à vicinis omnibus utenda peteret, in quæ occlusis foribus sola cum liberis aliquid olei infunderet, quæ cum plena essent, auferret. Illa bonæ spei plena corrogat vasa, infundit in omnia olei non nihil: incredibile videretur, quod dicam, nisi diuinis literis mādātum esset: particula illæ olei ita creuerunt vi Dei Elissæi precibus, ut plena vasa statim mulier summa cum voluptate, nec minore cum admiratione viderit. Cum rē tam nouam & inauditam Elissæo narraisset, ipse iussit eam oleū vendere, & cum se ære alieno liberaisset, ex eo quod reliquum esset, sibi ac liberis suis parare ea quæ ad victum essent necessaria. Hæc quidem olei tanta accessio non tā Elissæi benignitatē, quā vim declarat. Quod autē sequitur, utrāque eius virtutem maiorem indicabit. Causa inciderat, ut Suna ciuitate aliō properans, transiret. Ibi mulier nobilis rogauit eum, ut ad se diuerteret. Ex eo tempore cum illac iter habebat, eō solitus erat diuertere. Mulier, quæ ex eius moribus, factis & sermone, magnum illum prophetam esse intelligeret, auctor fuit viro, ut cubiculum in superiore cōtignatione, omnibus rebus quæ peregrinis & viatoribus necessaria sunt,

ornaret. Cum viro persuasisset, paratis omnibus, ibi Elissæus diuersatus est, cum primū postea illac ei transcendendum fuit. Mulieris autem liberalitatem nouam considerās, ne ingratus videretur, accersendam illam per puerum curat. Cum venisset, puero negotium dedit, vt ab ea quæreret, quo officio tam prolixam ipsius liberalitatem remuneraret: num quod negotium ei esset, vellétque ipsum pro se agere cum rege, aut cum duce. Cum illa respondisset, habere se propinquos ibi, qui negotium, si quod haberet, curarent apud regem aut ducem: & à puero, qui hoc illi renunciasset, quæsisset, quid igitur à se expectaret, atque is respondisset, eam careere liberis, & senem esse eius virum: tum ei ante ostiū cubiculi dixit, illo ipso tempore, & illa ipsa hora, si viueret, parituram ipsam esse filium. Quod etsi illud se ab eo putaret, cōstituto tempore accidit. Adoleuerat iam puer, cum profectus ad patrem qui meßores inuiserat, sibi dolere caput dixit. Itaque pater eum ad matrem quàm primū reducendum curauit. Is cum inter matris genua paulò post animam efflasset, in cubiculo Elissæi collocatus est. Mater autem virum accersit, ei nunciat filij mortem, persuadétque vt puer aliquis secum in asina ad Elissæum excurrat. Sternitur asina, proficiscitur, venit ad Elissæum in

Carmelum montem. Ipse cum illā vidisset, puerum ei obuiam mittit, qui ex ipsa quæreretur, Valeretne ipsa, vir, & filius. Responderat, Valere, rectēque esse omnia, cum ipsa consensu mōte ad pedes illius se proiicit, muliebriter lamentans lugēsq̃ue filium. Ipse puero scipionē suum tradit, quem mortui faciei admoueat, ita tamen ut nec quenquam qui ei obuiam fieret, saluaret: nec cuiquam, qui ipsum saluaret, responderet. Iam ille cum hoc mandato abierat, cum mulier se ab eo discessuram negat. Ipse ergo eam sequitur, & puerum qui se nihil profecisse dicebat, offendit redeuntem in via. Ingressus domum in puerum se proiicit, ita tamen ut manus manibus, oculos oculis, os ori admoueret. Semel atque iterum hoc fecit, sed primū sensit carnē pueri recalescere, deinde cum huc atque illuc spacia fecisset, & incubuisset in puerum, oscitauit ille septies, & oculos aperuit. Tū denique accersita matre, ei puerum saluum & viuū reddidit. Illa ad eius pedes se proiciens, illum venerata est, egitque ipsi gratias. Fames terram oppresserat, prophetarūque filij apud illum habitabant, cum ipse puerorum suorū vni præcepit, ut in olla magna ad ignem pulterem illis coqueret. Alter inter herbas, colocyntidas ex vite agresti collectas in ollā infuderat, ignarus quid

in ea inefset. Cùm ex olla suum cuique effunderetur, omnes degustato iure, adeò amarum illud senserunt, ut illi mortem in olla esse diceret. Ipse farina infusa in ollam, iussit ex pulte omnibus apponi, nec iam amaror ullus apparuit. De olei accessione iam dixi. Nunc de panum accessione dicam, quod nō minus mirum videbitur. Vir quidā ex Baalsalisa panes primitiarum viginti hordeaceos ad eum attulerat, frumentumque nouū in pera sua: cùm ipse iussit apponi omnia. Minister nolebat, quòd diceret, nihil aut parum esse centum viris: cùm ipse rursus iussit apponi, confirmās, afflatus Dei Spiritu, illis cùm comedissent, superaturum aliquid. Itaque cùm comedissent, eis aliquid superfuit. Maximā eius vim atque munus declarantia opera adhuc exposui: Amnis aquas in partes duas diuisit: aquā nō ex cœlo deuocauit, sed ex terræ visceribus, cùm exercitus innumerabilium hominū cum iumentis siti enecaretur: oleum quod exiguum erat, ita auxit, ut nunquam postea defecerit: panes multiplicauit: denique mortuum puerum ab inferis excitauit. Nunc narrabo alia eius opera, quæ iuncta cum superioribus duplum Eliæ spiritum in eo fuisse indicabūt. Naaman præfectus dūxque erat exercitus regis Syriæ, domino suo valde charus, cùm ob egregiam bellicam virtutem

qua erat præditus, tum quòd eius siue opera, siue meritis Deus salutē Syriæ dedisset. Is cūm elephantia siue lepra inquinatus esset, rex Syriæ qui ex puella quæ à sicariis ex Israele abducta in Syriam uxori Naaman ministrabat, comperisset Naaman sermone, esse in Samaria prophetam, qui dominum ipsius curare posset, ei literas ad regem Israelis dedit, quibus scribebat, se ei Naaman seruum suum mittere, ac rogare eum, ut illum curaret. Naaman cūm decem talentis argenti, & sex milibus aureorum, decemq; vestibus, quæ mutandi causa paratæ confectæque erant, profectus, cūm literas reddidisset, rex Israelis illis perlectis, iracundia incitatus discidit vestē, cūm se à Syriæ rege irrideri, & occasiones ab illo captari dixisset, hoc ipso quòd ad ipsum leprosum curandum misisset, quasi verò esset Deus. Cūm rei illius fama sermone, ut fit, multorū ad Elissæum peruagata esset, ipse misit subito ad regem Israelis, illum obiurgans primū, quòd vestem lacerasset, deinde admonens, ut Naaman ad se mitteret, ut in Israele prophetā esse experiretur. Venit Naaman cum equis & curribus, ei que statim proforibus Elissæus misit puerum, qui iuberet illum ire ad Iordanem, ut aqua illius septies se ablueret, ac tum denique curaretur. Iratus ille, quòd Elissæus ad se non

descendisset, nec implorans Dei sui fidem, locum elephantia manu sua tractasset, & curasset, ut sperabat, re infecta discedebat, hoc etiam afferens, meliorem salubrioremque aquam esse Abana, et Pharphari, qui amnes Damascum alluerent: cum ei serui suire, quam Elissæus prescripisset, facilem esse demonstrant: qui si difficiliorem factum precepisset, tamen illam ei faciendam fuisse, nedum tam facilem. Naaman qui prophetæ verba contempserat, parens seruorum monitis, ex Elissæi prescripto cum septies se ablisset, planè curatus est. Ille autem qui plurimum se prophetæ debere tanto accepto beneficio existimaret, rediit ad eum cum vniuerso comitatu suo, primòque non esse alium Deum, nisi Deum Israelis scire se dixit, deinde eum rogauit, ut munera acciperet. Ipse cum accepturum se pernegasset, illum dimisit. Giezi verò Elissæi puer, qui respuì à domino suo munera vidiſſet, clam comitatum sequutus, cum aſequutus fuiſſet, se à Domino miſſum eſſe dixit, petitum à Naaman talentum vnum, & vestes duplices. Naaman non vnum modò, sed alterum etià talentum dedit, quòd illum vera dicere putaret. Hoc Giezi scelus nò fugit Elissæum. Cum enim sibi illo infcio Giezi omnia quæ acceperat, retinere poſſe ſperaret, accerſitus ab eo cum interro-

garetur, unde veniret, negaretque ille se ququam profectum esse: ipse presentem se fuisse dixit, cum vir ex curru illi obuiam prodisset. Hoc autem sciret, à se, qui argentum & vestes accepisset emēdis vinetis & oliuetis aliisque rebus, atque à posteris suis, Naaman ipsius lepram nunquam abfuturam. Quæ cum perorasset, in illo lepra niuis instar sequuta est. Filij prophetarum cum angustè se habitare cum eo apud illum questi essent, ob eamque causam ad Iordanem sibi eundum materia cadendæ causa censuissēt, ipse idem sibi placere dixit, & vnus rogatu eò se contulit. Ibi accidit, vt vni.casa materia ferrum securis elapsum è manibus in amnem caderet. Is cum rem Elissæo cū lachrymis exposuisset, ipse loco indicato, præcisum lignum eò demerferat, cum ferrum contra naturam è profundo sursum nauit, quod is qui amiserat saluum & integrum eius monitu porrecta manu recepit. Mirabile hoc factum est, sed mirabilius id quod sequitur, videbitur. Rex Syriæ bellum gerebat cum rege Israelis. Is adhibitis suis in consilium, exposuerat se velle certo in loco in insidiis ex suis locare, vt eius rei ignari Israelitæ in eos imprudentes inciderent. Quod antè quàm de sententia cōnium factum esset, Elissæus rem præcognitam, spiritus Dei enunciatione, regi

Israelis indicauit. Rex Israelis statim eò suos misit, quod cùm rex Syriæ rescuiisset, quærere cum furore cœperat, cur nemo ipsi patefaceret, quisnam regi Israelis vt proditor cōsilia sua aperiret: cùm vnus respondit, Elissæum esse prophetam in Israele, qui regi Israelis omnia quæ in intimis adibus diceret, ac statueret, enuncieret. Iracundia incitatus ille, aut furis agitatus potius, suis negotium dat, vt diligenter videāt, vbi sit, ac sibi renuncient, vt eum capiat. Illi comperiunt eum esse Dothaim: quod cùm regi renunciaissent, misit illuc equos, & currus, ac robur exercitus. Eò cùm noctu peruenissent, iam obsederant urbem, cùm puer Elissæi prima luce egressus, illis animaduersis, domino trepidans cucurrit nunciatum. Ipse puerum, sine metu, quòd plures cum ipsis, quàm cum illis essent, esse iubens: precatus erat Deum, vt pueri oculos apperiret, ac videret: cùm ille circum dominum montem plenū equorū & curruum igneorum aspexit. Hostes verò cùm ad illum venissent, Deum, vt cæcos illos aut cæcutientes efficeret, rogauit. Quo impetrato, illis dixit nō esse viam ad urbem quam quærerēt ferētem: itaque se sequerentur, qui ipsos ad virum duceret. Cæcutientes illi eum sequuntur: ipse autem eos in Samariam duxit. Quo in loco maxima eius in

illos misericordia & clementia eluxit. Cùm enim rex Israelis ab eo quæreret, num illos interficeret, non modò non est passus, quòd non essent vi & gladio capti, verũ etiam eis præberi iussit omnia quæ ad victum pertinebant, satiatòsque dimisit. His ita gestis, nec ita multò pòst, Benadab rex Syriæ cõparato ingenti exercitu Samariam obsidebat, eamque ad eum finem obseffit, vt iis quæ ad victũ necessaria sunt, consumptis, tãta annonæ caritas extiterit, vt caput asini octoginta argenteis venderetur. In hac tãta annonæ caritate mulieres duæ fame coactæ, ex pacto cõstituerant vicissim comedere liberos suos. Earũ altera cùm suum edendum præbuisset, nec socia staret cõuentis, sed suũ postridie abdidisset, fame cõfecta cum clamore & lachrymis regem Israelis rogare cœperat, vt se liberaret, ac vitæ suæ consultum vellet, narrata illi historia hac de liberis, cùm ille discissa veste in cõspectu omniũ diris se deuouit, si eo die Elissæus viueret. Huius tam nefarij cõsiliũ sui ministrum iã miserat, cùm antiquã domũ Elissæi venisset, ipse senibus qui cum eo considebant illud regis consiliũ enunciauit, imperauitque vt nuncio ostium nõ aperirèt, quòd sonitus pedũ domini sui eũ sequeretur. Nòdum finem dicèdi fecerat, cùm venientem nunciũ rex anteuertit, qui cùm hoc tantũ dixisset

set, cladem & calamitatem illā profectam esse à Deo, à quo quid præterea expectaret, non haberet: idem iussu Dei prædixit, illa ipsa hora in porta Samariæ modium simile vno statère, & duos hordei statère vno venditum iri postridie. Res illa tam incredibilis visa erat cuidam duci, cuius manui rex ininitebatur, vt negaret id fieri posse, etiam si Deus cœlum aperiret: cùm idem ei confirmavit, fore vt rem ipsam videret, nec vesceretur. Quatuor tũ leprosi fame coacti, vt statuerant, se in castra hostium in tā certo mortis discrimine recipiētes, cùm ad principium castrorum venissent, inuenerunt neminem. Fecerat enim Deus, vt hostes audire viderentur fragorem sonumque & curruum, & equorum, & ingentis exercitus, quo exaudito relictis impedimentis fugerāt. Leprosi autem cùm hac in vrbe narraissent, primũ stratagema rex esse interpretatus est, deinde missis duobus equis ex sex qui soli reliqui erant, cùm ita esse comperisset speculatores, populus omnis eò ad prædā venit, direptisq; castris ea annonæ vilitas sequuta est, quam Elissæus prædixerat: tũque dux ille cuius supra mentionem feci, quem in porta rex collocauerat, à turba obtritus est. Idem mulieri, cuius filium, vt supra demonstratum est, excitauit, cùm famem septem annorum prædixisset, sua-

serat, ut cum familia, eius vitanda causa, aliò
se reciperet. Ea sequuta illius consilium, trans-
actis illis septem annis, cum rediisset, inuenisset-
que domum suam occupatam & agros, regem
rogare cœpit, ut sibi per ipsius aequitatē sua re-
cipere liceret. Opportunè tum Ioram rex iube-
bat Giezi Eliffæi puerum narrare magna &
inuitata opera, quæ dominus ipsius edidisset. Nā
præter alia quæ illi exposuit, mulierem illam ef-
se dixit, cuius filium qui aderat, excitasset. Ita-
que interrogata ipsa, cum ita esse confirmasset,
spadoni rex ut illi nō solum res suas omnes, ve-
rū etiam fructus redderet, imperauit. Nec du-
bium est, quin mulier & famis incommoda vi-
tarit, & sua receperit Eliffæi benignitate. Ae-
grotante Benadab rege Syria Damascum ve-
nerat, cuius aduentus cum rex factus esset cer-
tior, misit ad eum Hazaelem, qui apud eum in-
primis erat, cum muneribus consultum, num ex
eo morbo conualesceret. Ipse responderat illum
quidem conualiturum esse, sed sibi enunciatum
esse à Deo illum propediem esse moriturum: cum
stante illo in eius conspectu, flere cœpit. Qua-
renti autem Hazaeli cur fleret, respondit, quòd
cum Syria rex esset, Israelitas affligeret. Itaque
postridie quàm Benadab domino salutem nun-
ciauerat, eo suffocato, regnum occupauit, atque

paulò post Israelitas sexcentis cladibus oppressit.
 Idem Iehu, qui familiam Achab, cum Iezabel
 eius vxore deleret, quemadmodum Elias præ-
 dixerat, regem Israelis vngendum curauit hoc
 modo. Filium prophetarum vnum, accersitum
 iussit lëticula olei plena sumpta, Ramothgalaad
 proficisci, ibique Iehu cùm inuenisset, remotis
 arbitris in interiore cubiculo, oleo Dei iussu con-
 secrare, vt familiam vniuersam Achab rex
 postea cum Iezabel prorsus deleret. Ille præce-
 pto Elissæi cùm paruisset, Iehu rex ea omnia fe-
 cit, quæ Elissæus Dei iussu præscripserat. His
 tam præclaris nouisque & inauditis rebus gestis
 in morbum incidit, quo mortuus est. Cùm agro-
 taret, Ioas rex Israelis eum inuisit, cognitaque
 vi morbi coram eo flebat cum his verbis, Pater
 mi, pater mi, currus Israel & auriga eius. Ip-
 se regi præcepit primùm, vt arcum & sagittas
 afferret, deinde illis allatis, vt intento arcui ma-
 num admoueret, postremò manibus suis illius ma-
 nu admotis, vt fenestra quæ ad orientem solem
 spectabat aperta iacularetur. Quod cùm ille fe-
 cisset sagittam illam salutis Domini esse dixit,
 sagittamque salutarem contra Syriam, quam
 vsque ad interitum in Aphec percussurus esset.
 Iterum sumpta sagitta ei præceperat, vt terram
 feriret. Rex autem cùm tertio terram percuf-
 sisset,

sisset, destiterat, cùm ipse iratus ei prædixit, si quinquies, sexies, aut septies percussisset, futurum fuisse, ut usque ad internecionem deleret Syriam. Sed quoniam ter tantum terram percussisset, illum ter solum eam percussurum esse. Eum Epiphanius in Samariæ vrbe Sebastopoli sepultum esse scribit. Qui autem cùm in vita manebat, mortuū, ut exposui, excitauerat, is mortuus mortuum excitauit. Nam cùm nonnulli mortuum hominem sepelire vellent, metu sicariorū qui illuc anno ipso, quo ipse mortuus erat, ex regno Moabitano irruerant, in sepulchrum Elissæi cadauer proiecerant, quod cùm eius ossa attigisset, reuixit homo, & se erexit in pedes. Ex quo facile intelligi potest, multo magis, cùm ita Deo visum est, excitari posse, ut iam excitati sunt, homines, cùm mortuorū sanctorum hominum, qui cū Deo regnant, ossa attingunt, præsertim cùm Elissæus, cuius animus erat apud inferos, tamen hoc à Deo impetrauerit. Mortuus est autem xviij. Calend. Iulij, ut scribit Osualdus.

A M O S P R O P H E T A.

AMOS Propheta, Thecuita, ut ipse ait, fuit, & pater Esaia propheta, Epiphaniij sententia, etsi Hebræi negent propter literarū dif-

similitudinem . Is ex pastore Vates factus est, & à gregibus ouium ad gregem siue Israelis, siue Iudæ, pascendum ac docendum, à Deo vocatus atque delectus . Vaticinandi autem munere functus est, Ozia, siue Azaria Iudæ, & Hieroboam Israelis regibus, id est, cum Sardapalus Assyriis, atque Procas Syluius Latinis regia potestate præerant . Quoto anno Azaria, qui præfuit regali potestate in Iuda annis duobus & quinquaginta, vaticinari cœperit, & ad quotum Hieroboam, qui vñ & quadraginta, peruenerit eius vaticinandi munus, inuenire non potui . Hoc autem certum habeo, quod dicam, cum Ozias vicesimo septimo Hieroboam regis Israelis anno Amazia patri in regnum successerit, & Amos ipse dicat se Ozia & Hieroboam regibus prophetiæ munus executum esse, intra duos reliquos Hieroboam annos explese munus suum, præsertim cum Amasia sacerdotis filius eum, ut mox docebo, interfecerit . Hoc verò præponere volui, ut omnes intelligant, me non sine causa, Amos huius vitam ante vitas Esaia, Osee, Zacharia, & aliorum qui Achaz rege Iudæ vaticinati sunt, scribere voluisse, cum ordinem temporum, quibus quisque vixerit, sequi instituerim . Quoniam igitur intra reliquos duos Hieroboam regis Israelis annos, id est, vicesi-

mum octauum & nonū, expleuit Amos suum
 vaticinandi munus: altero illorum cū Israelis
 excidium, & vt ita dicam, captiuitatem, præ-
 diceret iussu Dei in Samaria, cum apud regem
 Hieroboam accusauit Amasias sacerdos deorū
 in Bethel, per nuncios. Misit enim qui ei nun-
 ciarent, Amos studere rebus nouis, illique ad-
 uersari & rebellare palam, nec quenquam eius
 verba ferre posse. Hæc enim illum palam &
 publicè dicere, Hieroboam moriturum esse gla-
 dio, captiuūque abductum iri Israelem. Quid
 ad hæc, quæ in libro Amos scripta sunt, Hiero-
 boam responderit, quò ve in Amos animo ob ea
 fuerit, non est mandatū diuinis literis, nec apud
 ullum scriptorem legi. Hoc autem scriptum est
 in libro, quo Amos prophetia explicatur, Ama-
 sias sacerdotem, cū misisset, qui hæc Hiero-
 boam nunciarent, aggressum Amos, ei præce-
 pisse cum minis, vt ipse qui propheta esset, è Sa-
 maria egrederetur, atque in Iudā fugeret, ibique
 vaticinaretur, nec iam in Bethel quicquam vt
 vates prædiceret, quippe cū ibi & vitulus au-
 reus instituto maiorum coleretur, & regia esset
 collocata. Ad hæc respondit Amos se cū pro-
 pheta non esset, neque prophetæ filius, sed ar-
 mentarius, qui sycomoros excuteret, vocatum
 esse à Deo, qui sibi imperasset, vt Israeli populo

suos res futuras ut vates prædiceret. Itaque verba Dei audiret, qui, quod ille vetaret ne res futuras prædiceret Israeli, familiæque deos colenti, ei nunciaret uxorem suam in urbe stupro contaminatum iri, liberumque gladio perituros, terram quam possideret, hostes inter se diuisuros, ipsum verò in regione inquinata esse moriturum, & è terra sua captivum abductum iri Israellem. Ne hoc quidem scriptum inveni, quid ad hæc responderit Amasias sacerdos. Illud autem Epiphanius scribit, illius filium, fuste percussis Amos temporibus, eum interfecisse, quod conuicisset ipsum insidiis abstulisse buculas duas aureas: & inde in patriam perlatum adhuc spirantem, ibi mortuum esse, ac sepultum cum maioribus suis. Osualdus qui Carolo Magno imperatore scripsit librum qui Martyrologium inscriptus est, eum ab Ozia rege Israelis, pridie Calendas Aprilis per tempora vecte transfixum, seminecem in patriam vectum, ibique sepultum esse narrat.

ABDIAS PROPHETA.

ABDIAS propheta Sichemitanus erat, ex agro Beththacha marino, ut Epiphanius scribit. Idem memoria prodidit, illum esse ter-


tium præfectum quinquaginta , qui ad Eliam missus est ab Ochozia rege Israelis . Nam cùm Ochozias per cancellos cecidisset , atque eo casu in morbum incidisset , ignarus num ex illo morbo conualiturus esset , miserat legatos consultum Beelzebud deũ Accaron de morbo , cùm Deus Eliam misit qui eis , antequam eò venirent , præciperet , vt redirent ad dominum suum nunciatum , quòd ipse consultum illum Deum misisset , quasi nõ esset Deus in Israele , cum è lecto nunquam saluum & incolumem surrecturum esse . Quod cùm illi nunciassent , isque ex habitu & ornatu intellexisset Eliam esse qui hæc præcepisset , semel atque iterum quinquagenariũ præfectum cum suis misit , qui Eliam ad se accerferent : qui cùm de cœlo tacti mortui esset , tertium quinquagenarium ducẽ cum quinquaginta misit , qui cum suppliciter Eliam rogasset , vt sui ac suorũ miseretur , ignovit . Atque hic tertius , vt Epiphanius confirmat , fuit Abdias hic , cuius vitam scribimus . Eundem scribit postea deserto ordine , in quo cum rex collocauerat , sequutum esse Eliam , eiũque fuisse discipulum , & multa perpesum , seruatum esse illius nomine . Hieronymus autem scribit , hũc ipsum esse illum Abdiam Hebræorum sententia , qui Achab rege Samariæ , pavit in specubus centum prophe-

tas. Quod cuiusmodi sit, ut intelligatur, libet rem altius repetere. Elias iussu Dei Achab regi Samariæ prædixerat fore, ut intra triennium & sex menses pluuia ex cælo in terram non effunderetur. Paulo post iussu Dei, primum ad torrentem Carith se contulit, & inde in urbem Sidoniorum Sareptam, ne ab Achab interimeretur. Tertio anno misit eum ad Achab Deus, ut terræ pluuiam daret. Ex siccitate autem sequuta erat tum fames tanta, ut tandem Achab qui Eliam causam tanti mali crederet, coactus sit diuisis regionibus imperij sui, Abdiæque præfecto pratorio certa via attributa, ipse alia quæreret fontem, ne equi, & muli, ac iumenta siti interirent. Ita autem accidit Dei prouidentia, ut Abdiæ in via obuiam fieret Elias, quo animaduerso, & cognito, in faciem suam pronus Abdias cadens, rogauit eum, an non Elias esset. Elias autem cum se esse dixisset, ei que præcepisset, ut iret nunciatum domino, adesse Eliam, quasiuit ab eo, quid sceleris admisisset, ut se seruū suum certa morte mulctandum Achab traderet, cum nulla esset gens, nulla natio, nullumq; imperium, quò ille non misisset, qui eum quæreret, ubi cum omnes respōdissent, ipsum abesse, illū eos omnes, ut ita dicam, adiurasse: & tamen eum se mittere nunciatum ipsum adesse, quem cum spiritus

Dei quòd vellet transtulisset, nec inuentus esset diu multumque requisitus, ipse ab Achab interficeretur. An nò fama aut sermone aliquorum ad ipsum perlatum esset, cum Iezabel regina prophetas interficeret, centum à se prophetas quinquagenos in specubus abditos, pane & aqua refectos esse? Is tamen cum nihilo minus præciperet, ut regi se adesse nunciaret, paruit. Achab autem non eo animo quo debuit, obuiam Eliæ, cum illum adesse ex Abdia cognouisset, prodiit. Nam primo congressu, ab eo querere cœpit, an non Elias esset, qui res Israelis perturbaret: quod cum non solum negaret, sed cōtrā, illum eum esse confirmaret, qui neglectis Dei præceptis, Baalim coleret, cum tota familia & maioribus, præceperat ut ad se in Carmelum montem Israelitas omnes, prophetasque dei Baal conuocaret: quòd cum conuenisset, ea sequuta sunt omnia, quæ & nota sunt, et à nobis in Eliæ vita explicata pluribus. Ergo, ut ad propositum reuertamur, Hieronymus ex Hebræorum sententia hunc esse Abdiam existimat: neque hunc solum, sed quinquagenarium etiam, de quo diximus: ut unum eundemque esse arbitremur. Ait enim principio commentariorum, quibus Abdiæ huius librum illustrauit & explicauit, Abdiā quòd pauperat centum prophetas, & munus vaticinandi accepisse,

Ex duce exercitus factum esse Ecclesiæ ducem. Propheta hic, si scriptum sequamur, Idumææ euersionem, Iudææque restitutionem prædicit: Si sententiâ spectemus, Gentium euersionem, Christi que Ecclesiæ per Apostolos ædificationem. Brevis est ille quidem verborum copia & multitudo, sed longus pondere sententiarum. In patria sua mortuus & tumulatus est. Quamquam sepulchrum eius cum Mausoleo Elifsei prophetae ac Ioannis Baptistæ in Vrbe Sebastæ, quæ olim Samaria diceretur, in honore ac veneratione haberi, scribit Hieronymus.

OSEE PROPHETA.

 SEE primum omnium prophetarum putat Hieronymus. Is Beerî patre natus est, prophetiæque munere functus Hieroboam Ioas filij regis Israelis, atque Ozîæ, Ioatham, Achaz & Ezechîæ Iudæ regibus. Ex quo longissima eius vita intelligi potest. Nam cum Hieroboam nouem & viginti annis regali potestate præfuerit, Ozias quinquaginta duobus, Ioatham sedecim, totidē Achaz, & Ezechias viginti nouē, etsi quoto anno Hieroboam cœperit, quotoque Ezechîæ desierit vaticinari,

certum aliquid tradere non possum, tamen hoc intelligi arbitror, eū quatuor & octoginta annis, & eo amplius esse vaticinatum: ad quos si addamus eos quos natus erat, cū res futuras prædicere cœpit, & eos quibus vixit Ezechia rege, & quoad mortuus est, quos ignoramus, diuturnam illum vitam egisse fatebimur. Hic Osée iussu Dei Gomer scortū in matrimonium accepit, ex qua tres suscepit liberos, quibus imposuit etiā illius iussu nomina, primigenio Hierazelis: filiæ, vacantis misericordia, siue destituta: tertio, non populi mei. Hieronymus, qui reuera hoc gestum esse existimat, negat id vitio vertendum Osée, sed potius laudi esse tribuendum, quod ex mala bonam fecerit, nec libidinis causa cum illa matrimonium inierit, sed iussu Dei. Quod autē iussu Dei fit, cum vitio coniungi non potest. Nec verò hoc Deus sine causa fieri voluit, sed vt significaret, quod ei vt prædiceret imperavit, regni Israelis, id est, decem tribuum, quæ deos peregrinos, auctore Hieroboam eiúsque posteris, coluissent, euerfionem eiusmodi, vt nec misericordia Deus in illas commoueretur, nec populum suum eas duceret, aut vocaret. Atque hæc ipsa quæ reuera euenerunt, detestationem significant Iudæorum: vt altera mulier, quam idem propheta iussu Dei ama-

uit, Gentium vocationem. Atque in his fere
duobus tota Osee prophetia consumitur.

IONAS PROPHETA.

IONAS propheta Amathi filius,
Sareptanus Sidonius. Epipha-
nius enim, & Hieronymus, at-
que adeò Hebræi, ut hic ait, eū
Sareptanæ viduæ filium, quem
Elias excitavit, volunt esse. Quod quemadmo-
dum acciderit, etsi alio à nobis dictū est, tamen
hoc loco, ut proprio, nō alienum erit exponere.
Elias quidē cum famem, quæ trium annorū &
mensium sex fuit, Achab regi Israelis prædixis-
set, iussu Dei, conspectū Achab fugit, primū-
que ad Iordanem in torrente Carith habitavit,
quoad torrens exiccatus est: deinde Sareptā Si-
doniorum Urbem se recepit. Ad Urbis portam
cū venisset, viduam, ut Deus prædixerat, of-
fendit ligna colligentem. Illa, Elia iussu cū
lenticula, in qua aliquid olei inerat, & hydriam
in qua aliquid farinæ, attulisset: etsi utrunque
sibi ac puero parare dixisset, ut cū comedisset,
morerentur: tamen oleum illud eius precibus ita
crevit, ut postea nulla eius facta sit decessio.
Hoc tam nouo inauditoque Elia opere adducta

est illa vidua, ut cum filius ipsius ex morbo, nec
ita multò post, moreretur, conquestum ad eum
venerit de morte pueri, quasi illius causa esset
eius aduentus. Elias qui & mortem pueri gra-
uiter ferret, & matris luētū ac lachrymas, cum
in cœnaculum eum portasset, in lectulo tertio
se in ipso extendens, precibus ab inferis excita-
uit, matrique vinum reddidit. Hic excitatus
puer cum adoleuisset, ei Deus præcepit, ut Ni-
niuem Assyriorum urbem maximā, veritatis
nunciandæ prædicandæque causa, proficiscere-
tur: diuinòque præcepto non parens, ut Ioppen
Iudææ portum venit, ibi nauem soluentem in
Tharsis inuenit, datòque naulo, conscensa naue,
cum cæteris in Tharsis nauigauit. In mari au-
tem ventus ingens statim Dei permissu coortus
est, tempestasque tanta, ut naus in maximo
versaretur discrimine. Hinc cæteri timore per-
territi, suum quisque Deum precabantur, iacie-
bantque vasa in mare, quo leuior onere sublato
naus esset: ipse autem in carina dormiebat. Ita-
que gubernator, qui illum, cæteris metuentibus,
atque deos suos implorantibus, tamen in tam cer-
to periculo dormientem hoc negligere existima-
ret, eum excitauit, iussitque precari, exem-
plo aliorum, Deum suum. Interea inter omnes
conuenit, eisque placuit, sortibus videndum,

cur malum illud accidisset, eaque sors ei obtigit. Hinc cum rogant ut exponat, cuius causa & culpa malum eiusmodi omnibus accidisset: quærentque, unde veniat, quo eat, cuius sit, & quam artem exerceat. Ipse Hebræum se esse dixerat, Deumque cæli timere ac colere, qui mare terramque fecerit, seque eius conspectum fugere, cum illi timore magno perterriti, ab eo quærere coeperunt, cur hoc mali fecisset, quidque ipsi facerent, ut periculo illo liberarentur. Cum dixisset, malum illud causa culpæque sua accidisse, itaque si se in mare deiecissent, fore ut secundo vento tranquilloque mari vterentur: cum in mare proiciunt, rogantes Deum, ne hoc sibi noxæ esse vellet. Iacturam eius, id quod mirabile videbitur, sequuta est incredibilis maris tranquillitas: quod cum illi animaduertissent, immolatis hostiis Deo, quem ex hoc facto vehementer metuerant, vota ei nuncupauerunt. Deus autem Ionam seruum suum non neglexit aut deseruit, sed ingentem piscem parauit, qui illum excipiens deuorauit, non tamen consumpsit, sed integrum ad tertium usque diem custodiuit in aluo, quo ex ea saluum & incolumem in terram euomuit. Ex piscis verò ventre sentiens tam magnum in se Dei beneficium, ei gratias egit, enumeratis periculis à quibus ipsum liberasset. Cum

ab eo periculo liberatus esset, Deus ei iterum præcepit, ut Niniuem magnam urbem iret, in qua ea quæ præscriberet, nunciaret ciuibus. Ibi cum diei unius iter confecisset, hoc palam ac publice denunciavit omnibus, intra quadragesimum diem euersum iri ciuitatem. Niniuitæ non neglexerunt aut contempserunt Ionæ, id est, hominis peregrini ac exteri, & abiectioni, quem nunquam viderant, orationem, sed ea approbata, ieiunium publice denūciauerunt, amictosque saccis & cilicio pœnituit flagitiorum vitæ superioris. Nec verò hæc vitæ mutatio priuatorum hominum tantum fuit, sed magistratuum ac principum omnium. Cum enim, ut fit, sermone multorum & fama, illa eius de urbis eersione ad regem perlata esset prædictio, non aliis ac suis, ut alij solent, præscripta & edicta pœnitentiæ forma & ratione, ipse pro more in deliciis ac voluptatibus vitam egit, sed solij oblitus, abiectioni & se & ornatu regio, amictus est primum sacco, seditque in cinere, deinde edicto cavit, ne non solum viri ac mulieres, sed ne pueri quidem, nec pueri solum, verum etiam bestię, quæ sunt expertes rationis natura sua, quicquam cibi & pabuli caperent, & biberent, sed saccis ac ciliciis amicti homines rogarent Deum, omnesque vitæ sceleratæ viam mutaret. Neminem enim scire, num

Deus placatus velit ignoscere. Hoc loco Niniuitarum prudentiam in mutanda vita laudare & augere possem multis rationibus, nisi vitam Iona scriberem, id est, nudam rei ut gesta est expositione explicarem. Regem autem illa sua de Deo opinio non fefellit. Nam cum illos omnes edicto regis abstractos à facinorosa viuendi via vidit, eorum misertus est, nec urbem, sicuti constituerat, euerit. Quæ quidem Dei misericordia maximum Iona dolore attulit, vel ne apud Ninivitas mentitus videretur, quod absolute intra quadraginta dies Ninivem eversum iri nuntiaret, vel quod intelligeret populum Israeliticum esse periturum. Itaque Deum rogavit, ut se à vita iuberet discedere, quod mori mallet, quam illud evenire, etiamsi illum sciret summa esse clementia præditum. Rogatus à Deo, iustumne putaret dolorem suum esse, egressus est ex urbe, paratq; sibi loco ad umbram qui orientem spectabat, ex quo quid urbi eveniret, tuto spectaret, hederam Deus, quæ illi umbram faceret excitauerat, cuius ex aspectu incredibilem animo coepit voluptatem. Sed cum idem vermem postridie prima luce excitasset, qui paulatim ascendens, hederam ita derosit, ut Solus calorem ipse sentiens, mortem optaret, eumque rogasset, num rectè ob hederam derosam irasceretur, atq;

illereſpondiſſet, dolorem ſuum ſpectare ad mortem: tum ea dixit illi, quibus maximam miſericordiam ſuam in genus hominum vel apertiſſimè declarauit. Quæſiuit enim, aquum ne eſſet illum, hederæ interitum moleſtè ferre, quam nec ſeuſſet, nec feciſſet vt creſceret, ipſum autem Vrbi illi non ignoſcere, in qua eſſet amplius centum viginti millia hominũ, qui non poſſent bonum à malo internoſcere. Quid adhæc Ionaſ reſponderit, aut quid poſteà egerit, non eſt memoriæ proditum. Quanquam Epiphanius ſcribit eum poſteà in patriam rediiſſe, quam ſibi iam incolendam non putauit, ne ciues ſui ſibi obiiicerent falſam ſuam de Niniue eſſe prædictionem. Itaque cum matre Suram proſectũ in Saar habitafſe, ibique mortuum eſſe, ac ſepultum in ſpecu Cenezei Iudicis.

IAHAZIEL PROPHETA.

IAHAZIELEM prophetam vaticinationis munere ſemel tantum functum eſſe reperio, idque apud Ioſophat regem Iudæ, hoc modo. Ammonitæ & Moabitæ, conuocato ingenti exercitu, cum Ioſaphat rege Iudæ gerere bellum decreuerant. Quod cùm ex nunciis accepiſſet, hoſtèſque iam in imperij ſui fines irrupiſſe, diffi-

sus sibi ac viribus suis totum, se cōtulit ad Deū,
 cūmq; rogauit, vt ipse qui nationes omnes su-
 perioribus tēporibus victas ex illis terris expul-
 lisset, vt in eis populum suum, quemadmodum
 Abrahæ promississet, incolas constitueret, se ac
 suos in dubiis rebus audiret. Ammonitas &
 Moabitas venire in se infesto exercitu, ingratos
 nec memores beneficij liberationis, cū eius ius-
 su ex AEGypto profecti maiores, duce Mose,
 ceteris populis deletis, his duobus pepercissent.
 Scire se non posse tantæ multitudini obistere,
 nisi ipse qui posset omnia, et ad quē confugeret,
 ferret auxilium. Nec verò rex solus Deum pre-
 cabatur, verū etiā Iudæi omnes cū vxoribus
 ac liberis suis. Erat in his Iahaziel hic, Zacha-
 riæ filius Leuita, qui longo ordine ab Asaph,
 quē Dauid cātorem habuerat, oriūduS erat. Is
 permotus Dei spiritu, ex media turba, Iosaphat
 & ceteris Dei iussu prædixit ac denūciauit, ne
 tantam multitudinem timerent, neque enim eo-
 rum esse pugnam, sed Dei, qui postridie hostes
 funderet ac fugaret. Hoc ipsum postero die ac-
 cidit, non vt quiuis existimauerit: Neque enim
 Iosaphat eiūsq; exercitus pugnas hostes vicit,
 sed se ipsi mutuis vulneribus deleuerunt. Quod
 cū Iudæi animaduertissent, tantum prædæ in-
 uenerunt, vt ne tertio quidem die eam portare
 potuerint.

potuerint. *Hinc ouantes, Hierosolyma cum lyris
ac tympanis laudantes Deum reuersi sunt.*

ELIEZER PROPHETA.

ELIEZER propheta, Dodan Ma-
resani filius, hunc etiam semel
solum prophetiæ munus, atque id
apud eundem regem, id est, Io-
saphat, obuisse inuenio. Nā cum
rex ille cum Ochozia impio rege Israelis iniis-
set inimicitias, participsque fuisset cum eo con-
siliij de ædificanda classe, quæ in Tharses profici-
sceretur, ea diuinitus fracta in mari, Eliezer hic
à Deo missus est, qui ei nunciaret, quod fœdus
cū Ochozia fecisset, Dei nutu classem fractam
esse in mari, nec potuisse in Tharses peruenire.

ESAIAH PROPHETAE VITA.

ESAIAS propheta, Amos
patre natus est, propheta
cuius prophetia extat, ut
placet Epiphanio, vel altero
propter dissimilitudinem li-
terarum, Hieronymi senten-
tia. Is vaticinandi munere functus est, Ozia,

Ioatham, Achaz, & Ezechia Iudæ regibus, eiusque prophetia siue prædictio ad Iudam & Hierosolymā maximè pertinet. Quid unoquoque rege prædixerit, incertum est, nisi Achaz & Ezechia ad quos, ut mox dicam, missus est. Quanquā hoc intelligere possumus, cū illa quæ à principio libri differit, ad eum locum, in quo Achaz regis mentionē facit, prædixisse, Ozia & Ioatham regibus: & quæ sequuntur, ad eum locum, in quo de Ezechia loquitur, Achaz rege: & inde usque ad librum extremum, Ezechia rege. Ad Achaz quidem missus est, hac occasione. Rasin rex Syria, ac Phacee Romeliæ filius rex Israelis, coniunctis copiis & viribus Hierosolymam oppugnantes, capere nō potuerant. Hoc enim Achaz magno timore perterritus Esaiam Deus iussit prædicere, antè quàm exercitum eduxissent, Phacee regem Israelis societatem fecisse cum Rasin rege Syria, quo facilius regno Iudæ occupato, illū expellerent ipsi, ac filium Tabel pro eo regem constituerent: sed ne timeret, neque enim ita euēturum esse, ut illi cogitauerant. Illi etiam iussu Dei præcepit, ut signum à Deo peteret siue in cœlo, siue apud inferos. Cūque ille petiturum se, ac tentaturum Deum negaret, non quòd se submissè gereret, sed quòd colens deos peregrinos, Deo non crede-

ret, & tamen id dissimularet: Esaias illum, atque eos qui ipsi parebant, obiurgans, quòd non solum hominibus facefferent negotiũ, sed etiam Deo, signum cuiusmodi à Deo datum iri prædixit. Virginem fore dixit, quæ conciperet ac pareret filium, quem Emmanuelem, id est, Nobiscum Deum, vocarent. Ezechia autem rege partim consultus est, & rogatus, ut Deum precaretur: partim ad illũ missus est: quod quemadmodum & quamobrem gestũ sit, paucis exponam. Sennacherib rex Assyriorum irrumpens in regnum Iudæ, vrbes omnes munitas ceperat, Rapsacemque magistrũ militiæ Hierosolymam miserat, qui cum Ezechia de deditioe verba faceret. Ezechias timore perterritus, ad Rapsacem misit tum Eliachim Helcia filium præfectum pratorio, Sobnã Scribã, & Ioahæ Asaph filium à commentariis, qui cum verba multa, quæ cum ad Regis ignominiam, tum ad Dei dedecus, quasi suis opem ferre non posset, pertinentia audissent, & Ezechia renuntiassent: ipse discissa veste, amictus sacco in templum Dei ingressus est, missis illis tribus eodem habitu ad Ezechiam, qui ei primũ eadem exponerẽt, deinde illum rogarent, ut Deum precaretur pro iis qui in eius fide permanerent. Esaias Dei insuscepit ut Ezechia renuntiarent, ne time-

ret, Sennacherib enim Dei spiritu permotum audito nuncio rediturum esse in Syriam, atque ibi moriturum gladio. Renunciarunt hæc Regi, sed quoniam interim Sennacherib nuncios misit, qui ad Ezechiam perferrent libellos, quibus grauiora in Deum conuicia continebantur, ipse vel acceptos, vel ereptos è manibus legatorum recitauit primùm, deinde in templum ingressus, rogauit Deum supplex multis verbis, vt Sennacherib iniurias & cõtumelias vlcisceretur, suosque liberaret. Eiusmodi regis precibus adductus Deus, per Esaïam multis verbis liberationẽ futuram exposuit, signaque declarauit, ex quibus ille rem cõperiret. Quæ cùm euenissent omnia, cassis centum octoginta quinque millibus Assyriorum, ac paulò post Sennacherib in Syria, securapax sequuta est. Causa deinde cur ad eundem mitteretur, extitit talis. Aegrotabat Ezechias, isque morbus vitam petebat. Itaque ad eum Deus Esaïam misit, qui eum moneret, vt sibi ac suis rebus consuleret, quòd esset ipse moriturus. Hoc ille nuncio perterritus, Deum precatus erat statim, vt sui misereretur, cùm ab eodẽ iterum missus est, nondum egressus ex atrio, qui illi nunciaret, auditas esse suas preces, aspèctasque lachrymas, ob eamque causam, quindecim annos præterea illum esse victurum in eiusmodi

faelicitate, ut & ipse, & Vrbs à rege Assyriorum liberaretur: idque ipsum hinc intellecturum esse, quod Umbra solis in horologio Achaz decem gradibus regrederetur. Tum verò denique rex conualuit, cum Esaia iussu emplastrum ex massa carycarum confectum vulneri adhibuit. Berodach Babyloniorum rex, cum Ezechiam ex illo morbo conualuisse audisset, misit ad eum per legatos literas gratulatorias & munera. Ille autem legatis explicauit, ostenditque omnia quæ eximia & præclara in thesauris habebat. Quod eius factum, ut arrogantiæ & gloriæ plenum, sic Deo ingratum fuit, ut Esaiam hunc miserit, qui ei diceret, quod hoc ipsum fecisset, fore ut aliquando ea omnia, quæ haberet domi, auferrentur, atque eius posteri spadones essent in regis Babyloniorum palatio. Ad hæc Ezechias nihil respondit, nisi honestam equamque esse Dei orationem: tantum pax esset, dum viueret. Atque hæc de Esaia in scriptis diuinis reperi. Epiphanius autem scribit, eum à Manasse sectum esse in duas partes, ac subter quercum Rogel sepultum. Idem tam planè & apertè de religionis nostræ mysteriis, veluti de Christi conceptu, ortu, concionibus, siue prædicatione, miris operibus in curandis morbis, morte, resurrectione, atque ascensu dixit, ut non prædicere ea futura, sed

*presentia aut futura narrare videatur. Itaque
nō tam prophetā illum & Vatem, quā Euan-
gelistam videri vult Hieronymus.*

IOELIS PROPHETÆ VITA.

IOEL propheta. Is, vt ait Epiphanius, Bethorius erat ex tribu Ruben, natus autem Phatuele patre. Ex libro prophetiæ eius nō constat, quo quibusue regibus vaticinatus sit, aut vixerit: Hieronymus autem scribit, eum vaticinatum esse iisdem regibus, quibus Osee, id est, Ozia, Ioatham, Achaz, & Ezechia: idēque vult, omnia quæ prædixit, ad regnum Iudæ & Hierosolymam tantum, non etiam ad Israel pertinere. Quāquam multa de aduentu spiritus sancti ad Apostolos, vel Petro Apostolo interprete, dixit: multa de pœnitentia, quam in suis Deus desiderat. In patria porro honorificè, vt ait Epiphanius, sepultus est.

MICHAËAS PROPHETÆ VITA.

MICHAËAS Morasthites (Morasthi autem Palestina est viculus) ex tribu Ephraim, vt scribit Epiphanius, functus est prædicēdi vaticinandiq; munere, Ioathā, Achaz,

& Ezechia Iudæ regibus. Nihil de propheta
 huius, ut etiam de aliis multis, vita, scriptū re-
 perimus, tātū extat libellus, quo eius prophe-
 tia explicatur. Ea autem ad Samariam quidem
 & Hierosolymam propriè pertinet, sed ad Chri-
 sti etiam ortum aliqua ex parte refertur, beato
 Matthæo Apostolo & Euangelista interprete,
 qui locum illum quem de Bethleem accipi vide-
 mus, de loco, in quo Christus natus est, accipit
 & intelligit. Quoniam autem primum scelera
 quæ in Deum, deinde ea quæ in proximos con-
 cipiebant & admittebant tam Israelitæ, quàm
 Iudæi, reprehendit: eis improbat, quid facien-
 dum sit, non illis modò, verum etiam omnibus,
 indicat & exponit. Ait enim hoc in bonis esse,
 atque à Deo postulare, ut faciamus iudicium,
 id est, quod animo rectè statuerimus, perficia-
 mus: & misericordiam siue benignitatem ame-
 mus, sollicitèque ac diligenter Deum sequamur.
 Scribit Epiphanius, eum, quòd impia scelera
 Ioram regis Iudæ reprehenderet ac culparet,
 præcipitem ab illo datum esse, atque postea in
 patria sua sepultum cum honore.

ODED PROPHETA.

ODED propheta, semel tantū prophetiæ mu-
 nere functus, Achaz Iudæ rege, inuenitur.

Cum enim Zechri Ephraita Maasiam regis filium Erzicam præfectum pratorio, & Elcanam, qui secundum regem plurimum poterat, interfecisset: Israelitæq; prætereà captis ducentis millibus Iudæarum mulierum, cum liberis infinitaque præda, omnia in Samariam abducerent: Oded hic tum, qui ibi erat, egressus obviam victori exercitui venienti, exposuit factum illud minimè gratum esse Deo, qui passus esset occidi pro sceleribus suis Iudæos, quorum mulieres, liberos atque fortunas, cōtra ius abducerent & diriperent. Itaque sequerentur cōsiliū quod illis daret, Quamprimū captivos reducerent, ne Dei furor in eos exardesceret. Hæc Azaria, Barrachia, Ezechia & Amasæ ducebant narravit, qui subito suis eadem nuntiaverunt, eisque auctores fuerunt, ut reducerent captivos, prædāque omnem, ut sacram, restituerent, ne ira Dei in ipsos defuisset. quod illi tanta cum religione studioque fecerunt, ut eos qui nudi erant, vestitos, imbecilles in iumenta impositos, curatis corporibus, remisissent.

NAHVUM PROPHETA.

NAHVUM Elkesæus (est autem Elkesis viculus in Galilæa, quem sibi monstratum esse scribit Hieronymus) ex tribu Simeonia, quem-

admodum Epiphanius memoria prodidit . Is Niniues, ac Niniuitarum euersionem prædixit, cum antea, vt docui, Ionæ prophetæ prædictione adducti, mutatione vitæ superioris, tum veniam à Deo impetravissent. Rege Ezechia functus est prophetæ munere, vt placet Hieronymo . Tandem in patria excessit è vita, ibique sepultus est.

HIEREMIAE PROPHETAE VITA.

IEREMIAS propheta, Helchia patre natus est ex tribu Beniaminia sacerdos Anathothita . Is vaticinatus est, quemadmodum ex principio libri eius prophetiæ intelligi potest, ab vndecimo anno Iosia Amonis regis Iudæ filij, vsque ad vndecimū annum Sedechiæ, quo in Babylonem captis Hierosolymis abductus est, cum reliquiis regni Iudæ, Sedechias, vt ipse constanter prædixerat, Dei iussu, id quod magnorum malorum causa ei fuit. Nam & catenis vinctus, & in carcerem atque lacum tetri odoris coniectus est, nec tamen his malis cogi potuit inuictus eius animus aliter aut sentire aut prædicere, falsis etiam vatibus contra prædicentibus. Quod quoniam ad eius

*laudem maximè pertinet, quemadmodum, quò-
 que ordine, gestum sit, institui exponere. Deus
 cum Topheth ea prædictum & expositum, quæ
 iusserat, miserat, quo ex loco cùm venisset Hie-
 rosolymam, in atriò templi stans, vniuerso po-
 pulo libera voce nūciauit, ea mala omnia euen-
 tura & Vrbi, & incolis, quæ euentura præ-
 dixisset Deus, quòd ipsius præceptis non paré-
 rent. Eius sermonem eiusmodi ferre æquo ani-
 mo non potuit Phassur pontifex maximus, sed
 casum statim in neruum coniecit. Postridie,
 prima luce, cùm illum Phassur eduxisset, qua-
 cunque de causa (neque enim scriptum reperi)
 ipse constanter ac liberè confirmauit, non Phas-
 sur vocatum illum esse à Deo, sed pauorem
 omni ex parte. Deum enim pauore & cum
 consternaturum esse, & illius amicos, sic vt
 hostium gladio illo spectante confoderentur: Iu-
 dæmque omnem Babylonij regis manibus in-
 terficiendum traditurum, cum omni supellecti-
 le. Phassur autem ipsum eò captiuū cum omni
 familia abductum iri, ibique moriturum, &
 amicos omnes, quibus vaticinatus esset quæ fal-
 sa essent. Quid ad hæc Phassur respõderit, quid-
 ve eis impulsus egerit, non est mandatum diui-
 nis literis. Principio autem regni Ioakim Iosias
 filij, iussu Dei stans in templi Dei atrio, omni-*

bus qui ex Urbibus Iudæ Hierosolyma eū adoratum venerant, denunciabat, nisi legem ipsius observarent, fore ut & templo id, quod Silo acciderat, eueniret, & Urbem ipsam nationes omnes detestaretur. Sacerdotes, falsi prophetæ, atque populus qui cum hac dicentem audierant, cū comprehendissent, ob eam causam morte mulctandum esse primum inter se, deinde principibus, qui audita hac sententia, ex regia in templum se contulerant, dixerāt, cū ipse facta dicendi potestate, se à Deo missum esse dixit, denunciatum quæ dixisset omnia. Itaque ipsi mutata vita, præceptis Dei parerēt, qui ita demum mutaret sententiam, ne ea quæ instituisset, faceret. Nam quod ad se attinebat, se quidem in eorum esse potestate, ut quæ vellent, in se statuerent: hoc tamen intelligerēt ac scirent, si ipsum interficerent, eos infontem contra se atque Urbem ipsam esse occisuros, quippe cū Deus eum miserit, qui illa omnia eis prædiceret. His eius verbis adducti optimates ac populus, suaserunt sacerdotibus & falsis prophetis, ne illum, qui à Deo missus esset, interficerēt. Atque in his maiores natu quidam surgentes, exemplo Michææ prophetæ, qui Ezechia rege de Urbis excidio multa prædixisset, nec tamen pœna capitis condemnatus esset, sed homines qui tum erant, mu-

tatione vitæ, precibus & lachrymis Deum placassent, omnes deiecerunt de sententiâ. Sed in hoc maximè Ahicham Saphan filij enituit opera et diligentia, ne morte mulctaretur. Eodem rege præcepit ei Deus, ut Rechabij nepotes ac posteros qui Rechabitæ appellabantur, in templum introduceret, eisq̃ue vinum daret. Illi autem à Ionadab patre in mandatis acceperant, ut à vino abstinerent. Itaque cum vinum iussu Dei illis Hieremias dedisset, præcepti huius parētis sui excusatione vsi, omnino ab vsu vini abhorruerunt. Quod rectè factū ab eis non esset, si Deum illis hoc præcipere dixisset. Deus autem hoc illorum exēplo, Iudeorum deprauatos corruptosq̃ue mores voluit ostendere. Misit enim postea Hieremiam, qui illis indicaret, quàm grauitè peccarent, quòd Rechabitæ illi iussu patris in omni vita à vino abstinerent, cum ipse illos per prophetas, quos plurimos misisset, conatus esset à facinorosa vita abducere, neque præ eorum obstinata voluntate potuisset. Hinc & Iudeos oppressū iri malis, inedia, peste, captiuitate, denunciavit: Rechabitis autem, nunquam de futuro apud se eorum genus promisit, quòd tanta cum animi constātia patris sui præceptis obtemperassent. Quarto autem imperij eiusdem regis anno, eidem præcepit Deus, ut in codice cala-

mitates omnes , quibus regna Israelis & Iudæ oppressurus esset, scriberet, ut cum ea ex scripto recitari audirent, vel tum denique, mutatione vite, ipsum sibi propicium redderent. Erat tum, ut dixi, in vinculis. Itaq; Baruch Neriæ filium virum bonum accersuit, quem iussit primùm in codice quæ dictaret scribere, deinde in templo, in quod ipsi non pateret aditus, indicto ieiunio recitare omni populo, iisque omnibus qui ex Iudæ religionis causa eò venirent, ut si crederent quæ recitarentur, atque ex eis viuerent, clementiore Deo vterentur. Ea cum perfecisset, indictoque ieiunio, anno eiusdem regis quinto, mense nono, recitasset omnia, Michæas Gamariæ filius, primis regiæ illa omnia nunciauit. Illi autem Iudi Nathaniæ filium miserunt, qui ei præciperet, ut codicem ad se adferret. Eò cum venisset, ex scripto omnia dixit, & iussu eorū, & tanta cum admiratione aut stupore potius, ut illa omnia regi se exposituros dicerent. Primùm tamen rogarunt eum, quonam pacto illa omnia scripsisset. Cum respōdisset, se, Hieremia ita dictante ut si legisset, excepisse omnia, & scripsisse atramento: tum admonuerunt illum, ut ipse & Hieremias se alicubi ita abderet, ut ne-moid sciret, cōmisso Elisamæ scribæ libro. Regis iussu prolatum librum Iudi legere cœperat, cum

lectis tantum tribus aut quatuor paginis, arreptum cultello primum abscidit, deinde in ignem coniecit, quo consumptus est: neque ab eo, ne id faceret, Elnathan, Dalaias, & Gamarias impetrare potuerunt. Neque verò Ioacim hoc tam graui scelere contentus fuit, sed etiam imperauit Icremiel Amelech filio, & Saraia Ezriel filio, Selemiéque Abdeel filio, ut Baruch scribam, Hieremiámque prophetam comprehenderent: sed Dei benignitate latuerunt, effugeruntque iram principis. Deus autem ita grauius molesteque tulit codicis exustionem, ut iusserit scribere Hieremiam, alterum eiusdem sententiæ additis etiam permultis aliis, regi que ex se nunciare, non superfuturum ex ipsius posteris, qui præsit regia potestate, quin etiam proiectum iri eius cadauer, suppliciumque sumptum iri de illius posterorumque eius ac seruorum sceleribus, eaque mala illis atque Vrbi & populo euentura esse, quæ cum prædicta essent, tamen neglexissent, ac pro nihilo putassent. Hieremias, ita ut mandatum à Deo acceperat, codicem alterum Baruch dedit. Hunc alterum numi Baruch regi ipsi an populo legerit, an vtrique, & quid rex egerit aut ceteri, non est mandatum diuinis literis. Idem principio regni Ioacim Iosia regis Iudæ filij, iussu Dei, capiendâ Hierosolymam

abducēdōsque Iudæos Babylonem à Nabuchodonosore rege prædixerat. Falsi autem prophetae hoc futurum pernegabant, ob eamque causam illum in inuidiā & odium Ioacim regis, eoque capto & abducto, Sedechiæ adduxerunt. In his fuit Hananias Azur filius Gabaonita, qui anno quinto regni Sedechiæ, hoc Deum prædicere confirmabat in templo, in conspectu sacerdotum, totiusque populi, se iugum regis Babylonis fregisse, atque intra biennium facturū, ut vasa templi quæ Nabuchodonosor rex ablata in Babylonem transtulisset, reportarentur, & Iechonias Ioacim filius rex Iudæ, cū reliquis captiuis reduceretur. Hieremias qui aderat, falsam hanc Hananiae vaticinationem ferre non potuit, sed cū principiō dixisset, optare se eum verum euentum quem prædiceret, deinde addidit, tum denique intelligi prophetā à Deo missum esse, cū id euenit, quod prædixerat. Hananias contrā permanens in sententia, detracta de Hieremiæ ceruice catena, eaque fracta, Deū hoc dicere palam ac publicè asseuerauit, sic se fracturū esse iugum regis Babylonici post biennium. Hieremias qui illius pertinaciam diutius ferre non posset, abierat, cū Deus iussit illum redire, ac nunciare, non solum id verum esse ad septuaginta annos, quod de captiuitate prædixisset.

set, Verùm etiã Hananiam illo ipso anno, quod
 contra Deum mentitus esset, esse moriturum.
 Id quod paulò pòst accidit, id est, septimo men-
 se, cùm quinto verba superiora habita essent.
 Idem paulò ante illud tēpus, id est, cùm Iecho-
 nias captus est, abductusque in Babylonem, ter-
 tio mense regni sui, insu Dei ad eos, qui eò cum
 rege abducti fuerant, misit Hierosolyma epi-
 stolam, qua primùm eos hortabatur, aut potius
 eis imperabat, ut ibi domos edificarent, hortos
 & vites sererent, acciperent & darent vxor-
 es, omniãque facerent, quæ solerent locorum
 incolæ: deinde eosdem monebat, ne falsis pro-
 phetis, quos non misisset, crederent: postremò
 prædicebat cùm septuaginta annorum numerus
 expletus esset, fore, ut reducerentur: illi autem
 qui eò ex Iuda non migrassēt, sicuti constituerat
 & iusserat, gladio, fame, pestēque interirent.
 Et quoniã ex Iuda falsi duo vates Achab Co-
 liæ, & Sedecias Maasîæ filius, illis Dei nomine
 falsa prædicebant, scribebat eos in potestatem
 Nabuchodonosoris esse venturos, ibique in tan-
 tum omnium odium adductum iri, ut qui ali-
 cui malè & infœliciter euenire optaret, idem ei,
 quod illis duobus euenire vellet. Eadē ferè præ-
 dicebat euentura Semeiã Nehelanutano, qui
 in Babylone falsa etiã prædicebat iis qui eò mi-
 grauerant.

grauerant. Hanc autem epistolam iussu Sede-
 chie regis, Elasa Saphan filius, & Gamarias
 Helchie filius pertulerunt. Quoto autem anno
 eius imperij, incertum est. Sedechias rex, cum
 Hierosolyma obsideretur, misit bis ad eum, se-
 mel consultum, Phassur Melchie filium, So-
 phoniámque sacerdotem Maasie filium, num
 Deus se ac suos admirabiliter eriperet: iterum
 Iuchal filium Selemie, & Sophoniam sacerdo-
 tem Maasie filium, petiit, ut pro se ac suis
 Deum precaretur. Prioribus legatis precepit, ut
 regi renunciarent, hoc Deum dicere, se arma
 belli, quibus cum rege Babylonis pugnarent, re-
 tusurum, eaque collecturum in urbem Hieroso-
 lymam, ac cum eis bellum gesturum totis viri-
 bus, ac magno cum furore, ciuesque omnes pe-
 ste confecturum esse: tumque regem Sedechiam,
 & seruos eius, omnesque quib. pestis, gladius,
 & famés pepercisset, Nabuchodonosoris regis
 libidini traditurum, qui sine misericordia eos in-
 terficeret. Posteriores autem, quod aduentu ex-
 ercitus Pharaonis audito, Chaldaei qui Hieroso-
 lymam obsidebant, obsidionem soluerant, re-
 gi renunciare iussit, exercitum Pharaonis, qui
 venisset ipsi auxilio, redituum in Aegyptum,
 ac tum Chaldaeos reuersuros, qui urbem oppu-
 gnarent, caperent, & incenderent. Cum autem

Chaldaeorum exercitus, nuncio aduentus Aegyptiorum accepto, discessisset, ipse Hierosolyma egressus in patriam certi negotij causa proficiscebatur. In via incidit in praefectum quendam Ieriam, qui cum illi fugam ad Chaldaeos obiecisset, seque ipse contra ad Chaldaeos fugere negaret, nec ille crederet: eum apud primos regni accusauit, qui irati, caesum illum in carcerem coniecerunt Ionathæ, ubi diu in squalore fuit. Eum inde postea eductum Sedechias rex in regiam ad se accersuit, clamque rogauit, num quæ prædixisset de captiuitate, accepisset à Deo. Cumque Dei illa esse dixisset, eumque venturum in regis Babylonij potestatem, illum supplex rogauit, ne se, qui nihil tale meritus esset, in carcerem Ionathæ moriturum remitteret. Rex eius precibus adductus illum in carcerem vestibuli coniecit, dato negotio, ut ei aliquantum panis cum pulmento præberetur, quoad panis in vrbe consumeretur. Nec verò eius hostes hoc illius supplicio contenti sunt. Sapharius enim Mathan filius, Godolias Phassur filius, Iuchal Semelie filius, et Phassur Melchie filius, primi regie, concitati in eum, quod audiuiſſent cum palam diceret, id quod paulò ante commemorauimus, Qui in vrbe remaneret, eum gladio, peste & fame interiturum: qui autem ad Chaldaeos fugeret, sal-

uum & incolumem futurum: ad regem ad-
euntes, eum rogarunt, ut interficeretur, ut hostis
patriæ, præsertim cum armatos, qui in urbe re-
mansissent, ab ea defendenda, protegendaque
deterreret, ferendis eiusmodi sermonibus. Rex
qui in tantarum perturbatione & trepidatio-
ne, tantoque discrimine, suorum in se animos re-
tinere vellet, illum esse dixit in eorum potestate:
neque enim fas esse sibi quicquam eis negare. Illi
arrupti, in Melchiæ Amelech filij lacum cœni
plenum, qui erat in carcere vestibuli, proiecerunt
funibus. Ibi haud diu fuit, Dei benignitate, qui
exteri hominis comouit in eum misericordiam.
Erat in regia spado Abdemelech Aethiops,
qui quod vera esse, quæ Hieremias prædiceret,
crederet, cum primū auditione accepit, id quod
inimicorū inuidia Hieremiæ accidisset: regi ex-
posuit, iniuria illud ab eis factum, ut ibi more-
retur. Rex eius siue precibus, siue cōsilio & mo-
nitis adductus, illi negotium dedit, extrahendi
Hieremiæ, & cōiiciendi in vestibuli carcerem.
Ex eo, nec ita multò post, ipsum ad se rex accer-
siuit, iussitque sibi planè ac bona fide, quisnā es-
set rerum euentus exponere. Ipse primū vereri
se dixit, ne si id quod res erat, narrasset, se inter-
ficeret, nec cōsiliū suū sequeretur: deinde po-
testate liberè dicendi accepta, sine mortis pericu-

lo, iurisiurandi religione clàm interposita , exposuit regi, si egrederetur ipse ad regis Babylonij duces, saluum illū fore, totāque eius familiā, neque incensum iri urbem : Si non proficisceretur, & illum in hostium potestatem venturum esse, sic, ut nunquam elapsurus esset ex eorū manibus, neque eum solum, verum etiam uxores ac liberos, & urbem deflagaturam. Itaque si sibi ac suis consultum vellet, verbis, non suis, sed Dei, crederet. Cū rex vereri se diceret, ne Iudæis qui iam ad Chaldæos trās fugissent, si se dederet, traderetur, qui ipsum irriderent: etsi Hieremias confirmavit, non ita fore, sed ut iam ipse prädixerat, ut Dei vates, tamen ei fidem non habuit, sed ab eo tantum petiuit, aut ei imperavit, ne quis illa ipsa resciret. Quod si duces ac primi regni rogarēt, quibus de rebus cū eo verba fecisset, diceret se ad ipsius pedes proiecisse, ac rogasse, ne se in carcerē Ionathæ moriturū remitteret. His cum mandatis eum rex in carcerē vestibuli remisit. Exeuntem principes interrogauerant, quosnam cum ipso sermones, ac quibus de rebus rex habuisset: sed cū id quod à rege præscriptum fuerat, exposuisset, eorum ira deferbuit. Veruntamen in carcere atrij mansit ad eum diem, quo urbs capta est. Quod quo tempore acciderit, ut reliqua Hieremiæ dicta &

facta intelligantur, exponendum est. Hierosolyma quidem obsideri cœpta est à Nabuchodonosore rege Babylonis, eiusq; exercitu, anno nono Sedechiæ regis Iudæ, mense decimo: anno autem Undecimo, mēse quarto, nono die capta est: eaque euenerunt Sedechiæ regi, quæ Hieremias Dei vates prædixerat. Cū enim captā urbem cognouisset, ipse clām noctu cum armatis, per viam horti sui, & per portam, quæ inter duos muros sita erat, effugit: sed exercitus Chaldaeorum illum insequutus, captum in campis Hierichontinis ad Nabuchodonosorem adduxit Reblatha, quæ Vrbs in regione Emath sita est. Ibi cū multis verbis cum illo egisset, ei oculos effodit, atque in vincula coniecit, interfectis coram eo ipsius liberis. Duorum autem præcipuè Deus misertus est, Hieremiæ, & Abdemelech Æthiopis, qui Sedechiam, vt Hieremiam ex lacu, quemadmodum dixi, eriperet, rogauerat. De Abdemelech primū dicam: ante quā Vrbs caperetur, Hieremiæ in carcere vestibuli præcepit Deus, vt iret nūciatum Abdemelech Æthiopi, fore, vt omnia Vrbi quæ prædixerat, euenirent, & tamen cum non venturum in potestatem eorum, quos metueret, sed liberatū iri, quòd in ipso spem collocasset. Hieremiæ autem salus tantæ curæ fuit Deo, vt eius benignitate

Nabuchodonosor rex Babylonis, Nabuzardan magistro militū, captis Hierosolymis, negotium dederit, ut eū potestatis suæ esse pateretur, nullisque malis afficeret, sed ita tractaret & haberet, ut vellet. Itaque eum eductum ex carcere, Godoliæ Ahicam filio tradidit, ut liberè in publicum prodiret. Deinde cū Babylonē reuerteretur, commemorato liberationis beneficio, optionem illi dedit, vel secum eundi in Babylonem, vel manendi ubicunque vellet in Iuda. Cūque posterius malle se dixisset, suppeditaris iis quæ ad victum pertinent, datisque muneribus, eum dimisit. Ipse autem ad Godoliam, quæ Urbibus Iudæ Nabuchodonosor præfecerat, profectus, cum eo in Masphat, ad eum diem, quo ab Ismaele Ammoniano interfectus est, habitavit, eo autem interfecto multisque aliis ab Ismaele, & Ismaele ipso à Ioanne Caree filio, cū i qui reliqui erant eum rogassent, ut Deum consuleret, num sibi in Aegyptum proficiscendum esset, an ibi manendum, se enim facturos quicquid Deo videretur: decimo quidē demum die, convocatis armatis omnibus, atque in his Ioāne Caree filio, eis exposuit, Deū eos ibi habitare velle, ubi eos liberaret à servitute Nabuchodonosoris quam timerent: quod si in Aegyptū migrarēt, eos persequunturum esse gladium, famem atque

pestem. Itaque longa oratione eos cohortatus est, ut sibi consulerent, iis perficiendis omnibus, quæ Deo viderentur. Illi autem negare eum à Deo missum esse, qui ipsos in Ægyptū salutis causa vetaret proficisci: sed dicere vnum esse Baruch Neriæ filium, qui illum in ipsos concitaret, ut in potestatem Chaldaeorum venirent. Perstantes ergo in proposito, neglecto præcepto Dei, qui eos Iudā, ut dixi, incolere volebat, in Ægyptum venientes, Hieremiam & Baruch secum proficisci coegerunt. Cum in Taphnis ventum esset, Dei iussu & afflatu prædixit aduentum Nabuchodonosoris in Ægyptū, quo eam caperet ac vastaret, deorūque delubra incenderet. Iudæique, qui eò contra Dei voluntatem se receperant, vel gladio, vel fame, interirent. Hac Hieremiæ, quæ longa est, vaticinatione concitatus populus, eum lapidibus, ut ait Epiphanius, obruit, sepultusque est in loco, quem Pharaon incoluerat. Ægyptij enim eum honore affecerunt, cum accepissent ab illo beneficia maxima. Nam eius precibus aspides & crocodili, qui incolas necabant, desierunt nocere. Quin etiam in tanta illum veneratione habuerunt Christiani, usque ad Epiphaniij ætatem, ut in eo loco precarentur, sumptoque ex sepulchro pulvere, & moribus aspidum mederentur, & crocodilos

ex flumine fugarēt. Eum Calend. Maij Osualdus Taphnis interfectū esse memoriæ prodidit.

BARUCH PROPHETÆ VITA.

BARUCH propheta, Neria patre natus est. Is minister fuit Hieremie propheta, excipiendo, illo dictante iussu Dei, codice, quo Deus euentura mala iis qui se ad Nabuchodonosorem regem Babylonis ex Vrbe Hierosolyma non contulissent, & bona iis qui se contulissent, denunciabat: & legendo in templo die ieiunij vniuerso populo, qui Hierosolymam ex Urbibus Iudæ conuenerant. Extat eius liber, quem non eundem esse, ex tempore ipso, & loco, intelligi potest. Superiore enim, anno Ioacim regis Iudæ quarto, exceptus est, & quinto, mense nono, indicto ieiunio Hierosolymæ in tēplo lectus, isque cum ab Ioacim rege discissus fuisset, atque in ignem cōiectus, iterū iisdem verbis atq; pluribus, iussu Dei, eodem Hieremia dictante, ab hoc ipso Baruch exceptus est, aut certè ab Hieremia eidem datus. Is autem qui extat, ab hoc Baruch scriptus dicitur, & ab eodem Iechonia Ioacim filio regi Iudæ, omnique populo, qui in Babylonem abductus fuerat, ibi lectus esse. Ita

fit, ut hic posterius scriptus sit. De illo superiore satis multa dicta sunt à nobis in vita Hieremie prophetæ. Hic autem cum legeretur, omnes flebant, ieiunabant, & precabantur Deum. Eo verò perlecto, collatum argentum, quantum cuiusque facultates ferebant, miserunt Hierosolymam ad eos, qui ibi remanserant, emendis hostiis, eos rogantes, ut & offerrent pro peccatis omnium, & Deum precarentur, ut Nabuchodonosori filioque eius Balthasari omnia in vita prosperè euenire vellet, ipsisq; daret, ut apud Nabuchodonosorem eiusque filium, cum bona eorum gratia possent vivere: ac pro se rogarent Deum, cui peccassent, & cuius nondū ira placata esset. Hortabantur etiam eos, ut librum quem misissent, diebus festis in templo recitandum curarent. Reliqua oratio ferè in detestatione peccatorum, ac scelerū quæ admisissent, & malorum quibus iure oppressi esset, enumeratione consumitur. Est etiam extremo libro Hieremie epistola, qua ut vates Dei prædicit captiuis Hierosolymitanis, eos abductum iri in Babyloniam à Nabuchodonosore rege Babyloniorum, eosque hortatur, ut cum ibi fuerint, ne deos quos visuri essent, colerent, sed Deum. Baruch autem tanta familiaritate & necessitudine cum Hieremia coniunctus erat, ut cum capta vrbs

Hierosolyma esset, abductique essent in Babyloniam & Sedechias rex, & optimates ac populus, præter eos qui ex diuersis regionibus in Iudam reuersi, ibi iussu Nabuchodonosoris regis Godolia præfecto remanserant, Godoliaque ipso interempto, reliqui Hieremiam rogassent, ut Deum consuleret, num in Aegyptum migrarent, atque is non illis migrandum Dei iussu dixisset, negarent hoc Deum vetare, sed Baruch vnum esse, qui illum in ipsos concitaret. Quoniam verò non paruerunt Dei præcepto, in Aegyptum duces cum reliquis Hieremiam & Baruch duxerunt: ibique, ut arbitror, mortuus & sepultus est.

EZECHIELIS PROPHETAE VITA.

EZECHEL propheta, & sacerdos, Buzi patrem habuit. Is eodem tēpore vaticinatus est, quo Hieremias: sed hoc interest, quòd Hieremias res futuras cœpit prædicere anno tertiodecimo Iosia regis Iudæ, hic autem anno quinto post abductum Ioa-
chin, siue Iechoniam, in Babyloniam: & Hieremias vaticinationē, prophetiāque suam perduxit vsque ad vndecimum Sedechia annum,

quo captus est, & eo paulò amplius: Ezechias autem vsque ad quartumdecimum, post expugnata & captam urbem, quem quintum & vigesimum post abductum se vocat. Quod quò facilius intelligatur, Ezechielisque vita sit notior, libet paulò altiùs temporum ac rerum ordinem repetere. Ioacim quidē Iosia patre interfecto, qui præsuit regia potestate annis xxxi. & Ioachaz fratre, qui tantum tribus mēsis imperavit, abducto in Aegyptum, rex Iudæ pro fratre à Nechaone rege Aegypti cōstitutus est. Ioacim vndecimo imperij sui anno moriēs, Ioachin, qui etiam Iechonias appellatur, regni heredem reliquit. Ioachin tertio mēse imperij sui expugnata vrbe & direpto templo captus est, & abductus Babylonem cum matre, vxoribus & spadonibus, aliisque permultis: in his Ezechiel. In Babylone autem vaticinari, vt ipse ait, cœpit, anno quinto post captum & abductū Ioachin in Babyloniā, id est, anno quinto Sedechiæ qui in eius locum suffectus est à Nabuchodonosore rege. Sedechias autem vndecimo imperij sui anno captus est, & coniectus in vincula. Ad hos annos vndecim Sedechiæ, quibus iam captiuus Ezechiel fuerat, si quatuordecim alios post captam Hierosolymam, captūmq; Sedechiam, addamus, quinque & viginti annos

reperiemus, qui vigesimus quintus annus est, eius migrationis, ad quem perduxit omnem vaticinationem suam. Igitur Ezechiel non in Iuda, sed in Babylone vaticinatus est, prædixitque primum captiuitatem alteram, quæ Sedechia rege, vt dixi, euenit, totius populi, ob ipsius scelera & vetera, & noua, quæ illi Deus ex Babylonia monstrauit, eiusque liberationem. Cum vaticinandi initium fecisset, vt dixi, quinto anno post captum, abductumque in Babylonem Iechoniam, atque id quarto mense, quinto die, anno post, id est, sexto, quinto sexti mensis die ostensus est ei Deus, qui iussit illum oculorum aciem in viam, quæ ad Aquilonem pertinebat, intendere: quod cum fecisset, aspexit simulachrum ad portam altaris in ipso templi Hierosolymitani introitu: quod oppidani colebant, vt hoc scelere suo Deum inde expelleret. Hoc magnum fuit scelus, sed alterum grauius ei ostendit. Eum introduxit in atrium templi, iussitque fodere & diruere parietem, quo diruto, apparuit ostium vnum, per quod cum ingressus esset iussu eius, vidit in pariete vndique depicta omnium bestiarum simulachra, & Iechoniam sacerdotem Saphan filium stantem in medio septuaginta senum, qui thuribula manibus tenebant, iamque fumus odorum incensorum egrediebatur. Gra-

uiora etiam his ei flagitia monstrauit. Introduxit eum in templū per ostium portæ, quod ad Aquilonem spectabat. Ibi aspexit mulieres, quæ lugebant Adonin. His quoque grauiora illi postea ostēdit. Eum introduxit in interius tēpli atrium. Inde in ostio templi inter vestibulum & altare vidit viros ad vigintiquinque, qui post templum intuentes orientem, ad ortum solis venerabantur, & vt nostri dicunt, adorabant. Quæ cum ostendisset omnia, ei patefecit illorum futurum interitum. Dixit enim, quod illi ea omnia perfecissent, vt ipsum concitarent, fore etiā, vt ipse furore & ira incitatus, parceret nemini, neque misericordia cōmoueretur, & cum se precarentur voce maxima, minimè eos audiret. Eodem anno paulò pōst, spiritus Dei elatū eundem, introduxit ad portam orientalem templi: In introitu portæ vigintiquinque viri erant, atque in medio eorum Iezonias Asur filius, & Pheltias Baraia filius, principes ac duces populi, siue Tribuni plebis: ei que dixit spiritus, illos esse, qui in illa vrbe, scelera mente tractarent, inirēntque scelestum cōsiliū, quod iam pridem edificatum esse templum dicerent, hanc lebetem esse, se autem carnes. Itaque de illis vaticinari eum iussit. Is verò illis iussus est hæc predicere: Quoniam plurimos occidisset in illa vrbe, strā-

uissentque eius vias cadaueribus: eorū quos interfecissent cadauera esse carnes, & lebetem: fore autem, vt ex ipsa vrbe educeretur, & gladius, quem metuissent, in eos incurreret, eicerenturque ex vrbe, & in manum hostium venirent. Hæc autem omnia illis euētura esse, quod Dei præceptis non obtemperassent, sed Gētium instituta vitāque imitati esset. Quæ cum vaticinaretur Ezechiel, Pheltias Banaia filius, quem paulo antè dixi, mortuus est, cuius morte ita exanimatus est, vt reliquorum mortem subito sequuturam existimaret. Sed Deus lugentem, & clamantem, consolatus est, promissa eorum, quos procul dispererat, renouatione, cum facturū esset, vt præcepta sua obseruarent, essentque sibi populus, illis verò ipse Deus. Hæc cum illi Deus prædicenda commisisset, ab eodem spiritu in Chaldaeam reportatus est, sociisque captiuis omnia narrauit, quæ ipsi Deus ostenderat. Anno autem septimo, mense quinto, die decimo, venerant consultum Deum viri quidam ex senibus, iamque coram Ezechiele federant, cum illum Deus hæc eis iussit dicere, Deum, qui illos se consultum venisse optime sciret, non esse eis responsurum. Quod si eos iudicaret Ezechiel, primum maiorum suorum eis scelera & impia facinora, principio ducto ab Aegyptiaca seruitu-

tis liberatione, deinde sua ipſorū narraret. Anno ſuperiore conſultum etiam venerant Deum viri quidam ex ſenibus, quibus in Ezechielis conſpectu ſedentibus, Deus iuſſit eum illis dicere, quòd, ut ei patefecit, de ſimulachris ſuis cogitarent, ipſum quotieſcunq; venirent ſe conſultum per prophetam de illis cogitantes, aut alij tales, eis eſſe reſponſurum, non per prophetam, idque pro ſclerum ſuorū multitudine. Ob eamque cauſam, hoc illum Iſraeli denunciare iuſſit, cū præcepiſſet eis, ut redirent in viam, ſequē à deorum cultu abſtraherēt, & à ſlagitiis omnibus, Si quis Iſraelita ciuis aut peregrinus, abalienatus à Deo, peregrinorū deorum religionem approbaret, venirētque cōſultum Deū per prophetam, Deum ipſum ei per ſe reſponſum redditurum eſſe, facturūq; ut homo ille ſit exemplo ceteris, ac tandem perditurum. Atque hæc priuatim nonnullis iuſſus eſt Ezechiel dicere, quæ ad omnes pertinerent. Multa autē alia & omnibus Iudæis publicè, iuſſu Dei, in utrāque partem prædixit, & Aegypti, aliorūque imperiorum euerſiones, ſine legatione. Tam verò conſtans fuit & fortis in hoc munere, ut tandem dux populi, quòd ab eo ob ſimulachrorum cultum obiurgaretur, in Babylone interfecerit, quemadmodum ſcribit Epiphanius. In agro au-

tem Saur sepultus est in sepulchro Sem & Arphaxad maiorum suorum : quò maximum concursum factum fuisse populorum, idem Epiphanius scribit, precationis officiique gratia. Interfectus est autem iiij. Idus Aprilis, vt Osualdus scribit.

DANIELIS PROPHETÆ VITA.

DANIEL ex tribu Iudaïna in vi-
co Bethebero superiore, non pro-
cul Hierosolymis, vt ait Epipha-
nius, natus est. Is puer cùm etiã
esset, Ioacim rege, anno imperij
eius tertio, Babylonem cum alijs abductus est:
sed primum locum obtinuit eorum, qui pluri-
mum apud Nabuchodonosorem, eiúsque hare-
des reges, gratia valuerunt, cùm ob continen-
tiæ pulchritudinisque laudem, tum diuinationis
quæ in somniorum interpretatione posita est, causa
& nomine. Nabuchodonosor enim, cùm multi
elegantia forma, honestaque facie pueri abducti
essent Babylonem, Asphenex præfecto spado-
num imperauerat, vt pueros Israelis, qui genus
à regibus & tyrannis ducerent, egregia forma,
eruditos omni doctrina, omnibusque disciplinis
& artibus, in palatium introduceret, vt ibi literis
Chaldaicis,

Chaldaicis, & sermone institueretur tribus annis, quibus exactis in conspectu ipsius præsto essent. In his Daniel fuit, cui præfectus Balthasaris nomen dedit. Rex autem annonam ei atque sodalibus ex iis quæ capiebat, constituerat: sed Daniel sibi induxerat in animum, se non inquinare sacris escis. Itaque præfectum spadonum rogavit, ut hoc sibi per ipsius humanitatem liceret. Hoc ille primum non concessit, quod se regem dominum suum metuere diceret, qui cum eadem esculenta & poculenta illi ac sociis, quibus uteretur, constituisset, si eos minus plenos animadvertisset, quàm æquales ipsorum, iure in ipsum animadverteret. Deinde Daniel in proposito susceptoque consilio permanens, facile persuasit Malasari, quem præfectus spadonum ei ac tribus aliis præposuerat, ut decem diebus, quibus leguminibus tantum vesceretur, & aquam biberent, contemplaretur os suum, num macilentior ipse aliis qui præscripto victu uteretur, eaderet. Decimo demum die, re observata, & tentata, os Danielis triumque eius sociorum multò plenius, quàm aliorum, cum summa Malasaris admiratione apparuit, cum tantum eis legumina & aquam præbuisset. Danieli autem præter scientiam disciplinamque omnium librorum ac sapientiæ, quæ communis ei fuit cum tri-

bus sociis, Anania, Azaria & Misacle, dedit Deus interpretationis omnium somniorum scientiam: qua duce plurimum, ut dixi, apud Nabuchodonosorem, eiusque hæredes, gratia valuit. Nam cum in palatium introductus esset, secundoque imperij sui anno rex somnium vidisset, quod nemo diuinus aut somniorum interpres adhibitus interpretari potuisset, sed Daniel solus, maximo in honore cœpit esse. Atque hoc quale fuerit, & qua occasione Daniel consultus fuerit, non alienum erit exponere. Secundo, ut dixi, imperij sui anno, somnium rex vidit, quo vehementer perterritus fuit, sed postea nunquam ei in mentem elapsum venire potuit. Itaque conuocatis magis diuinisque omnibus regni, iubebat eos somnium, quod effugisset, primum narrare, deinde interpretari. Illi regem rogabant, ut somnium ipse exponeret, quod interpretarentur: cum rex urgere cœpit eos, conditione proposita, nisi narrarent somnium, & interpretarentur, fore ut & ipsi perirent, & domus eorum publicarentur: si narrarent, & interpretarentur, præmia, munera, magnosque honores acciperent. Iterum siue admonuerant regem, siue rogauerant, ut somnium suum ipse narraret, ac tum denique illud interpretarentur: quod enim peteret, neminem hominem esse, qui posset efficere:

sed solos Deos, qui cum hominibus non versarentur: cum rex ira & furore incitatus, lata sententia præcepit Arioch magistro militum, ut diuini & coniectores occiderentur. Iamque interficiebantur, quærebaturque Daniel ad mortem cum sociis, cum ipse, re tam crudeli comperita, adiens ad regem, eum, ut sibi tempus daret ad rem quam quæreret, rogauit. Cōstituto tempore, domum suam ingressus est, reque sociis tribus exposita, ipse Deum rogauit in commune cum eis, ut sibi ac illis mysterium enunciaret, ne cum Chaldæis interirent. Audiuit eos Deus, remque Danieli noctu patefecit: qui nō immemor tāti beneficij, ei gratias egit his verbis: Aeterna laus tribuatur nomini Dei, propterea quod eius sunt & sapientia & fortitudo: mutat tempora & ætates, transfertque regna & constituit: dat sapientiam sapientibus, scientiamque intelligentibus disciplinam: idem enunciat mysteria, & quæ abstrusa sunt, nouitque ea, quibus tenebræ offusæ sunt, & cum eo lux versatur. Tibi Deus maiorum meorum laudem tribuo, gratiasque ago, quod mihi sapientiā & fortitudinem dedisti, mihi que indicasti ea, quæ à te petiuimus, cum somnium regis nobis enunciaueris. Actis Deo gratias, cōtulit se ad Ariochum, cui rex ut coniectores interficeret, impe-

rauerat. Eum rogat, ne Magos perdat, sed se ad Regem introducat, cui somnium suū & narraret, & interpretaretur. Is ad regem illum introducit, eiūque nūciat, adesse illū, qui ipsi somnium explicaret. Cūque rex ab eo quæreret, nū posset sibi somnium interpretari: tum Daniel, Magos & coniectores posse mysterium, quod sciscitaretur, enunciare, negat: profiteturque esse Deum in cœlo, qui enunciaret mysteria, & illi res futuras vltimis tēporibus, aperiret. Somniū autem quod vidisset, esse tale. Eum visum esse videre statuam vnam ingentem, quæ horribili aſpectu ante ipsum staret. Eius caput aureum fuisse, pectus & brachia argentea, aluum & femora anea, tibias ferreas: pedum partem ferream, partem fictilem. Eam ipsum spectasse, quoad lapis abscisus est de monte sine cuiusquam manibus & opera, qui statuæ pedes obtinuisset: quibus obtritis, pariter reliquum corpus deiectum comminutūque sit. Lapidem autē, qui statuam fregerat, versum esse in mōtem altissimum. Propositi autem narratiue ita somnij hanc esse interpretationem. Eum qui regibus cæteris præstaret, & cuius ditioni Deus cœli omnia subiecisset, caput esse illud aureum: regem alterum, qui postea illo inferior esset exorturus, esse pectus & brachia argentea: aluum

Et femora, tertium regem qui vniuerso orbi imperaturus esset: quartum regem, qui, ferri instar, domaret subiugarétque omnia, tibias ferreas: pedum diuersitatem ex materia, significare imperiũ, quod postea diuideretur: admixtionem porrò materiæ significare, fore vt misceantur inter se, nõ tamen cohæreant: lapidem illum qui omnia visus esset obterere, esse Regẽ, quem illis temporibus Deus cœli excitaturus sit, qui nec dissipandus esset, nec ex regno expellendus, vt alteri traderetur: sed regem illum, sempiternum perpetuũque imperium obtenturum esse, victurũque omnia. Rex qui ita somniũ suum vt viderat, narratum, Et verè explicatum intelligeret ac sciret, cùm proiecißet se pronum ad pedes Danielis, eũque veneratus esset, eique vt hostiæ cum thure immolarètur, imperauißet: ipse Deum Danielis Deum deorum esse professus est, dominũque regum, qui mysteria enuncicaret. Hinc eum ornatũ Et donatum magnis multisque donis ac muneribus, cũctis prouinciis Babylonis preposuit, omnibũque diuinis Et cõiectoribus: eiũsque rogatu sociis illius trib. administrandam Babylonem tradidit. Idem rex somnium vidit postea, quo æquè exterritus, ac superiore, cùm fuisset, tamen formã Et rationem eius memoriã tenuit. Itaque conuocatis ex tota

Babylone ad se magis & coniecturibus, non, ut antea, formam illius ab eis requisivit, sed cum illud eis narrasset, eius tantum interpretationem. Somnium autem fuit tale. Videbatur videre arborem excelsissimam, cuius & cacumen cælum pertingebat, & folia pulcherrima erant, & fructus vberissimi, ex quibus vivebant omnia: subter eam habitabant animalia, & in ramis eius aves insidebant. Visus est etiam, eodem fere puncto temporis, videre vigilem quendam & sanctum virum, qui è cælo delapsus, magna voce præcepisset, ut arbor illa præcideretur cum frondibus, foliaque excuterentur, & fructus dispergeretur, a quibus ex frondibus fugatis, & bestiis quæ subter eam habitabant, ita tamen, ut radicem arboris germen in terra remaneret, quod vinculo ferreo & æneo in herbis deligaretur, aerisque rore aspergeretur, ac ferarum instar herbam depasceret, hominisque habitus ac sensus eius in pecuinum verteretur ad septennium. Hoc censuisse vigiles dicebat, hoc sanctos postulasse, ut mortales intelligerent esse excelsum Deum, qui hominibus in regnis imperaret, eaque daret, cuicunque vellet. Somnium hoc cum ceteri auditum interpretari non possent, tandem ventum est ad Danielelem, quem, ut paulò antè dixi, magis coniecturibusque præposuerat. Is

rogatus sententiâ, primùm tacitus per se rei interpretationem cœpit cogitare attentius, atque id cum magna animi conturbatione, propter rei, quæ significabatur, euentum. Deinde cum id rex animaduertisset (apparebant enim in eo non obscura signa cōsternationis) interpretationemque somnij eum soluto liberoque animo proferre iussisset: tum ipse precatus clara voce, ut somnij interpretatio illius hostibus eueniret, ita somniū illud interpretatus est, ut diceret, arborem illam excelsam, regem ipsum esse, qui ita magnus esset ac potens, ut magnitudo eius ad cœlum pertineret, & ad fines orbis potentia: eum autem, qui talis ac tantus esset, tempore quod constituisset Deus, expulsum iri ex regno, atque ex hominū societate, ac cum feris bestiis versaturum, fœnūque bouis instar comesturum, ac rore perfusum iri in agris septennium, dum intelligeret excelsum esse Deum, qui regnum hominum administraret, dētque illud cuicunque velit. Regnum tamen nō omnino illi ereptum iri, sed redditum, cum Dei agnouisset potentiam. Hinc prudens ac vtile consilium regi dedit, quod si sequeretur, mala illa quæ sibi euentura ex his intelligeret, vitaret. Suasit enim, ut egentibus subueniens peccata sua redimeret. Deum enim fortasse peccatis eius propitium futurum. Hæc autem Na-

buchodonosori euenerunt omnia, duodecimo mense post, cum Babylonem à se vno edificatam esse iactaret, septenniòq; expleto, & sensus ei redditus est, & regnum restitutum, maiòrque gloria & dignitas, quàm superior fuisset. Neque verò tum ingratus fuit, sed multis præclarisque verbis gratias egit Deo, eiúsque potentiam se agnoscere professus est: nec puduit eum Epistolam scribere cunctis gentibus, qua & somnium illud suum narrat, & illius à Daniele solo datam interpretationem, & somnii ita, vt dixi, explicati euentum, & ad extremum, regni restitutionem. Quæ quidem omnia cum omnibus ob oculos versari debent, tum vel maximè regibus, magnisque & potentia claris viris, ne sibi tribuant quæ Deo tribuere debent. Mortuo Nabuchodonosore, Belsazar eius filius illi successit in regnum. Is magnificum conuiuium dabat primis regni sui mille, in quo, vt quisque ætate antecederat, ita bibebat: vinolentusque iam & ebrius iusserat pocula aurea & argentea, quæ Nabuchodonosor pater eius ex templo Hierosolymitano asportanda curauerat, proferri, vt in eis biberent cõuiuæ omnes. Bibebat ille iam, bibensque inter pocula deos suos aureos, argenteos, aneos, atque ex alia materia factos, laudabat, cum ecce subito conspiciatur digitos hominis si-

miles, qui scribebant in pariete è regione candelabri in ipso regio palatio. Eius rei tam inusitata, ac noua, spectaculo rex perterritus, Magos & aruspices introduci, quamprimum cum clamore iubet: adhibiti, nec legere quod scriptum erat, potuerunt, nec interpretari, proposito à rege eiusmodi præmio, ut is qui legisset atque interpretatus esset, purpura indueretur, torquem aureum in collo gestaret, tertiūque locū in regno obtineret. Hinc non modò rex maiore animo dolorem cepit, verum etiam principes: neque is dolor ac mœror mitigatus, aut depositus fuisset, nisi Regina Regem, ut bono latòque animo esset, admonuisset, cum dixisset eū habere Danielem, quē pater illius Nabuchodonosor, quòd excelleret laude diuinādi, omnibus Magis præposuisset, cum in maiore negotio eius præstātem artem expertus fuisset. Cum ille iussu regis introductus esset, primū ei rex narrauit, id quod scriptum videret, à Magis nec legi potuisse, nec explanari: deinde commemorauit quæ de artis illius laude & gloria in eiusmodi rebus accepisset. Quæ si vera essent, legerēque illa quæ cerneret, ac interpretari posset, idem præmiū eum esse consequuturum, quod Magis propositū esse dixi. Daniel, munera sibi rex sumeret respondit; aut alteri daret: Nullo enim præmio inuitatum

se, id quod scriptura obscure significaret, interpretaturum. Itaque, re altius usque à Nabuchodonosore rege eius patre repetita, narrauit, quæ admodum ille à Deo regnum, gloriam, & potentiam tantam accepisset, ut ex eo omnes illum metuerent, ipseque & eueheret, quem vellet, & affligeret: sed eum, quod sibi illa omnia, non Deo, tribuisset, nutu Dei expulsus fuisse ex regno, & eiectum ex hominum societate, ac versatum figura fera cum belluis, dum potentiam maiestatemque Dei agnouisset. Ipsum quoque illius filium, qui hæc sciret omnia, quod non abiecisset animum suum, sed in Deum cæli moderatorem ac dominum spiritus sustulisset, in poculis eius aureis & argenteis bibens, laudansque deos aureos & argenteos, qui non vident, nec audiunt, nec sentiunt, spreto contemptoque Deo, cuius in potestate illius essent omnia, status, vita, imperium: Deum ipsum misisse, qui illa scriberet. Eorum autem trium verborum quæ scripta erant, hanc esse sententiã, Deum numerasse regni eius annos, & illum ab eo quasi in lance appensum esse: diuisumque esse eius regnum, & datum Medis atque Persis. Etsi autem hæc Danielis vera interpretatio exitiosa regi erat, tamẽ mercedem eodem puncto temporis ei dedit. Ea verò ipsa nocte interfectus est, & Darius Medus regnum

occupauit. Hic Darius præfecerat regno suo centum viginti, atque illis tres, in his Danielē, quibus gesti negotij rationem referrent, quò liberius in otio viueret. Tanta autem regis fuit de Danielis prudentia opinio, præ cæteris præfectis omnibus, vt eum solum toti regno præficere constitueret. Quod cùm illi intelligerent, molestè acerbèque ferentes, se de gradu deiici, diligenter in eum inquirere cœperunt. De eius fide in munere, quod dixi, fungēdo, cùm nihil obicere possent, nec tamen inuidia eorum conquiesceret, communicato consilio statuerunt, eum apud regem, ob religionem, qua Deum suum colebat, in odium adducere. Itaque ad regem adeuntes, ei persuaferunt, vt edictum faceret immutabile, si quis ad triginta dies aliquid à Deo vel homine, nisi ab eo, peteret, in lacum leonum coniiiceretur. Edictum à Dario factum est, confirmatum & scriptum illorum rogatu, nec tamen Daniel propterea destiterat precari, venerarique Deum supplex tribus temporibus quotidie, idque faciebat apertis fenestris. Quod cùm illi diligentius obseruantes comperissent, tēpus exatiandæ inuidiæ se nactos esse rati, ad regem redeunt: ei edictum suum redigūt in memoriam: cuius cùm illum memorem vidissent, & supplicij, quod in violatorem constituisset, tum deni-

que Daniele illud violasse Dei sui veneratio-
ne probauerunt. Rex, qui Daniele plurimi, ut
dixi, faceret, ex eo nuncio maximum animo do-
lorem cepit primum, deinde omni ratione ad solis
occasum contendit, ut eum à constituta pœna
liberaret, sed illis morem Medorum atque Per-
sarum, ut omne regis decretum immutari non pos-
sit, proferentibus, nihil profecit. Itaque iussu eius
productum, in lacum leonum coniecerunt. Rex
autem eum Deo suo commendauit, à quo libera-
tum iri speraret, ac ne quid iniuriæ illi fieret, sa-
xum quod annulo suo, annulisque primorum re-
gni obsignauit, ori lacus apposuit. Tàmque gra-
uiter tulit tam fidelis serui casum, ut in regiam re-
uersus, nec cibum ceperit, nec, cum præ mæro-
re incœnatus cubitum iuisset, dormire potuerit.
Prima luce surgens à lecto, properè ad locum se
contulit, Danieléque nomine suo appellato,
querere cœpit, num eum Deus suus liberare po-
tuisset. Daniel ex lacu saluus & incolumis re-
spondit, Deum suum misisse angelum, qui ora
leonum ita obstruxisset, ut nihil ipsi nocuissent,
quod virtuti consentaneas actiones in ipso inue-
nisset: quin ne ei quidem se unquam peccasse di-
xit. Darius Danielis salute vehementer gaui-
sus, eum educi iussit, in quo nihil mali, nullum-
que vulnus inuentum est, cum summa & regis

& omnium admiratione . Accusatores autem eius, eorūque liberi & uxores, iussu regis, cū in lacum essent coniecti, supplicij causa, puncto temporis deuorati, cōsumptique sunt à leonibus . Hoc tam admirabili euentu adductus rex Darius, Epistolam scripsit cunctis nationibus, qua significauit, se edictum fecisse, vt omnes sui metuerent & vererentur Danielis Deum, quippe qui Deus vnus & aternus esset, cuius & regnum nunquam dissiparetur, & potestas esset sempiterna : qui salutem daret, mirāque opera & cœlo & terra ederet, Danielémque à leonibus liberaisset . Narrabo etiam hoc loco alterum eiusdem generis euentum, nō minus mirabilem . Astyage rege mortuo, Cyrus Persa regnum eius occupauerat, cui Daniele nemo erat familiarior, nemo charior, nemo denique apud illum in maiore honore erat & precio . Is simulachrum Babyloniorum, Belem nomine, cui quotidie similæ artabæ duodecim, id est, sextarij septuaginta duo, oues quadraginta, vinique amphoræ sex, quasi ea omnia caperet ac deuoraret, dabantur, quotidie colebat : Daniel autem, Deum . Quod cū rex animaduertisset, quærere ex eo cœpit, quid ita Belem non veneraretur . Responderat ipse, non simulachra manu & opere hominum facta venerari, sed Deum viuum, qui cælum

terrâmq; cōdidisset: cū rex rursus ab eo quærere cœpit, an non illi Bel viuus videretur, quem tam multa comedere & bibere animaduverteret. Ad hæc subridens idem, regem monuerat, ne in errore diutius versaretur, credens viuere & comedere, qui intrinsecus luteus, extrinsecus aeneus esset, cū ira incitatus Cyrus, accersiuit sacerdotes Belis septuaginta, quibus mortē minatus est, nisi indicarent, quisnam illa, quæ Beli quotidie apponerentur, comederet ac biberet: sin docerēt Belem esse, moriendum esse dixit Danieli, qui dixisset in Belem. Daniel conditionem accipit: Venit in templum cum rege: sacerdotes, accepta etiam conditione, admonent regem, quò res esset testator, vt ipse esculenta & poculenta apponat, fores occludat, obsignetque annulo suo, ac postridie ingrediatur, atque rem experiatur, vt obseruata compertaque veritate, vel ipsi interficerentur, vel Daniel. Erat autem mensa in templo, in qua illa omnia apponebantur, & subter eam cuniculos quosdam fecerant sacerdotes, per quos ingressi noctu cum liberis & vxoribus deuorarūt omnia, vt soliti erāt. Quod cū Daniel resciuisset, antè quàm fores occluderentur, per pueros allatum cinerem coram rege sparsit, vt eorum fraus deprehenderetur. Prima autem luce, regem in templum, veri comperiendi cau-

sa, euntem sequitur: Rex, qui fraudis sacerdotum ignarus esset, aperto ostio, cum ex eo mensam inanem aspexisset, exclamat, Magnum Deum esse Belem, atque cum fraude & dolo carere. Daniel, qui illorum fraudem, ut dixi, cognitam haberet, subridens, introire volentem regem arceat, monetque ut animadvertat, cuius vestigia sint quæ in cinere impressa cernat. Cyrus virorum, mulierum, ac puerorum, illa esse respondet, acciti sacerdotes cum mulieribus & pueris iussu regis, qui præ iracundia vix cōtinebat manus, introitus per quos ingressi noctu, esculenta & poculenta sumere soliti erant, ostendunt, ac tum denique ex regis cōditione, quam, ut docui, acceperant, morte mulctantur. Daniel traditum sibi Belem eiusque templum diruit. Erat ibidem draco miræ magnitudinis, quem Babylonij colebant. Cyrus autem, quod is viueret ac coleretur pro Deo, causam se inuenisse existimabat, cur Daniel illum necessariò venerari deberet, quasi verò hoc ipso tantum Belem colere velle se negaret, quod non viueret. Itaque eum cōueniens, obiecit, nihil illū habere iam, quin draconē, qui viueret, veneraretur. Ipse respondit, se Deū suū, qui viuus esset, colere: draconē autem non esse Deum, quem ipse, qui homo esset, si daretur potestas, sine gladio interficere posset. Data à rege

potestate, picem, adipem & pilos vnâ coxit, & in os draconis ingessit, quibus statim diruptus est: tûmque ridens Babylonius dixit, illum esse deum, quem colerent. Babylonij hac re adacti penè ad insaniã, vniuersi clamare, Iudæum regẽ factum esse, qui Belem diruisset, draconem interfecisset, ac morte mulctasset sacerdotes. His verbis inter se alij alios concitantes, adeunt ad regẽ, cui, rei atrocitate exposita, minantur, nisi Daniele sibi traderet, & mortem, & familiæ exitium. Minis illorum coactus rex, Daniele dedit eorum libidini, quem in lacum leonum coniiciunt. Sex ibi diebus fuit, quibus nihil leonibus septem præbuerunt, quò ab eis auidius deuoraretur, cùm antea semper quotidie duo cadauera, duæque oues darentur. Erat tñ Abacuc propheta in Iudæa, qui coctam pultem intritumque panem rus ad messores ferebat, ei se angelus Dei ostendens, præceperat, vt prædium quod haberet, Babylonem portaret ad Danielẽ, qui in fouea leonum esset: cùm ille nec Babylonem se vidisse dixit, nec foueam scire. Angelus autem apprehenso eius capillo, Babylonem transportatum, ad lacum posuit. Inde Abacuc Daniele nomine appellat, admonetque, vt prandium, quod ad eum Deus misisset, sumat. Daniel pro tãto Dei in se beneficio actis gratiis, comedit.

comedit. Septimo die, rex ad foueam lugendi Danielis causa venit, quem cum saluum & incolumem ibi sedentem inter leones aspexisset, magna voce clamauit, Magnus es Domine Deus Danielis. Eo autem extracto & educto, eos omnes, qui exitij eius auctores fuerant, coniecit in foueam, iique subito deuorati sunt à leonibus. His duobus præclaris facinoribus sibi ac vitæ suæ benignitate Dei consuluit, Dei veri ac viui defendens cultum atque religionē: eo quod sequitur, proximum suum ab iniusta morte liberauit. Habebat vir quidam Babylone, Iocim nomine, acceperatque uxorem, cui nomen Susanna erat, Helcia filiam, honesta facie mulierem, & quod plurius faciendum est, verentem Deum ac colentem. Parentes enim eius cum iusti bonique essent, lege Moysis eam instituerant. In eius virtutibus prima & maxima erat castimonia, quæ rarò cum pulchritudine corporis coniuncta reperitur, nec vnquam adduci potuit obiecto dedecore, aut morte constituta ex lege, ut sibi stuprum pateretur afferri. Nam cum vir eius locuples esset, haberetque pomarium proximum ædibus, in quod, abluendi corporis causa, illa sæpè remotis arbitris secedere solebat, senesque duo, qui Iudices creati erant, domum Iocim plerunque venientes, eam semper in horto obseruassent,

tandemque aliquando, explenda libidinis tempus
nacti, ut sibi videbantur, ad eam solam soli ac-
cessisset, ac multis primum illecebris pudicitiam
eius tentassent, deinde, consuetudinem stupri pe-
nitius denegantem, eò perducere se posse existi-
marent, si stupri cum adolescentibus consuetudi-
nem ei se obiecturos minarentur, quod ex lege
crimen capitis erat: illa in semel suscepto propo-
sitoque seruanda pudicitia consilio permansit. Si-
quidem in eo discrimine posita, ut vel Deo pec-
caret, amissa pudicitia, si constupradam se tra-
deret, vel morte mulctaretur ex lege illorum duo-
rum testimonio, si eorum libidini obfisteret, salua
eadem: maluit in illorum manus, id est, in peri-
culum vitæ huius incidere, salua retentâque pu-
dicitia, quàm ea amissa, salua autem vita, Dei
voluntatem offendere. Itaque magna voce cla-
mare coepit, idemque fecerunt senes. Famuli exau-
dita dominæ voce, statim per posticum accur-
runt: audientes senes, qui eam à se deprehensam
in adulterio dicebant, quod nihil unquam tale
de ea auditione accepissent, non solum valde mi-
rantur, sed etiam erubescunt. Ne rem protra-
ham, postridie accusatur Susanna, illorum testi-
monio cõdemnatur. Illa quæ nihil iam sibi præ-
sidij in hominibus constitutum intelligeret, Deum
ut sibi consuleret, his verbis precata est, Deus

æterne, qui consiliorū animi es cognitor, omniā-
que scis, antè quàm fiāt, scis falsum esse istorum
in me testimonium, & tamen rapior ad mortē,
nisi tu sis innocentie meæ præsidio. Eam Deus
audiuit, excitato in Daniele, tum etiam puero,
suo spiritu, qui, cū illa ad mortem duceretur,
clamauit primū in turba, se non affinem cul-
pæ esse, qua Susannæ innocentis sanguis profun-
deretur: deinde cū populus quæreret, quænam
esset illa eius oratio, respōdit falsum esse illorum
in eam testimonium, itaque redirent iudices ad
iudicium. Iudices cū ei fide habita, iterum de
causa cognituri certiūs, eum, vt sessum secū ve-
niret, monuissent, ipse testes illos duos secer-
nendos censuit. Secretos sigillatim rogat, subter
quam arborem, adolescentem Susannæ stuprum
inferre vidissent. Cū vterque non eandē, sed
diuersam nominasset, re cognita, omnes qui ad-
erant, acclamare, ac laudare Deum, qui serua-
ret eos, qui in ipso spes suas sitas haberent. Hinc
ex lege in senes illos duos poena capitis animad-
uerterunt. Quo ex iudicio Daniel in posterum
magnum apud populum cōsequutus est & glo-
riam, & auctoritatē. Multa ei Deus per Ga-
brielem angelum de regibus Persidis, Græciæ,
& Aegypti, multa de Christi regno, multa de
restitutione Hierosolymorum, Hierosolymita-

norumque reductione enunciauit, quæ in libro, qui nomine eius inter sacrosanctos habetur, explanata sunt. Babylone autem mortuus est, ac sepultus in Regiæ spelunca, ut scribit Epiphanius, qui ait etiam eius sepulchrum ætate sua omnibus notissimum fuisse.

ABACVC PROPHETA.



ABACVC Prophetæ, agri Bexchochereni ex tribu Simeonia fuit, ut ait Epiphanius, fugitque relicta patria in Ostracinam Ismaelitarum regionem, cum Nabuchodonosorem infesto exercitu, delendam urbis Hierosolymæ causa, aduentare intellexisset. Ibi habitauit, quoad certior factus est, Chaldaeos, capta direptamque urbem, cum spoliis & captiuis redire in patriam, & reliquos Iudæos, in his Hieremiâ & Baruch, ut in eorum vita docui, in Aegyptum habitandi causa proficisci. Tum enim in patriam reuersus est. Seuerat post reditum, quoto anno incertum est, ordeum, idque messe appetente messoribus decerpendum colligendumque locauerat. Cumque prædium paratum ad eos portaret, an-

gelus Dei ei se ostendens, præcepit, vt illud Danieli, qui Babylone in fouea leonum erat, ferret. Ipse responderat angelo, se nec Babylonem vidisse vnquam, nec scire foueam, cum ille eum capillo arrepto Babylonem transportatum, ad os foueæ collocauit. Ex ore foueæ appellato nomine Daniele, eum monuit de prandio, quod ipsi Deus mitteret. Cum Daniel, laudato Deo, qui non immemor esset eorum, qui in se sp̃e collocarent, actisque ei gratius pro eiusmodi beneficio, pulsem coctā, intritumque panem ex Abacuc manibus sumpsisset, angelus Dei pūcto temporis eum in eundem locum reportauit. Sunt qui confirmēt, in his Epiphanius, eū qui antè quàm eò deferretur, rem futuram prænoscere, se suis procul profecturum esse prædixisse, atque mox rediturum: quod si diutiùs abesset, messoribus pararent, quæ ad victum pertinebant: eum verò eo ipso die rediisse, atque interuenisse coenantibus etiā messoribus. In sacrosanctis libris habetur liber perbreuis, qui inscriptus est eius nomine. Principio libri vehemētius cum Deo expostulat, quod bonos improbi vincant & exagitant, sed aduentu Christi, qui bonos liberaturus & seruaturus esset, prædicto à Deo, æquior factus, in precibus, quæ Christi vim & potentiam indicant, desinit. In Iudæa autem, biennio

antè quàm Hierosolymitani ex Chaldaea reduceretur, vt ait Epiphanius, excessit è vita x viij Calend. Februarij: eiusque corpus, Deo patefaciente, Archadio imperatore inuentum est.

SOPHONIAS PROPHETA.

SOPHONIAS Propheta, Chusi patre, ex tribu Simeonia natus est. Is, Iosia Ammonis filio rege Iudæ vaticinat^o est quæ eo libro, qui eius nomine in sacrosanctis habetur, continentur. Terret primùm, deinde consolatur. Prædicat Hierosolymitanorum captiuitatè ob scelera quæ enumerat, cùm omniũ, tum principum, & iudicum: diemque illum terroris causa nominibus appellat, quæ horrore hominibus afferre solent. Prædicat etiã multarum nationum exitium, vt Aethiopum, Assyriorum, Moabitarum, atque Palaestinorum. Extremo libro, de Christi aduentu & resurrectione, Gentiumque ad eum conuersione, disserit. Mortuus est, ac sepultus solus in agro suo, vt Epiphanius scribit.

AGGAEVS PROPHETA.

AGGAEVS prophetiæ munere, iussu Dei, admodum adolescens functus est anno se-

cundo Darij Histapis, primùm apud Zorobabelem Salathielis filium, & Iesum Iosedeci filium sacerdotem, deinde apud sacerdotes. Eius prophetiæ causa fuit eiusmodi. Cùm Cyri regis iussu anno primo populus Iudaicus Hierusalem reductus, ædificandi tēpli Dei causa, diceret, nondum venisse eius ædificandi tempus, Aggæus missus est à Deo, qui diceret Zorobabeli duci, & Iesu Iosedeci filio, populum hoc falsum dicere, nondum venisse tempus domus Dei ædificandæ, cùm venisset, ob eamque causam prætermissa structura, quæ magna copia seuissent, per exiguum fructum tulissent, retenta pluuia. Itaque diligenter opus instituerent, atque absoluerent. Hanc Aggæi, aut Dei potius, orationem duo illi approbarunt, & illorum opera populus omnis. Cùmque sexto mēse eiusdem anni xxiiij die iam cœptum esset opus, rursus missus est ad duos illos, quos dixi, & ad reliquum populum, primùm, ut duos illos ad pergendum hortaretur, quòd ipsis opem ferret Deus: deinde nuntiaret omnibus, templum illud nouum vetus superaturum esse gloria, propter aduentum Dei, qui immineret. Viceesimo quarto noni mensis die iterum missus est, qui diceret, confessione sacerdotū extorta à simili & inductione, quæ in templo donaria Deo deferrent, ea illi minus grata & ac-

cepta esse: & tamen tam gratū eidem esse opus iactorum iam fundamentorum templi, vt deinceps fruges auclurus esset. Eodē die rursum missus, prædixit, Zorobabelis nomine, Christi aduentum & gloriam. Aggæus hic, non solum iussu Dei, Zorobabeli & Iesu sacerdoti, templi ædificandi venisse tempus nunciauit, verum etiam cum ei credidissent, eos in opere perficiendo iuuat, nec solum vt opifex, sed etiam nouo genere canēdi. Ibi enim primus omnium Alleluia cecinisse, cum Zacharia propheta dicitur, quod verbum hebraicum idem quod, laudate Deum, declarat. Itaque Alleluia, hymnus & laus Aggæi Zachariæq; dicitur. Migravit autem à vita ibidem, & ad sacerdotum sepulchra cum honore sepultus est.

ZACHARIAS PROPHETA.

ZACHARIAS propheta, patrem habuit Barachiam Addonis filium. Is vaticinari cœpit eodem anno, quo Aggæus, id est secūdo Dary regis. sed octauo mense, cum ille primo sexti mensis die cœpisset. Diutius autem, quàm ille vaticinatus est, & pluribus. Nam & quarto etiam Dary anno functus est propheta munere, & liber qui eius nomine inscriptus in sacro-

sanctis habetur, multò plures versus cõplectitur. Principio libri, iussu Dei, populo Iudaico, qui iam reductus erat è Babylone, præcipit, ut ad eum reuertatur, quòd ita demum ipse ad eos reuersurus esset: ne ita viuant, ut eorum maiores, qui priorum prophetarum, ipsos à vita flagitiosa ad sanctam deducentium, præcepta semper contempsissent: ne mentiantur, sed, quod verum est, proximis suis dicant: Verè atque amicè iudicent: ne malum animo proximis moliantur: ne iusiurandum falsum ament. hæc enim esse, quæ Deus odisset. Ieiunia etiam singula singulorum mensium, quarti, quinti, septimi, atque decimi, solennia voluit esse. Hæc si facerent, eos omnia quæ sererent esse percepturos cum fœnore & abundantia. Prædixit aduentum Christi Hierosolymã in asina, eiúsque proditiõis precium. Ei ostēdit Deus Iesum Iosedeci filium, sacerdotem magnum stantē coram angelo suo, Satanámque ad dextram stantem, ut ei aduersaretur. Quem cū Deus obiurgasset, mutatione vestium condonata ei peccata esse significauit per angelum, eūque iudicem futurum, si præceptis ipsius obtemperaret. Quarto Darij anno, quarto die mēsis noni, id est Nouembris, quidam, in his Sarsar & Rogommelech, Hierosolymam miserāt, consultum sacerdotes ac prophetas, num flere

quinto mense deberent in posterum, & abstinere, ut iam superioribus temporibus annisque multis fecissent. Deus autem Zachariam prophetico spiritu afflatum & permotum, iussit querere à populo regionis, & sacerdotibus, num ipsi septuaginta annis, quibus exules fuissent, cum seruarent ieiunium quinto & septimo mense, Deo ieiunassent: aut cum caperent cibum & biberent, num eidem comedissent ac bibissent: his verbis declarans Deus sibi grata non fuisse eorum ieiunia, prandia atque cœnas, quod cum benignitatis, misericordiæque operibus coniuncta non fuissent, quemadmodum eos admonuisset per superiores prophetas: eoque factum esse, ut in eos concitatus, in omnes ipsos regiones dispersisset. Multa etiam alia prædicit, quæ non sunt huius instituti. Idem & Iosedeco prædixit, ut ait Epiphanius, fore ut filium procrearet, qui Deo in templo sacerdos seruiret, & Salathieli, ut generaret Zorobabelem. Sunt, ut ait Hieronymus, qui volunt hunc esse Zachariam, quem Christus apud Matthæum inter templum & altare interfectum esse confirmat. Epiphanius autem hoc ad Zachariam Ioannis Baptiste patrem refert in eius vita, huncque scribit senem admodum mortuum esse in Iudæa, sepultumque ad Aggeum prophetam.

ESDRAS PROPHETA ET SCRIBA.

ESDRAS propheta & scriba, ex tribu Leuina Saraia patre natus est. Is Artaxerxe rege Babylo-
ne, vt ipse ait, captiuus fuit, & tricesimo ferè anno post deletam Hierosolymam vaticinari cœpit. Mentionem in libro vaticinationis facit Malachia propheta, qui tamen reducto iam populo natus dicitur: Itaque hoc prophetico spiritu permotus prædixisse existimandus est. Sed quoniam vitam resque gestas Esdrae scribimus, ordo tēporum in eis exponendis, quandiu licebit, nobis seruādus est. Cyri quidem regis Persarum anno primo, quo septuaginta anni captiuitatis prædicti à Hieremia, expleti sunt, illius concessu, cum Zorobabele duce, & Iesu Iosedecifilio, sacerdote, ac cæteris qui eos sequi voluerāt, Hierosolymā, adificandi templi causa, Esdras hic profectus est. Quandiu autem ibi fuerit, incertum est. Rediit enim Babylonem postea, septimoque Artaxerxis anno, inde Hierosolymā, illius cōcessu, cum multis reuersus est, ita vt cū profecti esset Babylone primo die mensis primi, Hierosolymam primo quinti mensis die peruenerint. Quæ eius profectio vel reuersio, cur, et quæadmodum eue-

nerit, aut procurata ſit, quoniã ad eius ſummam laudem pertinet, exponẽdum cenſui. Opus quidem templi Hieroſolymitani, quod Cyri edictò cœptum, hoſtium Hieroſolymitanorum odio & inuidia intermiſſum fuerat, Darij regis ſexto anno, tertio menſis duodecimi die abſolutum eſt. Anno autem ſeptimo Artaxerxis Darij filij, cùm ipſe benignitate Dei plurimum apud regem poſſet, cùm ob maximas virtutes, quibus erat præditus, tum quòd eum doctiſſimum legis Dei ſcribam ſciret eſſe, petenti, vt Hieroſolymã cum popularibus ſuis qui vellent, legis ſcribendæ explanandæque cauſa proficiſceretur, non ſolùm conceſſit libentiſſimè, verùm etiam diploma ei dedit, ex quo, quàm apud illum gratioſus eſſet, facile intelligi poteſt. Diplomatis autem illius exẽplum eſt eiufmodi. Artaxerxes rex regum Eſdræ ſacerdoti, ſcribæ doctiſſimo legis Dei cœli, Salutem. A me edictum factum eſt, vt tecum Hieroſolymam proficiſcatur qui volet, ex regno meo, de populo Iſraelitico, ſacerdotibus, & Leuitis. A me enim de conſilio & ſententia ſeptem conſiliariorum meorum miſſus es, vt in Iudæa & Hieroſolymis legẽ Dei tui, quam tenes, doceas & explanes, proponãſque omnibus: ferãſque aurum & argentum, quod ego cõſiliariique mei vltro ac ſponte obtulimus Deo Iſrae-

lis, cuius templum est Hierosolymis. Quod si populus, qui est in regione, aurum & argentum dare voluerit, id omne tibi accipere per me licet, eoque emere vitulos, arietes, agnos, aliâque ad sacrificia necessaria, quæ in templo Dei tui offeras: ac si quid argenti auri ve reliquû fuerit, tibi ac tuis, ex Dei vestri voluntate, quod placuerit faciatis. Vasa etiam, quæ tibi traduntur ad rem diuinam in templo Dei tui procurandam, ibi cura, ut præstò sint. Quod si quid præterea ibi desit, aut absit, id velim à præfectis meis, quos trans flumen fisco meo præposui, petas. Hoc enim eis edicto meo imperavi, ne fortè Deus tuus, & mihi successeat, & liberis meis: itémque ut ij qui rem diuinâ procurant, immunes omnino sint. Tibi quoque fas esto pro potestate statuere, ac dare iudices atque præfectos pro Dei tui sapientia, qua es præditus, qui ius dicant populo Dei tui. Eis autem, qui legi Dei tui non parebunt, neque huic edicto meo, ius tibi esto constituere pœnam siue exilij, siue capitis, siue carceris, siue mulctam dicere. Esdras hoc accepto diplomate, cum regi coràm gratias egisset, Deo etiam per se gratias egit, quod Regis animum ad honorandum honestadumque templum suum flexisset, fecissetque pro sua in ipsum benignitate, ut apud Regem, consiliariosque eius ac prin-

cipes ea in re valuisset gratia . Ex hoc autem edicto, primo die mensis primi, anno septimo, rege ipso Artaxerxe, profectus Babylone Esdras, ingentem multitudinem popularium suorum, ad fluuiū, qui in Ahauam flumen influit, conuocauit . Ibi triduum cum eis commoratus, cum Leuitas in populo & sacerdotibus quæritos non inuenisset, misit vndecim principes ac sapientes ad Eddo fratresque eius, qui audita legatione eò cōuenerunt. Indicto autem omnibus ieiunio, ad Ahauam, vt precarentur Deum, vt sibi omnia in itinere prosperè euenire vellet, (neque enim ausus erat ipse petere à Rege cohortem, aut equites qui omnes tutò deducerent, sed sibi ac suis præsidium Dei non defuturum dixerat) inde, duodecimo die, digressus est. Quod precatus erat cum cæteris à Deo, vt omnia sibi prosperè in via acciderent, id ita euenit, vt cum quinti demum mensis die primo Hierosolymam peruenerint, tamen nihil mali senserint, neque hostiū insidiis aut malis sint oppressi. Hierosolymam cum venisset, quarto die, omnia in templo Dei, ex edicto Regis, perficienda curauit. Idem paulò post boni sapientisque ducis officio functus est. Contra Dei præceptū, & legem, multi cum exteris coniugia contraxerant: quod cum principes Esdra narraissent, ipse discissa veste

& pallio, euulsisque pilis & capitis & barba, tristis ante templum sedebat: eoque in vultu & habitu permāsit, vsque ad sacrificium quod fiebat vesperi, cum ad eum conuenissent omnes, qui Deum metuebant, & religiosè colebant, ob aliorum violationē & scelus. In sacro illo cum surrexisset, flexis poplitibus, demisso vultu, passis manibus, professus est Deo, se pudore prohiberi, ne ad ipsum vultum attolleret, quòd scelera & maiorum, & populi qui tum esset, multitudine & gravitate infinita esset, eorumq; causa iure eos deditos fuisse libidini nationum. Cum hæc multaque alia Esdras Deo in precibus fateretur, conuenit ingēs turba virorum, mulierum, puerorumque flentium. In iis Sechenias vnus pro omnibus apud Esdram verba fecit, se atque ceteros omnes Dei legem violasse, & accepisse uxores alieni generis, sed tamen, si poenitentiae locus esset, se atq; illos fædus cum Deo esse percussuros, quo promitterent se uxores cum liberis natis ex eis repudiaturos esse ex Dei consilio, & eorum qui cum religiosè colerent, vt legi Dei omnes parerent. Itaque surgeret ipse, cuius esset de hoc toto negotio statuere. Cum surrexisset, iureiurando adegit & obstrinxit sacerdotes ac Leuitas primos, omnemque Israelem, se ex Sechenia verbis esse facturos. Cum iureiurando con-

firmassent, nō antè cepit cibum, & bibit, quàm consensu omnium imperatum esset, vt intra tri-
duum omnes tribus Iudainæ & Beniamini in
Hierosolymam, vt statuerant principes & ma-
iores natu, conuenirent, pœnâque esset, iis qui ad
diem non venirent, facultatum priuatio, & ex
cœtu populi Dei eiection. Tertius dies incidit in
vicesimū mensis noni, eiusdem anni, diem, quo,
vt sancitum pœna fuerat, omnes conuenerunt
Hierosolymam. Cū sedissent omnes in area
templi, Esdras surgens, exposuit eis tremētibz
sceleris causa & nomine, quàm graue scelus ad-
misset, quòd vxores alieni generis accepisset,
sed tamen veniam à Deo, ita denique eos impe-
tratos esse, si vxores illas repudiarent, & à
nationibus illis se disiungerent ac secernerent.
Omnes magna voce ita se facturos dixerant,
sed quoniam ingentem multitudinem esse scirēt,
atque remillā nō esse vnius diei, præsertim cū
pluuia vrgeret, rogarunt eum, vt deligerentur
principes, qui cū senibus, statis diebus, de iis, qui
vocarentur, statuerent. Cū hoc placuisset, eis
dimissis, ipse cum delectis iudicibus primo deci-
mi mensis die, sedere cœpit constitutis in locis, vt
rem quærerent: eâque diligentia ab eis adhibita
est, vt calendis primi mensis confectum sit ne-
gotium. Ita expiatis omnibus, se postea ad legem

Dei recitandam rogatu omnium contulit. Id factum est mense septimo, id est, Septembri, qui erat ferè totus apud Iudæos Dei religioni ac cultui, ob dies festos, dicatus. Igitur calendis eius mensis, cum infinitus numerus virorum ac mulierum ex Urbibus ac vicis, Vtriusque tribus, id est, Iudainæ ac Beniaminiæ, Hierosolymam ad aream, quæ portæ aquarum adiuncta erat, conuenisset, Esdras omnium rogatu, ex scripto legem Mosaicam, à prima luce ad meridiem stans, ex gradu ligneo, qui eius rei causa factus fuerat, facta audientia recitauit. Cum lex ita clara voce, ut omnes exaudirèt, ab eo recitaretur, omnes flebant. Quod intelligens Esdras, monuit eos, ne flerent, quòd dies ille Deo consecratus esset: itaque abirent, cibumque caperent cum gaudio. Postero Die, principes familiarum vniuersi populi, sacerdotes ac Leuitæ, adeuntes ad eum, illum, ut sibi atque aliis verba legis interpretaretur, rogarunt. Quoniamque scriptum legerant, præcepisse Deum Moysi, ut Israeliticus populus die festo Tabernaculorum, qui septem dies complectebatur, contexeret sibi tentoria ex virgultis frondibusque arborum, in quibus habitarent, iussu illius contexta sunt: ac tum denique quotidie ad septimum diem, ipse eis legis verba recitabat, & interpretabatur. Quo tempore di-

citur Psalmis Davidis Inscriptiones, quas legimus, & quibus ad eum diem caruerant, addidisse. Dies autem festus Tabernaculorum, agebatur à decimoquinto Septembris die, ad secundum & vicesimum, octauusque dies erat celeberrimus: quibus consumptis in recitanda, explanandaque, ut dixi, lege, quarto & vicesimo ieiuni, atque ciliciis amicti, operti que pulvere omnes conuenerunt, demisso vultu confitentes de peccatis, cum lachrymis, repudiatisque alieni generis vxoribus. Esdras multis verbis Deo & laudes tribuit, & egit gratias, & illius in populum suum beneficia exposuit, & maiorum atque eorum, qui tum erant, scelera commemorauit, quorum causa in populū suum Deus semper animaduertisset, nec tamen pro eo ac potuisset, de eo sumpsisset supplicium: ad extremum eius cohortatione percusserunt fœdus cum Deo, quo se eius legem obseruaturos esse promiserūt, idque obsignarunt plurimi. Tricesimo anno post deletam, ut dixi, Hierosolymam, Babylone vaticinatus est, multa que vidit somnia, & visa illi obiecta sunt obscura, quæ Vriel angelus Dei explanauit, cum eorum optaret & requireret interpretationem. His autem tot, tamque præclaris rebus gestis, Hierosolymis excessit è vita.

MALACHIAS PROPHETA.



MALACHIAS propheta tribus
 Zabulonæ. Is post reditum po-
 puli à Babylone natus est, postre-
 mûsque vaticinandi functus est
 munere. Præclaram honestam-
 que vitam eum egisse à puero Epiphanius scri-
 bit, quòdque populus illum vt pium & cle-
 mentem coleret, ab eo appellatum esse Mala-
 chi, id est, angelum. Prædixit multa de Christi
 aduentu, & expiatione. Obiurgat acriter sa-
 cerdotes Iudæorum, quòd Deum honore nō affi-
 ciant, hostiàsque ei illo indignas immolent, qui-
 bus spretis, Gētium sacrificium Deo acceptum
 fore prædicit. Eum, cum etiam tum iuue-
 nis esset, mortuum esse, idem Epi-
 phanius memoriæ prodidit.
 Idibus Maij obiit.

LIBRI SANCTORVM

DEI PROPHETARVM

F I N I S.

IOACHIMI PERIONII

BENEDICTINI CORMOEBRIACENI,
de vitis sanctarum mulierum ve-
teris Testamenti, Liber.

Eux primæ mulieris, & omnium
parentis, vita.

EV A prima mulier & parens
omnium, non, ut procreatio
peruulgata hominum fert,
patre & matre nata est, sed
nouo miróq; modo, ex Ada-
mo primo homine solo, cui
postea nupsit, Dei procura-
tione duxit originē. Nam, cum Deus ex nihilo
vi sua prepotēti principio factis cælo & terra,
tāquam rerum seminario & cœlestium & ter-
renarum omnium, primóque die, quē Domini-
cum à Domini nostri resurrectione appellamus,
luce creata: secundo, firmamento, quod cœlum
appellatum est, cum aquas, quæ subter firma-
mentum sitæ erant, ab iis quæ super illud erant
secreuisset: tertio, terra & mari, cum aquas quæ
terram obruebant, vnum in locum contulisset:
herbisque & arboribus omnium generum, quæ
iussu eius subitò semen, fruges, fructúsque; protu-

lerunt: quarto, sole, luna, & stellis: quinto, piscibus atque auibus: sexto, primum bestiis, deinde Adamo ex limo terræ, ad imaginem & similitudinem suam: cum eum in paradisum hortumque amœnissimum, eius excolendi causa, introduxisset, neque ei adiutor similis & commodus, quo illum carere non æquum censebat, inueniretur, ob eamque causam faciendum decreuisset: fecit, ut ille graui somno opprimeretur, eoque dormiente, accepit costarum eius vnā, ex qua mulierem, quæ Eua appellata est ab Adamo, finxit. Eam Adamus, cum ad illum Deus adduxisset, spiritus prophetici afflatu & permotione intelligens id quod factum fuerat, Euam dixit, os esse quod ex ossibus suis, ac carnem, quæ ex carne sua sumpta esset, ob eamque causam illam, ut interpretes dicunt, Viraginem vocatum iri, quod sumpta esset ex viro. Atque hoc est nouum & mirum Eux, quod dixi, genus originis. Deus ita fictis Adamo & Eua ad imaginem ac similitudinē suam, animi mentisque munere, Euam in horto amœnissimo, qui paradysus terrenus dicitur, & in quo Adamum iam, ut dixi, collocauerat, cum eo reliquit: voluitque ex omnium arborum fructu vtrunque victitare, præterquam vnius, quæ arbor scientiæ boni & mali appellabatur, cuius fructu, ut

abstinerent, præcepit, morte poena violati præcepti constituta. Hoc loco quàm fragile fuerit, ab exordio & initio suo genus hominum, facile intelligi potest, quantaque iam tum in illud inuidia diabolus flagrare cœperit. Erat enim eis hoc præceptum facile obseruare, cùm in tanta arborum copia & abundantia, huius vnus vetitus esset fructus, præsertim tam graui supplicio, si violassent, cōstituto, nec vllas in animo & corpore sentirent illecebras voluptatis: & tamen diaboli inuidia sola, obliti & salutis suæ, & suorum, illud statim violauerunt. Nam diabolus serpētis specie & figura ad Eux veniens, cùm eā primum rogasset, cur ipsi atq; viro Deus vetuisset, ne arboris sciētiae boni ac mali fructu vescerentur, atque illa prudenter respondisset, sibi atque viro, cōcessu Dei, licere ex cæterarum arborum fructu edere, ex fructu autē illius, quam diceret, nō licere, ne morte mulctaretur, aut interirent: deinde hoc protulisset, eos nō esse mortuos, Deum scire, quacunque hora comederent, fore, vt & eorum oculi aperirentur, & ipsi, vt Dū, bonum & malum scirent: hoc vno verbo, quo eis scientiam parem Dei scientiæ pollicebarur, illi facile persuasit, vt hoc fructu contra Dei præceptum, morte etiam certa proposita, & animi, & corporis, vesceretur: nec sola ipsa ve-

sceretur, sed viro etiã persuaderet, vt vesceretur, ne sola tanti boni, quod vtrique ille promitteret, fieret particeps. Quo quidem loco liberet deplorare generis hominum miseras, quæ ei hoc esu partæ sunt, si esset nostri instituti. Itaque iis tãtum, quæ sunt huius loci propria, contenti esse debemus. Eua & Adamus, vt primum fructum degustarunt, aliquas violati præcepti pœnas dederunt. Nam qui ad illud tempus nudi sine vllò pudore ex naturæ aspectu fuerat, statim cõtextis ex foliis fici subligaculis, naturam operuerunt, & exaudita voce Dei in paradiso à meridie inambulantis, eius conspectum fugientes, inter arbores se abdiderunt. In quo mirari licet, eorum peccato inductam ignoratõe, qui cùm tanta Dei rerumque omnium scientia præditi esset, & ornat, tamen Deum ex hominum natura aestimabant, quasi ipse abditos ac delitescentes non videat, qui omniũ etiam animi consiliorum scrutator & contemplator est. Itaque multum eos fefellit opinio. Inuenit enim vtrunque, quem peccato vulneratũ, non, vt perderet, quærebat: sed, vt curaret, atque sanaret. Ac primum quidem Adamum, qui, vt vir, cautioresse debuerat, aggreditur, & ex eo, vbi sit, querit: non quòd quem in locum ille se abdidiſſet, ignoraret, sed vt respondendo eum haberet de pec-

cato contentem. Deinde cum respondisset, se, exaudita eius voce, timuisse, propterea quod nudus esset, ob eamque causam se occultasse: quasi setque Deus, quisnam ipsi se nudum esse dixisset, nisi quod ex fructu, quem vetuisset, comedisset: atque ille respondisset, non agnoscens culpam, sed in alterum conferens, mulierem, quam ipsi sociam dedisset, fructum obtulisse, ex quo edisset: tum Eam rogat, cur id fecerit. Illa eodem modo quo vir, in serpentem culpam conferens, se deceptam ab eo comedisset respondet. Tum Deus non, cur hoc fecerit serpens, querit, sed primum ut totius mali auctorem condemnat: hoc ipso docens, querendum semper esse mali & peccati auctorem, ut poenam primus, quippe qui principium eius sit & caput, ac sine quo malum omnino sequutum non fuisset, coercetur. Poenam statuit in serpentem, quod eius specie, in fallenda captandaque Eva, diabolus usus esset, id est, detestationem maiorem, quam in quodvis aliud animans, & ingressum non pedum praesidio, sed pectoris, terraeque deuotionem pro cibo. Supplicium aliud statuit in diabolum mali caput, æternas inter eum & mulierem, ac semen utriusque, inimicitias: ita tamen ut Eux semen, id est, Christus, eius caput obtereret. Eux autem dixit Deus, fore ut supplicij causa eius conceptus

ac dolores multiplicaret, ipsa긑ue cum dolore filios pareret, ac viri subesset potestati, qui ei dominaretur. In Adamum verò hanc tulit, pronunciauitque sententiam. Quoniam uxori suadenti paruisti, & ex fructu, quem vetueram; comedisti: & terra ex opere tuo execrationem sumet, & tu ex ea per omne vitæ tuæ tēpus cum mœrore comedes, dum tibi vepres & carduos edet: & cum sudore tibi ea parabis quæ ad vitam sunt necessaria, quoad reuertare ad terram vnde sumptus es. Priuata hæc Adami & Eux supplicia, commune vtrique excepit. Contextis enim expellibus vtrique tunicis, amictos ex loco illo amœnissimo, colendæ terræ causa, eiecit: ac ne eò rediret, ante portā, Cherubim, qui viam illuc ferentem custodiret, gladium micantem & versatilem tenentem, locauit. Ita eiecti ex foelicissimo beatissimòque loco in hunc miseriæ plenissimum, liberis operam dederūt, quàm mox incertum est, concepitque Eua ac peperit filium cui nomen Cain imposuit, quòd diceret se hominem habuisse Dei benignitate. Alterum etiam Adamo peperit, cui nomen Abelis imposuit. Hunc Cain inuidia incitatus occidit, quòd opera illius probari ac placere Deo cerneret, sua verò displicere. Abel autem pecuariam colebat, opimòsque gregis sui arietes Deo immola-

bat: Cain verò agriculturam sequebatur, nec Deo manipulos plenos offerebat. Cuius ex morte quantum doloris Eva ceperit, hinc intelligi potest, quòd cùm annos nata centum & triginta alium filium peperisset, memor etiam tum non sine dolore Abelis, eū Seth appellavit, quòd Deus sibi aliud semen dedisset pro Abele, quem Cain interfecerat. Quanquā autem Deo tā grauitur, vt dixi, peccauit, tamen expulsa cū viro, ex loco illo amœnissimo, in hunc miseriæ ac tristitiæ plenum locum, in quo Deus remedium salutis hominibus nunquam eripuit: eius munere ita vixit, vt partim illius cultu ac religione, partim præclara liberorum institutione & educatione, partim iustitia aduersus omnes seruanda, hinc ad cœlum tandem euolasse credatur.

Saræ Abrahami vxoris vita.

SARAE Thare Abrahami patre, ex altera vxore, vt nonnullis placet, vel Aram eiusdem Abrahami fratre, vt alij tradunt, nata est. Ea Abrahamo, cū etiam tum Abram, id est, Pater excelsus, appellabatur, nupsit: Saraique tū etiam dicebatur, id est, Domina mea, Sara autem, id est, Domina, cur

appellata sit, & Abram Abrahamus, id est, Pater multitudinis, siue multarum Gētium, dicemus idoneo loco. Ordinem enim temporum in scribenda illius vita, ne confusio perturbatioque rerum consequatur, seruabimus. Incolebāt quidem ipsa & vir eius Abrahamus, vrbe Chaldaeorum Vram nomine, ex qua cū migrare instituisset Thare Abrahami, vt dixi, pater, cum vtroque, & Lot Aram Abrahami patruī filio, id est, patruele, profectiōem suscepit in regionem Chananæorum: cūque Haran venisset, ibi cum eis habitauit. Eo autem ibi mortuo, cū ducentessimū & quintum annū ageret, Abrahamo annos nato quinque & septuaginta, per quietē & visum præcepit Deus, vt relicta patria, in regionem, quam illi mōstraret, proficisceretur. Sic enim fore, vt magnū clarūque eius nomen redderet, Gētēsque eius causa & nomine, vt nostri loquuntur, benedicerentur. Abrahamum præcepto Dei parentem sequuta est Sara, seque ei non solum comitem itineris, sed laborum quoque ac periculorum sociam præbuit. Obita magna ex parte Chananæorum regione, fame coacti in Aegyptum secedebant, cūque ad eius fines peruenisset, rogauit aut monuit Sarā vir suus, vt se ipsius sororem esse diceret, ne si Aegyptij vxorem esse cognouisset, forma

illius capti, eum ipsius causa, vt ea liberè poterentur, interficerent. Hoc cum illi pollicita esset se esse dicturam, *Ægypti* fines ingrediuntur, *Ægypti* animaduersa eius præstanti forma, statim cucurrerūt *Reginunciatū*, venisse egregia forma fœminam. Quo nūcio letus Rex, primum eam cum *Abrahamo* & *Lot* in Regiam introduci, deinde, ea retēta, ibi in proximo illos habitare iussit, cum intellexisset, qui essent, & vnde, & quò proficiscerētur, sed maximè cum ex ipso illam eius sororem esse comperisset. Ita seruata viro fide, non solum eum à mortis discrimine liberauit, id quod vnū ille optabat, verum etiam in causa fuit, vt humanè à Rege, qui eam vxorem accipere instituerat, haberetur, & ab eo beneficia acciperet. Oues enim, boues, asinos, seruos, famulas, asinas, & camelos ei dedit. Sed neque diu illa fuit in Regia *Pharaonis*, neque ei nupsit. Eius enim causa, id est, quòd eam *Pharao* rapuisset, *Deus* eum maximis malis, Regiamque illius affecit, quo malò coactus, cum in quiete illi, vxorem *Abrahami* esse enunciasset, subito accersitum illum acerbè obiurgauit, quòd illam sororem suam, quæ vxor esset, dixisset esse, redditæque illi *Sara*, deducēdos illos, cum bonis omnibus, commisit suis. Illi reuersi eodem, vnde profecti fuerant in *Ægyptum*, in Cha-

nanæorum regione habitarunt, cùm Lot aliam
 delegisset. Deus nec ita multò pòst cum Abra-
 hamo fœdus fecit, promisitque se daturum eius
 semini quicquid inter fluuiũ AEgypti & Eu-
 phratem sitũ esset. Quod cùm ille Sara exposuis-
 set, ipsa quæ sterilem se videbat, eum rogauit,
 vt Agar ancillam suam AEgyptiam, vxorem
 duceret, si fortè ex ea susciperet liberos. Duxit
 eam illius consensu & rogatu, decimo anno post
 quàm in regione Chananaeorum habitare cœpis-
 sent. Ea ex Abrahamo grauidata, contempse-
 rat dominam: quod ipsa molestè ferens, quæsta
 est apud virum de iniuria, quòd cùm ei ancillam
 suam vxorem dedisset, illa tamen quæ se conce-
 pisse cognosceret, dominam suam contemneret.
 Itaque optabat, sibi dari Deum eius controuer-
 sia iudicem vel arbitrum. Abrahamus, ne illi
 maioris doloris causam daret, ea in re, quæ cõtra
 ius erat, hoc tantum rēspõdit, ei per se licere
 quod vellent statuere in ancillam, in quam impe-
 rium haberet. In quo, vtriusque in alterum fides
 & submissio mutua perspici potest: Sara, quæ
 sine concessu viri nihil in ancillam ab officio di-
 scedẽtem voluerit statuere: Abrahami, qui do-
 minæ in seruam, quam concessu illius in matri-
 monio habebat, ius violare noluerit. Sara ergo,
 quæ ius suum in ancillā saluum intelligeret, con-

sensu viri, in eam malè ac seuerè consulebat, cum illa, fugâ irâ Dominæ, atque adeò verbera vitanda censuit. Eam cum inuenisset angelus fugientem, quasita cognitâque fuga causa, iussit redire ad Dominam, & erga illam se submisit gerere. Quod cum fecisset, placidiore & æquiore, quàm antea, vsa est. Post vrbes Sodomorum & Gomorrhæorum de cælo tactas & deletas, Abrahamus cum vxore in fines Geraræ, ex patria, habitâdi causa, profectus erat. Ibi Saram non vxorem priuatim & publicè appellabat, sed sororem. Quod cum Abimelech Rex Geraræ auditione accepisset, eam rapuit. Antè quàm cum ea consuetudinem haberet, Deus in quiete, mortẽ ei, mulieris quàm viro rapuerat, causa, minatus est, quæ sequeretur quamprimum, nisi eam viro suo redderet. Cum ille non malo animo, sed ignarum & imprudentem se id fecisse dixisset, quod Abrahamus illam sororem suam esse confirmaret, Sara Abrahamum fratrem: hoc se scire dixit Deus, ob eamque causam fecisse ne peccaret. Nocte eadem surgens statim Abimelech, suis omnibus hæc narrauit omnia, quibus vehementer perterriti sunt: Abrahamoque, cum eũ obiurgasset, reddita vxore, vtrunque cum muneribus dimisit, facta, vbicunque vellent, habitandi potestate. Sara autem præter-

ea dixit, mille argenteos Abrahamo dedisse, qui essent testes omnibus illius pudoris, eam monēs, ut quocunque perrexisset, se deprehensam esse meminisset. Sara erat, iam ut dixi, sterilis, tantumque atate procefferat, ut ei fieri muliebria desinerēt, cum Deus eo ipso die, quo cum Abrahamus, specie trium viatorū siue hospitum, exceperat, ei promisit fore, ut illa conciperet ac pareret filium. Ipsa autem hoc audiens, post ostium tabernaculi, clam riserat, quasi hoc fieri nō posset, quod & ipsa anus esset, & vir ferē centum annos natus esset. Ob eamque causam Deus, cui nihil occultū est, nihil incognitū, ab Abrahamo quasierat, cur illa risisset, dicens secum in animo, anum parere non posse, quasi Deo aliquid esset difficile: ipsa q̄; timore perterrita egrediēs, se risisse negauerat, cum Deus ipse eam reffellit. Risum hunc eius, & verba, plerique ad illius diffidentiam referunt: sed qui ea admirationis esse dicet, non aberrabit. Ipsa quidem certe exemplo mulieribus esse potest, quas se erga viros gerere debeant, quemadmodum etiam Petrus Apostolus monet. Abrahamum enim virum, Dominum suum appellabat. Quod non solum verbo, sed re etiam, exequebatur, ei in iis quæ virtuti consentanea sunt, obtemperās. Exemplum vnum proferam, ex quo de cæteris

licebit iudicare. Abrahamo Deus, vt paulò antè docui, specietrium peregrinorum se ostendit in conualle Mambra sedenti meridie ante ostium tabernaculi sui. Cùm rogatu illius, se velle cibum capere dixisset, nō ancillis, quas multas habebat, sed Saræ huic, vxori, præcepit vt panē, quem ei apponeret, faceret. Ipsa officium tam sordidum non detrectauit, se vxorem esse dicens, ancillāsque nominās, quibus eiusmodi negotium mandaret, non sibi, quæ ancilla non esset, sed vltro ac sponte, & libenter munus impositum est executā. Ex quo intelligi par est, Abrahamum, qui virtute hospitalitatis excelluit, Sarā vxorem semper eius in colēda illa habuisse in simili re sociam & participem. Cōstituto à Deo tempore, concepit, peperitque filium, cui Isaac nomen imposuit, cum summa & sua & omnium admiratione: Erat enim nonaginta annos nata, & Abrahamus ferè centum. Eidem Deus Ecclesiæ Gentium, testamētōrumque duorum mysterium enunciauit. Nam cùm Ismaelem Agar ancillæ filium, cum Isaac filio suo ludentem vidisset, atque adeò eum exagitantē, quæstāq; esset apud virum, egißetque cum eo, vt Ismaelem cum matre eiiceret: ille autem hæc verba eius grauitè tulisset, quòd Agar vxorem duxisset illius concessu, ex qua Ismaelem suscepisset:

Deus

Deus illum monuit, ne durum & asperum putaret, quod illa dixisset, quin ei illa in re obtemperaret, propterea quod ex Isaac, semen, id est Christus, ei nasceretur. Itaque iussu Dei, vtrunque domo expulit. Hac cum gessisset, aliaque præclara permulta, centesimo vicesimo septimo ætatis anno, Sara in ciuitate Arbee, quæ Hebron dicebatur, excessit à vita. Eius mortis nūcio accepto Abrahamus venit, eamque luxit, ac sepeliuit in specu duplici, agri quem & antrum ab Hethæis quadringentis siclis, eius rei causa, post officium funeris emit, in qua etiam sepultus est.

Rebecca vxoris Isaac vita.

REBECCA parentem habuit Bathuelem (neque enim matris nomen inuenio) Nachor fratris Abrahami ex Melcha filium. Ea nata est in Mesopotamia, diuinitusque Isaac Abrahami filio nupsit. Nam cum Abrahamus in senectutem, annos natus ferè centum & quadraginta, compulsus, Isaac filium iam quadragessimū annum agentē, vxorem ducere nollet regionis Chanaanæorū, in qua iussu Dei habitabat: seruum maximum natu,

quem rebus suis omnibus praposuerat, accersitum, posita manu subter femur suum, iureiurando obstrinxit, non accepturum vxorem regionis illius Isaac ipsius filio, sed profecturum in Mesopotamiam, vnde illuc venisset: confirmauitque dubitanti ac diffidenti, sperare se angelum Dei ducem itineris ei futurum, quo duce omnia vtrique ex animi sentetia Dei nutu succederet. Seruus hac domini oratione confirmatus, sumptis decem camelis, armillis & in aure, aliisque omnibus, quae necessaria erant viatori, in tam longo difficilique itinere, se in viam dedit. Iam oppido, in quo Nachor Abrahami frater sedem rerum suarum delegerat, appropinquauerat vesperti, quo tempore mulieres solitae erant egredi hauriedae aquae causa, ex fonte qui ibi erat, cum ipse quasi diuino afflatu permotus rogauit Deum, vt Abrahamum dominum suum respiceret, faceretque, vt virgo à qua peteret aquam ex hydria, & sibi & iumentis suis, ea esset, quam vxorem domini sui filio preparasset. Nondum haec secum in animo dicendi finem fecerat, cum venit Rebecca haec, cuius vitam scribimus, virgo honestissima facie, gestans humero hydriam: hausit aquam ex fonte. Seruus ab ea petiit aquam, & sibi & camelis, quam libenter dantem, tacitus contemplabatur, experiundi causa, num ea

esset, quæ domini sui filio preparata esset Dei benignitate. Quod quasi auguraretur, prolatis in aure & armillis, primum rogauit, cuius esset filia, & num domi patris sibi liceret commorari: deinde cum Bathuelis, Nachor fratris Abrahami, filiam se esse respondisset, ac locum domi patris sui ad diuersandum superesse, dedit ei & in aures & armillas. Illa eis acceptis, statim domum paternam rediit nunciatum, quæ audierat & viderat. Interim seruus Deo egit gratias, quod tam benignè fecisset Abrahamo domino suo. Laban Rebecca frater, qui domi tum erat, cum in aures & armillas in manibus sororis vidisset, audissetque omnia, quæ vir ille exposuisset, egressus, eum rogauit, vt, quod bonum, felix, faustumque esset, ingrederetur: paratum enim ei esse, & camelis, locum. Introductus, cum stragulis camelorum detractis, eis paleæ ac fœnum à Laban præberentur, illique apponeretur panis, negauit se quicquam capturum esse, nisi antè negotium, quod ipsi mandatum fuisset, ac cuius causa venisset, exponeret. Facta dicendi potestate, se seruum esse dicit Abrahami, qui valde locuples esset: eiusque vxorẽ, Saram nomine, senem seni filiũ peperisse, cui nomen Isaac impositum fuisset, & cui pater sua dedisset omnia. Se ad actum iurisiurandi religione, mis-

sum esse, ut vxorem illi eius filio, generis sui ac propinquitatis, quæreret. Cæteraque omnia, quæ paulò antè narraui, exposuit. Quæ omnia cum Bathuel & Laban, à Deo profecta & procurata esse dixissent, cui repugnare nefas esset: Rebecca ostendentes, eam illi perducēdi ad Isaac fecere potestatem. Seruus consequutus id quod dominus volebat, supplex Deo egit gratias. Vasaque argentea & aurea Rebecca muneri dedit, fratriq; eius & matri munera obtulit. Tum vnà, summa cum voluptate epulari, cubitum omnes ierunt. Prima luce surgens seruus eos rogat, ut se dimittant: quod cum illi denegarent, nisi ad decimū diem, sibi abeundum quamprimum dixit, quod Deus prosperè sibi in via omnia euenire voluisset. Illi cum hoc impetrare non possent, accersendam virginem censuerunt, & interrogandam, num cum illo vellet proficisci. Illa interrogata, etiam se ire velle respondit. Ita ei beneprecātes, omniāque prosperè euenire in via optantes, dimiserunt eos. Cum perducta fuisset, Isaac in matris suæ tabernaculum introductam, duxit vxorem, eamque tam vehementer amauit, ut dolorem lenierit, quā morte matris ceperat. Sterilis quidē etiam illa fuit, sed Isaac precibus adductus Deus, ei, vicesimo anno post, conceptum dedit. Duos autem simul

concepit, qui in aluo quasi colluctabatur. Quod cum illa sentiret, dicebat, si sic futurum erat, nihil sibi opus fuisse concipere. Itaque ignara mysterij, consulendum sibi Deum censuit. Deus respondit, duas gentes esse in eius utero, duosque populos ex illius aluo diuidendos, & populum à populo superatum iri, maioremque minoris seruum futurum. Quod de populo Israelitico & Gentium est intelligendum, siue de Ecclesia & Synagoga. Cum tempus pariendo venisset, inuenti sunt gemini: qui prior prodiit, rufus erat, totusque, pellis instar, hirsutus, ex eoque Esau ei impositum est nomen: posterior statim post illum egrediens, manu pedem fratris tenebat, ob eamque causam Iacob appellatus est. Cum adoleuissent, Esau venator egregius euasit, agricultura dans operam. Iacob autem simplex vitæ genus sequutus est, habitans in tabernaculis. Esau Isaac patri charus erat, quod ex eius venatione vesceretur. Itaque cum ita confectus senio fuisset, ut eius oculi cecutirent, illum accersitum monuit, ut quoniam senuisset, ignoraretque mortis aduentantis diem, sumeret venabula sua, & arcum, ac si quid prædæ caperet, conditum & paratum cibum, sicuti cupere se sciebat, apponeret, ex quo cum edisset, omnia ei leta & prospera ante mortem precaretur. Hoc cum Rebecca resci-

uisset, Iacob quem amabat, (ferè enim fit, ut si quos pater liberos præcipuè diligit, non eos mater, sed alios amet) cùm iam Esau venatû iuisset, accersit: cùm venisset, ei exponit quæ audierat: consiliûmque dat, & ex grege duos hœdos optimos deligat, quos cùm attulisset, pararet ipsa cibum, quo pater ipsius libenter vesceretur, quem edendum illi cùm apposuisset, prosperè ipsi euenire optaret omnia. Iacob primû, ut patrem verens, respondet, cùm Esau frater, ut ipsa probè sciret, hispîdus & asper esset, ipse autè lauis, metuere se, si pater ipsum tractaret, atque agnosceret, ne sibi factas insidias putans, non ipsi bene, sed malè precaretur. Deinde cùm mater addidisset, si quid malè precaretur pater, id quò minus sibi eueniret, non recusare se, atque adeò optare: itaque tantû parèret consilio suo: abiit ille, attulit hœdos, ac matri dedit. Ipsa escam paratam ex senis palato & gustatu, quem nouerat, cum pane, Iacob ad patrem perferendum tradit, cùm eum vestibus Esau induisset, hœdiniisque pellibus manus eius, collûmque texisset, ut illius speciem asperitate ipsa præferret. Ingreditur ille ita amictus, patrem vocat, ei quærenti, quis sit, respondet se esse Esau maiorem natu filium. Pater eum tractat: cùm tractasset, vocem quidem & sermonem Iacob esse

dicit, sed Esau manus. Neque hoc tantum facit,
 sed querit etiam, nūc esset Esau filius suus: cū-
 que se esse respondisset, ei escam ut afferat, præ-
 cipit, qua capta ei bene diceret, siue bene preca-
 retur. Cū ei pater fausta omnia precatus esset,
 atque in iis fratres suos illius seruos esse voluis-
 set, discessit. Vix autem absoluto patris sermone,
 Iacob egressus erat, cū Esau intrans, patrem
 appellat: pater quis sit, rogat: cū se Esau maio-
 rem natu illius filium esse respondisset, Isaac ob-
 stupefcit, & supra fidem admirans, querit, quis-
 nam ille sit, qui paulò antè, per fraudem & per
 insidias, illius, ut nostri dicunt, benedictionem
 præripuisset. Ut breue faciam, ex hoc facto,
 Iacob tanta apud Esau inuidia flagrauit, ut de
 interficiendo eo iam tum cogitare cœperit. Consi-
 lij illius tamen nefarij certior facta Rebecca mater,
 Iacob filiū accersit, eique & illud exponit, &
 suadet, ut ad certum tempus, dum illius ira de-
 ferbuisset, & conquieuisset, ad Laban auuncu-
 lum in Mesopotamiam fugeret, vnde cum post-
 ea, sedato fratris furore, reuocaret. Quod quò
 commodius fieret, viro suo confirmat se nolle
 viuere, si Iacob regionis ac loci illius vxorē ac-
 ciperet. Itaque Isaac accersitum Iacob filiū, mi-
 sit in Mesopotamiam Syriæ domum Bathuelis
 patris matris suæ, ut ibi ex filiabus eius duceret

Vxorem, vetans ne ex Chananæis duceret. Patris præcepto parēs Iacob, eò profectus est, duasque Laban, Rebecca matris fratris, duxit vxores, quæadmodum in eius vita diximus, & mox in vtriusq; vxoris eius vita docebimus. Quando autem postea Rebecca vixerit, inuenire non potui: certè non est mādātum diuinis literis.

Lia vxoris Iacob vita.

LIA Laban, fratre Rebecca matris Iacob, patre nata est in Mesopotamia. Quod de ea scriptum inueni ferè cum Rachelis vita coniunctum est: sed tamen separatim, quæ sunt vtriusque propria, narrabo. Lia quidem maior erat natu Rachele sorore, ac de eius forma aliquid lippi oculi detraxerant. In Mesopotamia autem in mōre positum erat, vt maiores natu filia priores nuberent, & vt quæque ætate antecederat, ita collocaretur. Cuius moris ignarus Iacob, pro Rachele suppositam ea de causa Liam habuit, quod quæadmodum acciderit, commemorandum est. Iacob quidē vitandi Esau fratris odij causa, cōsilio matris primum, deinde patris præcepto, vt aliquam Laban filiam, qui Rebecca eius matris frater erat,

Vxorem duceret, domum illius in Mesopotamiam profectus est. Ibi cum triginta dies commoratus esset, Laban cognita causa itineris, eum seruire sibi nolens sine mercede, ab eo quaesivit, quam mercedem exigeret. Iacob, qui Rachelem formæ causa sibi dari mallebat, pro ea se in illius famulatu annos septem futurum respondit. Laban accepit conditionem, malle se dicens illi tradere, quam alteri. Confecto annorum septem curriculo, Iacob cum socero agit, ut sibi nuptui tradat filiam minorem, quemadmodum promiserat. Inuitat ille ad conuiuium nuptiarum amicos: vespere cum cœnati esset opiparè & lautè, ut illis temporibus, pro Rachele in tenebris supposita est Lia, quam cum manè animaduertisset, fraudis ignarus, egit cum socero iniuriarum. Is autem nihil aliud causæ dixit, nisi quod paulò antè dictum est, non esse moris ibi minores natu filias ante maiores, nuptui tradere. Itaque expleto septem dierum spacio cum Lia, se illi alteram quoque traditurum spondit, dum modò pro ea septem aliis annis seruiret. Exacta hebdomada, Rachelem ille quidem accepit vxorem, accepta conditione: sed quoniam eam Lia anteponebat, chariorèque habebat, fœcundam Liam Deus esse voluit, sterilem Rachelem. Quatuor enim liberos, Ruben, Simeonem, Leui, atque Iudam

intra paucos annos peperit, cisque hæc imposuit nomina ex causis, quas in partu cuiusque afferebat. Ruben enim, videns, siue videns filium, dicitur: eiusque nominis impositi hanc afferebat causam, quòd Deus ipsius humilitatem respexisset. Simeon autem, audiens appellatur: eumque ita vocauit, quòd audita esset à Deo. Leui, copulatus vocatur: quo eum appellauit nomine, quòd diceret fore, vt rursus cū ipsa Iacob congrederetur & copularetur. Iudas verò, idē quod confessio aut laudatio, efficit: & quia in eo pariendo se iam Deum laudaturam esse dixit, ipsi nomen hoc imposuit. Cū hos quatuor peperisset, parere desuit. Die dicto nuptiis, ei pater Zelfhan dederat. Eam, cū se desuisse parere sentiret, exemplo sororis, quæ Balam ancillam suam Iacob viro vxorem dederat, ex qua filium Dan nomine suscepisset, illi vxorem dedit, quæ conceptum filium edidit, quem Lia Gad, quòd in eius partu, Feliciter, dixisset, vocauit. Ipsa quintum peperit postea, hac occasione. Ruben eius maximus natus filius, rus, cū triticum metere-tur, concesserat. Ibi mandragoras reperit, dedit-que matri. Ea, cū partem earum Rachel soror petiisset, denegauerat, ex postulans cum ea, quasi non satis ei esset, quòd maritum ipsi præripuisset, nisi etiam mādragoras filij auferret, cū illa pe-

pigit concubitus viri cum ea noctis consequentis, pro mandragoris. Accepta conditione, viro Lia rem exposuit vespere rure redeunti, qui cum ea congressus illa ipsa nocte, ipsam gravidam reliquit, statoque tempore ea filium peperit, quem appellavit Issachar, dicens, Deum sibi mercedem dedisse, quod viro vxorem dedisset ancillam suam. Sextum præterea peperit, manente etiam sterili Rachele, eumque Zabulon nuncupavit, quod diceret secum etiam vna habitaturum virum suum. Filiam quoque peperit, Dinam nomine: de qua aliquid dicendum est, quod matres, in custodienda filiarum pudicitia, reddet cautiore. Iacob rediens cum vxoribus suis ac liberis, iussu Dei, ex Mesopotamia, in patriam suam, cum Salem Sichimorum vrbe transisset, aliquandiu ad oppidum habitavit. Interea Dina hæc Lia filia, inscia matre, egressa, vt loci illius mulieres videret, rapta à Sichem Hemor filio, vique oppressa est. Quæ si domi ipsa se continuisset, aut mater eam retinuisset (quãquam hoc ci vitio vertendum non puto) profecto integra ei sua pudicitia mansisset. Sed ad historie ordinem reuertamur. Lia & sororis eius consensu, Iacob, cum à Deo oraculum accepisset, in patriam ad Isaac patrem redire constituerat. In itinere traiecto vado Iacob, eminus conspicatus Esau fra-

trem venientem, diuisis suis omnibus in tres turmas, Liam ac liberos eius in secundo ordine locauit. Peruenerunt tandem in regionem Chanaanorum, ibique Lia mortua est, & sepulta in spelunca duplici, quæ est in agro Ephronis Hethæi, quæ cum antro ipso, ab illo Abrahamus emerat.

Rachelis vxoris Iacob vita.

RACHEL Laban, Rebecca vxoris Isaac fratrem, patrem habuit. Ea Iacob Isaac filio nupsit, ex eoque grauida duos liberos peperit, Ioseph, & Benjamin, illum in Mesopotamia, hunc haud procul ab oppido Bethleem, cum Iacob relicta Mesopotamia, iussu Dei, in patriam reuerteretur, cuius partus difficultate & dolore mortua est. Sed melius est, sigillatim & ordine omnia, quæ de illa mandata sunt diuinis literis, exponere, quod facilius & planius res tota intelligatur. Iacob vetuerat Isaac pater, partim querelis impulsus Rebecca vxoris, partim diuino admonitu, ne vxorem loci, quem incolebat, id est, Chanaan, duceret: sed ad Laban auunculum suum profectus, in Mesopotamiam, aliquam illius filiam. Is precepto patris obtemperans, cum oppido in quo Laban

habitabat, appropinquasset, de via fessus, ad puteum quendā constitit, ad quem opiliones greges suos aquatum solebāt ducere: sed nisi omnes greges conuenissent, saxum quod semper ori putei, aquatis ouibus, admonebatur, detrudi non solebat. Itaque iam eò tres greges ouium conue-
nerant, quorum pastores, qui alios expectabāt, cū animaduertisset Iacob, propius accedens quæsiuit ex iis, vnde essent. Cū respondissent, oppidi siue vici Haran, et rursum rogasset, nos-
sent ne Laban, & num valeret, responderant & se illum nosse, & cum valere, cū Rache-
lem gregem suum ducentem videntes, eam illi Laban filiam esse dicunt. Iacob hoc nuncio læ-
tus, ad puteum accessit, detrusoque lapide ex ore, ad aquauit eius gregem primum, deinde eam of-
culatus cum clamore flere cœpit, indicauitque se Rebecca sororis illius patris esse filium. Rachel hoc etiam nuncio læta, properè domum remiuit patri nunciatum. Laban cū rem accepisset, ei
prodiit obuiā, illūque amplexus & osculatus, domum suam officiosè deduxit. Ibi cognita pro-
fectionis eius causa, quam exposui, respōdit La-
ban, illū os suum esse, & carnem. Expletisque
triginta diebus, ei dixit, quanquam propinquus
ipsius erat, tamen non gratis eum fore in famu-
latu. Itaque eum inquit dicere, quid mercedis ac-

cipere vellet. Erant Laban filiae duae, maiornatu Lia, quae lippis erat oculis, ex eoque deformior, & Rachel minor, sed honesta & eleganti facie. Eam alteri anteferebat, septem annis pro illa se seruiturum esse promisit, qua conditione accepta, exactis annis illis septem, egit cum Laban, ut filiam daret. Ille, constituto die nuptiis, inuitat amicos, die ipso vespere in lecto non Rachel cubat, sed Lia pro ea supposita. Mane cum eam lucis munere agnouisset, quam cum iam, Rachelem esse putas, concubisset, partim erubuit, partim iratus, socerum grauiter obiurgauit, quod se ita fefellisset. Laban nihil aliud causae dixit, nisi non esse ibi in more positum, ut minores natu filiae, ante maiores collocarentur. Quod si hebdomada illa solenni transacta, se alius septem annis seruiturum ac ministraturum esse promitteret, nuptui etiam traditum iri minore, quam posceret. Spondet ilico, expletisque septem illis diebus solennibus, Rachelem ducit uxorem. Ea, quod Liam praeter illa contemneret Iacob, diu sterilis fuit, quod cum moleste ipsa ferret, inuidere coepit sorori, quae iam quatuor pepererat filios. Itaque minaciter virum monuerat, nisi sibi liberos daret, fore, ut moreretur: cum ille se negauit esse Deum, qui eam sterilem esse voluisset. Ipsa Balam ancillam, quam ei pater suus dederat, se ha-

bere dixit, qua ducta vxore, cum ea congregaretur, vt ex ea haberet filios. Bala ex concubitu Iacob concepit, peperitque filium, quem Rachel Dan appellauit, quod ipsi Deus iudicasset. Dan enim hebraïco sermone, iudicium, siue iudicās dicitur. Nec verò ancillæ filio dolor, quem ex sterilitate capiebat maiore, propter æmulam sororem, lenitus aut mitigatus est. Itaque Deū, vt non iam ancillæ, sed sibi liberos daret, precabatur: & tantisper in eo officio fuit, quoad eam audiuit, dans illi filium, qui fratres sapientia & potentia longè multumque superauit: Ioseph dico, qui à fratribus proditus & veditus, in Aegypto propter diuinandi artem, qua instructus fuit, secundum locum tenuit, plurimumque duris aduersisque rebus cum fratribus profuit, tum patri seni. Ei autem nomen illud, quod accessionem declarat, imposuit, propterea quod optaret vt sibi Deus alterum daret. Iacob cum Ioseph ei Rachel peperisset, egerat cū socero, vt sibi in patriam cum liberis, vxoribus, rebúsque omnibus, redeundi potestatem faceret. Ille qui agnosceret, ac fateretur, sibi eius causa prosperè euenisse, & amplificata esse omnia, dabat operam, vt eum retinere posset. Itaque ab eo quæsierat, quid mercedis exigeret, cum ille nihil se petere respondit, sed tantum vt quæ variorum colorum oues

párerent, ea pro mercede acciperet. Cùm Laban conditio placuisset, atque Iacob arte quadam fecisset, ut oues variorum colorum agnos ferè párerent, qua ratione locupletissimus euasit: tum ex eo Laban Iacob cœpit inuidere. Quod cùm ille animaduertisset, rem totam Liæ & Racheli exposuit, Deique præceptum de repetenda patria. Ita de earum consilio & sententia, absente socero, se dat in viam. Rachel autem deos patris clàm furata erat. Itaque Laban cùm domũ tertio die rediens, omnes abiisse, ac deos suos surreptos esse cognouisset, accitis fratribus, eos septē diebus persequutus est, atque in mōte Galaad assequutus, primũ cùm Iacob exposulauit, quòd clam se absente ita discessisset, ut nō licuisset filias et nepotes osculari, eĩsq; fausta omnia optare: deinde quòd idola sua furatus esset. Iacob se de clandestino discessu purgauit, quòd vereretur, ne si adfuisset, vi auferret filias suas: de furto, respondit, se quominus is apud quem inuenirentur dii eius, necaretur in conspectu fratrum, nō recusare. Itaque ei scrutari licere. Neque enim à Rachele raptos sciebat. Laban facta potestate, primũ in Iacob & Liæ, ac vtriusque famulæ tentorium ingressus, scrutari cœpit: cùm ibi non inuenisset, intrauit in Rachelis tentorium: ipsa properè sub stramento cameli deos patris abdi-

derat,

derat, in quo sedens scrutantem patrem, nec inuenientem, rogauit, ne molestè ferret, quòd sibi ipsa, quæ muliebria pateretur, nō assurgeret. Sic re infecta discessit. Rachel autē paulò pòst, antè quàm in patriã suam eã Iacob perduxisset, in loco qui fert Bethleem cùm parturiret, dolore ipso partus edidit spiritum. In dolore tamen prodeūtem filium, Benoni, id est, filium doloris mei, nūcupauit: cui Benjamin, id est, filiū dextræ, nomē imposuit pater. Sepulta est autē eodem in loco.

Mariæ Mosis & Aaronis sororis vita.

MARIA Aaronis & Mosis soror, Amram & Iochabed parentibus tribus Leuinæ siue Leuiticæ nata est. Nam Amram pater eorum, Caath Leui filiū patrem habuit. Ea prophetis in diuinis libris appellatur, maiórque natus fuit Aarone & Mose fratribus. Id quod ex principio libri, qui Exodus inscriptus est, intelligere possumus. Ibi enim & Aaronem Mose fratre maiorem tribus annis fuisse scriptum est, & sororem Mosis, cùm tres mēses natus à matre expositus fuit in flumine, sterisse procul euentum rei considerantem, & quæsisse ex Pharaonis filia, quæ infantis miserebatur,

num Vellet pueri matrem, quæ illum educaret, accerferet: quæ quidem interrogatio maioris est filia, quàm tertium annum ageris. Sororem autem illā Mosis fuisse Mariam hanc, hinc sciri potest, quòd & hæc sola eius soror fuisse dicitur, & Iosephus illā fuisse scribit. Itaque quoniam hoc facinus ad eius laudem pertinet, pluribus exponendum censi. Mortuo Ioseph, qui secundum regem in Ægypto plurimum poterat, & Iacob patrem, fratresque suos undecim cū uxoribus & liberis, in Ægyptū ex regione Chanaanorum, Dei nutu, habitandi causa, euocauerat, rex alius, qui Ioseph eiusque in maiores suos reges atque populū beneficia ignoraret, ob eamque causam, populum Dei, qui iam tum Israeliticus à Iacob, qui Israel, iussu Dei, appellatus est, dicebatur, acerbè molestéque ferret augeri, Veritus ne cum hostibus suis cōiungeretur: conuocauerat populum suum, eique hæc cū exposuisset, primum oneribus grauissimis illi imponendis in opere quod instituerat, persuaserat facile impediri posse tam magnum numerum: deinde cū intellexisset, rem minus ex animi sui sententia procedere, sed hoc ipso magis Israelitarum numerum crescere, aliam rationem inire cœpit. Obstetricibus enim imperij sui præcepit, ut si mares Israelitica gentis mulieres parerent,

eos quamprimum interficerent: sin fœminas, ser-
 uarent. Cùm verò obstetrices, quæ Deum me-
 tuerent, tã immane facinus detestata, Regi non
 parèrent, réque comperta, ipse cur imperata non
 facerent, rogasset, atque illæ officioso mendacio
 vsæ, Hebræorum mulieres sibi esse obstetrices,
 ac parere solitas antè quàm ipsæ venirèt, respon-
 dissent: tum edictũ fecit æquè crudele, quo præ-
 cipiebat suis omnibus, vt mares omnes qui na-
 scerentur, in flumen proiicerent, seruarent fœ-
 minas. Iochabed mater huius, vt dixi, in vtero
 Mosem gestans, statò tẽpore eum pepererat, tum
 cùm tam crudele edictũ promulgatum est. Ipsa
 autem, quæ quid ageret dubitaret, num proposi-
 ta certa morte, filium materno amore impulsa
 contra edictum regium seruaret, an cõtra ma-
 ternam charitatem viuum proiiceret in flumen,
 id est, interficeret: in hac tanta animi dubita-
 tione, primò edictum negligit, abditò serua-
 tõeque filio, quem elegantem videbat: deinde ex-
 pletis post natum illum tribus mensibus, mortem
 quæ impenderet verita, cùm diutius eum occul-
 tari posse diffideret, quin Rex comperiret, in it-
 rationem, qua & sibi parètì edicto, & filio con-
 suleret. Nam contexuit ex scirpis siue arculam
 siue caueam, in qua oblita pice & bitumine po-
 situm puerum exposuit in flumine, relicta hac

Maria eius ſorore, quã monuerat, vt ſi quis cum fluitantem animaduertiſſet, ipſa ſedulo & officioſe ex eo quæreret, nũ vellent, infantis matrem educandi cauſa euocaret. Maria tam pium matris mandatum curauit diligenter. Nã cum paulò poſt Pharaonis filia, abluẽdi cauſa, cum comitibus ſuis deſcendiſſet in flumen, animaduerſaque cauea illa miſiſſet vnã e ſuis, quò illam afferret, atque in ea, cum illam aperuiſſet, viſo infante qui vagiebat, miſerta illius, cum eſſe ex Hebræorum pueris dixiſſet: ipſa hæc audiens, illam rogauit, vellẽtne pueri matrem educandi cauſa accerſeret. Cum præcepiſſet, vt iret, dici nõ poteſt, quãm leta matri tam gratã, fauſtãque rem nunciatum proſecta ſit. Mater celeriter tam leta redit ad flumen, quãm triſtis paulò antè iuerat & reuenerat. Eam rogat Regis filia, num illius pueri mater ſit: Verè mater ſum, inquit. Eum ergo, inquit illa, pro meo educato, & mercedem à me feres. Illa filiũ maiore cum animi latitia recipit, quãm peperiſſet. Cum enim eum peperit, illum paulò poſt periturũ, vel certè ſe ipſam ſciebat: cum autem eum recepit, & ſe & illum ſaluos atque tutos fore videbat. Cuius gaudiũ Maria hæc, vt mœroris ac doloris fuerat, ſocia & particeps fuit. Præclarum etiam alterum eius facinus exponam. Morte eorũ qui

primi nati erāt apud *Ægyptios*, coactus *Pharao*, populum *Dei*, id eſt, *Iſraeliticum*, miſerat: ſed paulò poſt moleſtè tulit illam eius liberationem. Itaque cōparato ingenti exercitu, eum inſequi cœpit: quē cū vidiffet, mari rubro diuinitus in duas partes diuiſo, per medium fugientem, ſperans eadem via ſe eos conſequuturum, ipſe & ſe & exercitum in eandem viam dederat, perſequens fugiētes: ſed cū iam dimidiam via per mare partem conſeciffet, *Deo* aquas reducente, ſubmerſus eſt. *Hebræi* autem cū, traiecto mari, mortuos *Ægyptios* ad littus maris vidiffent, *Deo* ac *Moſi* eius ſeruo crediderunt. At *Moſes*, qui agnoſceret illud *Dei* in ſe ac populum beneficium, laudare eum, illique gratias agere cœpit, pluribus magnificiſque verbis, quæ cecinit cum viris. *Mariæ* verò hæc illius ſoror, ſumpto in manum tympano, omnibus eam mulieribus ſequentibus cum tympanis & choris, idem carmen prima, quaſi viris reſpondens canebat, & cætera ſuccinebāt. Anno poſt, menſe *Aprili*, ad *viij. Calend. Maij*, ipſa, quæ tantum *Moſi*, vt modò expoſui, tribuebat, eum cōtemnere cœpit: nec ipſa ſola, ſed, quod magis mirum videtur, *Aaron* quoque, propter uxorem eius *Æthiopiffam*. Dicebant enim non per eum ſolum, ſed per ſe etiam loquutum *Deum* eſſe, hoc

ipso Dei præscriptioni obsistentes, qui Mosem omnibus præfecerat. Quod, ut illis temporibus necesse fuit, non negligendum censuit Deus, sed pœna coercendum, ne ij qui in imperio aliorum sunt, temerè murmurare aduersarique eis audeant. Non tamen in utrunque animaduertit, sed in Mariam tantum, elephantia eam inquinans. Nam cum iratus tres ipsos, Mosem, Aaronem, & Mariam, conuenisset, eis præcipiens, ut ad tabernaculum fœderis veniret soli, egressisque illis, vocasset Aaronem & Mariam, quibus tantum inter eos et Mosem interesse dixit, ut si quis esset inter eos propheta, ei ipse in visione appareret, aut per quietem cum eo loqueretur: cum Mose autem, quem haberet seruum fidelissimum, coram in os, ei que se palam ostenderet: itaque eos timore perterritos de illius potestate detrudere minimè debuisse: his verbis usus discessit, statimque in Maria elephantia apparuit. Sed non diu morbo illo afflictata est, sed tantum septem diebus. Moses enim, qua erat humanitate & clementia præditus, Aaronis precibus adductus, ne sibi ac sorori scelus, quod imprudētes admisissent, deputaret, Deum, ut eam curaret, precatus est. Quæ cum eius præcepto ex castris septem diebus exclusa & expulsa esset, incolomis reuocata est septimo. Ita eam Deus ad tem-

pus dare pœnas sceleris, maximè cùm eius illam atque fratrem pœniteret, quàm in perpetuum, maluit. Mortua est autem in solitudine Sin in Cades, anno quadragesimo post eduçtos Hebræos ex Aegypto, Martio mense, maior annis centũ viginti sex: quo etiam in loco sepulta est.

Deboræ prophetidis, siue vatis, vita.

DEBORA Prophêtis, siue Vates, vxor Lapidoth, Hebræis ius dixit, Aod Iudice mortuo: cuius rei causa ad eam, subter palmam, quæ eius nomine appellabatur, sita inter Rama & Bethel, in monte Ephraim, sedentem conueniebant, si quid inter eos intercessisset controuersia. Ea prophêtis ex eo dicitur, quòd ei Deus enunciauerit, liberatum iri Hebræos è potestate Iabin regis Chananeorũ, Barac duce, cui hoc Deus ipse per illam & prædixerat, & præceperat. Nam cùm Iudæi, Aod Iudice mortuo, Deo neglecto deos falsos colerent, eiúsque concessu ob eam causam in illius potestatem venissent: iam eos viginti annos vehementer oppresserat, cùm Dei fidem imploraruñt, qui eos audies, Debora huic negotium dedit, vt Barac accerferet, eiq; exponeret, hoc se illi præ-

cipere, ut compararet decem milium armato-
 rum exercitum ex tribu Nephthalina & Za-
 bulonia, quem ad torrentem Cifon educeret, quò
 ipse Sisaram Iabin regis exercitus ducem, cum
 nongentis falcatis curribus suis, & ingenti mul-
 titudine, quam secum haberet, perductū ei tra-
 diturus esset. Barac Abinoen filius, qui Lapi-
 dot etiam nonnullorum sententia dicebatur, De-
 boræ hoc Dei ad ipsum mandatum narrati, re-
 sponderat, se, si illa secum proficisceretur, profe-
 cturum esse: sin minus, non esse profecturum:
 cum ipsa, ut vates, se quidē cum eo iturā prædi-
 xit, sed illi non tributum iri victoriā: fore enim
 ut Sisara mulieri traderetur, Iahel significans,
 ut mox docebimus. Cōtractis copiis Barac vnā
 cum Debora in montem Thabor profectus est,
 quod cum Sisara nunciatam esset, mouit ad tor-
 rentem Cifon: tūmq; rursus Dei spiritu permota
 Debora, Barac eum diē esse dixit, quo Sisaram
 cum suis omnibus ipsi Deus, qui eius dux esset,
 traderet: itaque iam descenderet. Illo ex monte
 cum suis descendente, ita Deus Sisaram, eiusque
 exercitum perterruit, ut exercitus dilapsus sit:
 quem persequutus Barac, ad vnū interfecit: ipse
 autem ex curru defiliens, pedibus fugerit. Fu-
 giētī Iahel Haber Cinai vxor ei prodiit obuiā,
 rogans eum, ut ad se veniret, neque timeret.

In tentorium illius ingressus, & opertus pallio, ei praecepit, ut staret ad ostium tabernaculi sui, & cum aliquis prateriens quassisset, nunquis ibi esset, non esse responderet. Illa autem cum eum somno graui oppressum intelligeret, illum clauo tentorij malleo clam & ex insidiis adactō per tempora interfecit. Barac ex bello Sisaram, ut ducem belli, magnis itineribus contentōque cursu sequebatur. Eum cum Iahel ex tabernaculo suo animaduertisset, egressa obuiam, monuit, ut quem quæreret, videret. Ille cum eum ita mortuum aspexisset, ad Deborah letus hoc nuntiatum quamprimū se contulit, qui cōiuncti, non tam corporibus, quā animis, Deo gratias egerunt, ordine canentes, ac narrātes & praelij nouum genus, & victoriæ, nominatim expressum ducibus exercituum, tum tribubus, tum Iahel, summa cum & laude eorum qui vicerant, & eorum qui victi fuerant, dedecore ac vituperatione. Hortabatur enim ipsa primū Iudæos omnes, qui ultro ac sponte vitam suam periculis pro patria obieciisset, ut Deo gratias agerent: deinde reges ac principes, ut audirent, ac intelligerēt, se esse quæ Deo caneret, laudēque tribueret Deo, quæ Iudæi colerent: tum auersa ad eum oratione, eius laudes canebat, dicebatque, cum ipse ex Seir exiret, transirētque per

regiones Edom, terramotum factum esse, cælumque ac nubes effudisse aquam: cum montes omnes, tum Sinai fluxisse. Samgar filij Anath, & Iahel temporibus neminem ausum esse iter facere viis publicis, & qui iter faciebant, deuia itinera sequutos esse: in Iudæa defuisse viros fortes, dū ipsa ibi exorta sit tāquam mater. Deum & noua bella delegisse, & diruisse portas hostium: cum interea nec scutum nec hasta visa sint quadraginta Iudæorum milibus, se ex animo duces Iudæorum amasse. Rursus eadem repetens, hortatur eos, qui se vtrò in discrimen obtulissent, vt Deum laudent, & qui in equis fulgentibus sedent, & qui incedunt, vt loquantur. Tum pro suo iure & potestate præcipit, vt vbi sunt collium currus, hostiumque exercitus deletus est, ibi Dei præclara facinora narrētur: hinc se ad laudandum Deum hortatur, & Barac ad capiendos captiuos suos. Deinceps laudes Dei, quas in hoc prælio consequutus est, canit, easque cum viris fortibus communicat. Ait enim, populum, qui reliquus erat, seruatū esse, ac Deum per viros strenuos dimicasse: eorum qui tribus Ephraiminae erant, opera deleuisse in Amalec hostes: & secūdū eos, illorū q̄i Beniaminae erāt, fortitudine Amalecitas: ex Machir descendisse duces, & ex tribu Zabulonia, qui exercitum ad

bellum educerent : duces Issacharina tribus secum fuisse, & Barac sequutos esse vestigia, qui se maximis obiecisset periculis, cum interim Rubenienses Iordane disiuncti non adfuerunt : ocio torpentibus trans Iordanem Galadinis, & Daniensibus cum nauibus rem habentibus, Aserinisque littus maris incolentibus, Zabulonianos ac Nephthalinos vitam suam in Merome obiecisset discrimini. Venisse in eos infestis animis reges, ac bellum gessisse : regesque Chanaan pugnassee in Tanach ad aquas Mageddo, & tamen nihil prædæ egisse & abstulisse. Ex cælo aduersus eos dimicatū esse, stellas pugnassee contra Sisaram manentes in ordine & cursu suo. Torrentem Cison cadauera eorum excepisse : ungulas equorum decidisse, fugientibus magno impetu, & in præceptis fortissimis hostium corruentibus. Tum vult præcepisse angelum Dei, ut regioni Meroꝝ eiusque incolis omnes malè precarentur, quod Deo eiusque seruis auxilium non tulissent: hortatur omnes, ut laudent Iahel præter mulieres, quæ Sisara aquâ petenti lac dedisset, eumque clauo per tempora transfixo occidisset. Extrema oratione optat, ut sic pereant omnes Dei hostes : qui autem eum amant, solis instar fulgeant. De eius autem morte ac sepulchro, nihil inueni scriptum.

NOEMI VITA.

NOEMI vxor Elimelech. Ea cum viro ac duobus liberis fame coacta, cum Iudices praesent, Bethleem Iudæ reliquit, vitandaque eius causa, in regionem Moabitarum profecta est. Ibi mortuo Elimelech, de illius consilio liberi duo, Mahalon & Chelion, vxores Moabitanas duxerāt, quarum altera Orpha, altera Ruth vocabatur. Cum autem liberis quoque amissis decennio postquam eò migrauerāt, vbertatem quasi postliminio rediisse in patriā Dei benignitate acceperat, constituit eò se recipere cum vtraque nuru sua, iamque aliquantum itineris confecerant, cum ipsa eas osculata monuit, vt domum matris redirēt, optans illis fausta omnia, atq; adeò rogans Deū, vt eas humanè haberet, sicuti & se & viros mortuos, liberos suos, habuissēt, darētq; illis viros, quibuscū ex virtute in pace viuerēt. Illa autem, quæ socrus in se benignitatem, etiam mortuis viros sine liberis, sensissent ac sentirent tantam, vt matris amorem requirendum sibi minime putarent, cum clambre flere cœperant, eique dicere, se cum illa in patriam suam profecturus esse: cum ipsa rursus monere cœpit, vt reuertere-

rentur: neque enim esse, cur secum venirent, præsertim cùm iam filios habitura non esset in utero, ex quibus viros sperare possent: se enim iam senectute confectam esse, nec aptam coniugio: quòd si illa ipsa nocte concipere & parere posset filios, expectarèque vellent, dum illi ad pubertatis annos peruenissent: tamen eas antè anus futuras, quàm nubere. Itaque ne hoc facerent, præsertim cùm eorum mœror & luctus ipsius dolorem augerent, liberorum suorum, virorum eorum, quos ipsis Deus ante tempus eripisset, recordatione. Rursum illæ, quæ socrus ita obstinatum animum viderent, magna voce edita, flere cœperunt. Orphaque osculata illam discessit. At Ruth nullis nec precibus, nec monitis adduci potuit, ut abiret, sed eam officiosè sequebatur, cùm ipsa admonere cœpit, ut propinquam sequeretur, quæ ad populum suum, & ad deos suos rediret. Rogavit tum illa socrum, ut iam sibi ne aduersaretur, aut suaderet, ut se desereret & abiret. Se enim quocūque proficisceretur, profecturam esse, & ubicunque habitaret in posterum, esse habitaturam: populum eius, populum suum esse, & illius Deum, Deū suum: quæ terra eam morientem exceptura esset, in ea se esse morituram, accepturamque sepulturæ locum. Se optare sibi mala omnia, si quid præter

mortem, se ab illa unquam disiungeret. Ex his Noemi intelligens se nihil proficere, ei iam obistere destitit. Clarissima hæc exempla prodita sunt omnibus, mutæ socrus & nurus charitaris, nullis etiam extantibus liberis, virisque mortuis: ex quo intelligi par est, maiorem extantibus illis omnibus & in illis futuram fuisse, & in omnibus earum exemplo esse oportere. Ut igitur ad propositum reuertar, Noemi, cum nurui iam frustra se suasuram intelligeret, destitit: profectaque est cum illa Bethleem. Quò simul atque pervenerunt, celeriter apud omnes fama aduentus earum percrebuit, dicebantque mulieres: Hæc est illa Noemi. Quibus ipsa vetabat, ne se Noemi, id est, pulchram, appellarent: sed Mara, id est, amaram, propterea quòd amarore completa fuisset à Deo, qui ipsam, quæ plena abiisset, inanem reduxisset. Redierant autem tum, cum primum hordea metebantur. Itaque Ruth sibi ac socrui seni paranda, quæ ad victum pertinebāt, censebat, concessūque illius ad agrum Booz locupletissimi hominis diuina providentia venit, ut spicas, si quas messorum imprudentes, ut sit, reliquissent, colligeret. Booz autem cum eò venisset ad messorum, intellexissetque ex eis, illam esse Moabitidem, quæ Noemi, quam Elimelech eius propinquus duxisset uxorem, comitem se

itineris præbuisset: eis præcepit, *ut de industria spicas relinqueret: Ruth autem vetuit, ne ad alias segetes diuerteret. Ita factum est, ut multò plura collegerit quàm sperasset, quæ cum socrui attulisset, ipsa admirata spicarum multitudinem, cum quærendo cõperisset, Booz in eam humanum & benignum extitisse, optare cœpit ei à Deo fausta omnia euenire, qui eandem, qua in viuis vsus esset, in mortuis coleret, retineretque benignitatem. Ei etiam indicauit, Booz ipsum iure propinquitatis ad se attinere, cum illa dixisset, sibi ab illo præceptum esse, ut tandiu se cum ipsius messoribus cõiungeret, dum segetes omnes collectæ essent. Quæ eius verba ipsam impulerunt, ut illi suaderet aut præciperet, ut cū Booz puellis semper se iungeret. Collectis autem frugibus, acceperat Noemi, Booz certo die aream hordei constituisse purgare. Quod commodum futuris nuptiis intelligens, præcepit Ruth, ut eò se conferret vestibibus elegantioribus amicta, clámque ad illum post captũ cibum accederet, qui ipsam admoniturus esset, quid agere deberet. Parentem Ruth socrus præceptis, Booz ad pedes suos sentiens, monet se quidem propinquum esse, sed quoniam ipso alter esset propinquior, postridie, si eam accipere nollit, se illam accepturum uxorem esse: datisque sex hordei modiis dimittit,*

monens, videret ipsa, ne quis se eò venisse resciret. Noemi cùm hæc narratē nurum audisset, monet expectādum esse, dum, quem res exitum habitura esset, videret. Booz autem cùm Bethleem rediisset, sedit ad portā, animaduerso quē illo, quem se propinquiorem Ruth dixerat, accersuit ac sēssum recepit, adhibitisque decem viris ex senioribus vrbis exposuit, Noemi quæ reuersa esset ex regione Moabitarum, partem agri Elimelech, vtriusque propinqui, velle vendere, quod ei illis præsētibz narrare voluisset, vt ipse, qui vnus esset propinquior, iure propinquitatis, si vellet, emeret. Ille se emere velle dixerat, cùm Booz eum monuit, ipsi, cùm emisset, ducendam esse Ruth vxorem, quæ demortui fuisset. Quæ Booz posterior oratio fecit, vt ille coram senibus, se de suo iure decedere diceret. Horum omnium testes & decē illos, & vniuersum populum se habere Booz dixerat, & emptionis, atque coniugij, cùm omnes, non solum se testes esse clamarunt, verum etiam precati sunt Deū, vt Ruth eius vxori liberos daret, sicuti Racheli & Lia dedisset. Ita ductam Ruth Booz amauit, ex eaque suscepit puerum, Obed nomine, qui Isai siue Iessæ Dauidis patrem procreauit. Huius rei factæ certiores mulieres, ad Noemi adcuntes, coram ei gratulabantur, Deūque laudabant,

dabant, qui non passus esset eius familiam penitus deleri: sed ei dedisset generis propagatorem, qui eius senectuti præsidio esset. Ipsa porro puerum præ gaudio in sinu suo reponens, nutricis ac gerulæ officio fungebatur.

Annæ matris Samuëlis vita.

ANNA altera vxor Elcanæ Ephrathæi, tribus Leuiticæ, diu sterilis fuit. Quod cum ei vxor altera, Phenenna nomine, vt probrum obiiiceret, cum semper, tum vel maximè quotannis statò tempore, quo Elcana vtrâque cum Phenennæ liberis in Silo, vbi tum arca Dei locata erat, venerationis religionisque causa ducebat: ipsa flebat, nec capiebat cibum. Itaque illam vir suus, cum hoc cum maximo dolore (eâ enim valde amabat) animaduerneret, cur fleret tristis, nec cibum caperet, semper rogabat. Sed tandem aliquando prætereà, hoc eius consolâdi causa addidit, se ab illa pluris fieri oportere, quam decem liberos. Ipsa tum his viri verbis aliquantum recreata, cum cibum cepisset, sedente Heli sacerdote in sella ante postes tabernaculi, animo tristi cum esset, cum lachrymis multis Deum precata est, voto nuncupato, si ipsam tristem famulam suam ille respexisset, nec ipsius

oblitus esset, ipsique dedisset marē, fore, ut cum illi toto vitæ ipsius tempore consecraret, neque caput eius raderetur. Hæc autem secum in animo dicebat, nec vox eius penitus audiebatur. Itaque Heli, qui hoc ipso vinolentam eam existimaret, ab ea quærere cœperat, quousque ebria esset, ac monere eam, ut vinū, quo obruta esset, edormiret: cum ipsa, ebriam se esse negavit, bibisseque vinum, aut quicquam eorum quæ ebrios facere solerent. Proinde ne de se famulam ipsius perinde, ut de liberis malorum existimaret: se enim magnitudine doloris ac mœroris coactam, ad illud tēpus verba fecisse. Aequior tum Heli factus, optavit, ut Deus ei, quod petierat, concederet. His ita gestis, rediit Anna cum viro suo domum, concepitque paulò post, ac peperit puerum, cui nomen Samuelis imposuit, quòd eum à Deo postulasset. Elcana autem quotannis ante ablactationis tempus in Silo solennem profectionem suscipiebat, immolanda hostiæ gratia, eoque suos omnes ducebat, præter Annam, quæ utebatur excusatione, quòd nondum ablactatus esset: quā ille non solum accipiebat, verum etiam Deum, ut promissum faceret, precabatur. Peracto verò ablactationis tempore, eum ipsa cum hostiis illuc portavit, atque Heli obtulit, indicās ei, se illam esse mulierem, quæ non ita pridem

in conspectu ipsius Deum rogasset, ut sibi puerum daret, quem dedisset, ut videbat. Itaque eum se Deo per omne vitæ ipsius tempus consecrare dixit: eique multis verbis egit gratias. Dicebat animum suum gaudio planè diuino gestire, Deique benignitate elatam esse gloriam suam: apertum esse iam os suum, quod antea occlusum esset, propter obiectam sibi sterilitatem ab inimicis, quod latata esset accepto à Deo tam singulari beneficio. Non esse quemquam ita sanctum, ut sit Deus, neque alium præter eum verè esse, nec aequè fortem & potentem. Itaque ne iam multa magnificaque verba facerent ij, qui gloriarentur, & ea quæ antea proferebant, ne ex illorum ore exirent: præsertim cum Deus sciret omnia, etiam cogitationes. Arcum enim fortium hominum superatum esse, & imbecilles fortes esse factos. Eos qui satiati prius erant, locasse operas suas pro pane, & satiatos esse eos, qui fame enecti erant, dum ea quæ sterilis erat, peperisset plurimos, & quæ multos liberos habebat facta esset imbecillis. Deum vitam dare, & adimere: ad inferos demittere, atque inde reuocare. Eundem diuitias dare, & paupertatem: efferre, & affligere. Efferre ex pulvere egentem, & ex stercore pauperem, ut sedeat cum principibus, soliumque gloriæ plenum occupet: quan-

doquidem eius sunt Vertices terræ, & in eis orbem locauit. Eum pedes bonorum seruaturum esse, malos autem mansuros esse in tenebris: neque enim quæquam hominum per se, vique sua, firmum futurum. Fore, vt Deū aduersarij ipsius metuant, tactique de calo intereant. Eum fines terræ iudicaturum, daturumque imperium regi suo, & elaturum Christi sui gloriam. His verbis cum Deum laudasset Anna, relicto Samuele, domum rediit. Quoniam autem in eius vita, quàm magnus clarusque fuerit & iudex, & propheta, id quod ad matris laudem pertinet, longo sermone docui: non necesse putavi, hoc loco eadem dicere. Hoc autem exponendum existimaui, Annam matrem eius ipsi puero contextuisse cõfecißeque tunicam, quam quotannis in Silo afferebat, cum solennis hostiæ causa eò statis diebus cum viro proficiscebatur. Heli autem ei bene precabatur, optabátque, vt Elcanæ Deus daret liberos pro Samuele, quem ei consecrasset. Hinc factum est, vt postea Dei benignitate filios tres, duásque filias páreret.

Michol vxoris Daudis vita.

MICHOL Saulis primi regis Iudeorum filiam, Daud iam rex à Deo creatus, & à

Samuele consecratus, hac occasione, patris concessu & cōsensu, duxit vxorem. Saul, cū Dauidē, interfecti à se Goliæ gigātis caput Hierosolymam, quasi signum victoriæ, gestante, mulieres quæ ex cunctis regni vrbibus ipsi obuiam prodibant, chorosque agebant cum tympanis & sistris, præcinentes audiret, Percussit Saul mille, & Dauid decem milia: adeò acerbè molestèque tulit carmen illud earum, vt dixerit, nihil ei restare, nisi regnum, ex eoque die deinceps nō benè in eum animatus fuerit. Itaque cū postridie Saulem malus Dei spiritus occupasset, atque in regia vaticinaretur, Dauidē canente fidibus, vt ipsius malum leniret, lanceam iaculari cœpit, qua illum confoderet, idque fecisset, nisi semel atque iterū, iētum loci mutatione vitasset. Et quoniam eum suspectum habebat, propterea quòd Deum cū illo esse, deserto se, videret, eum à se abegit, tribunūmq; mille militibus præfecit. Quo in munere cū ita se gereret, vt & Deus cum ipso esset, & à cuncto populo amaretur, Saul qui hoc cerneret, sibi ab eo metuere cœpit. Itaque Merob filiā suā maiorem se ei nuptum daturum esse promisit, dummodo ipse virum se præstaret in Dei bellis, hoc ipso cōsilio suo Palestinis illum interficiendum volens obicere. Dauid autem, etsi submissè se gerēs, cū indignum

se Regi, qui eius gener fieret, dixisset, cum spe filia accipiendæ, eius cōfirmatione adductus, ad bellum se contulerat, tamen eam cōstituto tempore non accepit, sed Hadriel Molathita, patris voluntate. Ita delusus falsusque spe sua, animum suum ad Michol minorem natu adiecit, eamque valdè amauit. Hoc Sauli, cū ei nunciatum fuisset, placuit, misitque qui Dauidi hanc suam sententiam exponerent. Ille generis obscuritatem asserens, se tenuem, atque adeò inopem esse respondit, cum ex legatis hoc audiens rex, illis dedit negotium, vt Dauidi renunciarent, se non egere alia donatione ad futuras nuptias, nisi quinquaginta præputiis Palæstinorum, sperās, si cum Palæstinis eius rei causa bellum gereret, fore, vt occideretur. Dauid tamen siue gnarus, siue ignarus tam scelesti Saulis consilij, accepta conditione paulò post eduxit milites suos, caesisq; Palæstinis ducentis, eorum præputia ei attulit. Ita Michol filiam suam Rex Dauidi nuptū dedit. Ea vicissim Dauidem amauit, quod re ipsa in certo mortis discrimine comprobauit. Nam cū Saul eius pater, Dauidem virum, partim ob illius in eum amorem, ita suspectum haberet, vt quoad vixit, æternas inimicitias cum illo sibi gerendas cēseret, statimq; daret negotium Ionathæ filio suo ac suis, vt eum interficerent, ac Ionathæ

*verbis placatus, eum in regiam reuocasset, nec ita multò post malo spiritu furisq̃ue agitatus, lancea confodere conatus esset, cuius ictu declinato, ille noctu fuga elapsus, domũ se recepiſſet, quò idem stipatores misit eadem nocte, qui arreptum prima luce interficerent: Michol hæc eius vxor, consilium & præceptum illud patris viro enuncians, auctor ei fuit, vt per fenestram se demitti pateretur. Cũque stipatores illi domum ingressi, vbi esset Dauid, quærerent, ipsa ægrota-
 re eum responderat, cũ illi reuersi hoc renun-
 ciatum, à Rege iterum missi sunt, qui illũ in le-
 cto comprehensum, interficiẽdum ad ipsum per-
 ducerent. Michol dum nunciũ eunt & redeunt, statuam in lecto viri locarat, pellibusque cap-
 rinis eius caput obuoluerat, superiecto stragulo. Quem eius dolum patefactũ sibi, cũ Regi patri aperuissent, ille accitam filiam acerbè obiurga-
 uit, quærens, cur se ita delusisset, inimicũque suum passa esset elabi. Ipsa alia excusatione vsa non est, vt patris in se iram placaret, nisi Daudi-
 dem minatu sibi esse mortem, si retinuisset. Eam postea illi contra ius diuinum ademptam, inimici-
 tiis impulsus, Phalti cuidam Laïs filio Galli-
 mano tradidit, quã nõ ante ipsum mortuum re-
 cipere potuit. Quod quẽadmodum acciderit, ex-
 ponendum est. Sic enim inuitam illam Dauidi*

ereptam esse à patre suo intelligemus, cum, si non
 fuisset inuita Psalti tradita, Dauidis regis iram
 metuens, nunquam ad eum quasi postliminio re-
 dire voluisset. Abner quidem Ner filius, dux
 Saulis exercitus fuit. Is interfecto domino, Is-
 boseth eius filium annos natum quadraginta in
 Israele regem constituit, quod regnum biennium
 occupauit, quo Dauid Iudæ tantum regia pote-
 state præfuit. Pellex autem fuerat Sauli Respha
 nomine, cum qua Abner congressus est: quod cum
 Isboseth resciuisset, illum obiurgauit. Abner, id
 acerbè ferens, respondit, nisi ipse fuisset, eum Is-
 raeli minimè præfuturum fuisse. Itaque se dein-
 cept coniuñcturum cum Dauide, eiusque ami-
 citiam esse initurum. Hoc suum consilium Ab-
 ner Dauidi significauerat, sed ille ei renun-
 ciavit, ne se viseret, nisi Michol vxorem suam
 adduceret. Quod quò commodius faceret, misit
 ad Isboseth, qui cum eo agerent, ut illam remit-
 teret. Ille ademptam Phatieli remisit, qui eam
 cum lachrymis sequutus est, quoad Abner ipse
 qui eam ducebat, ei imperauit, ut rediret domũ.
 Ex quo intelligi potest, id quod paulò antè dixi,
 Michol inuitam Phatieli traditam fuisse, quæ
 tanta cum voluntate, flente etiam marito, re-
 uersa sit. Ex ea autem liberos nullos Dauid su-
 cepit, supplicij causa, quòd cum saltantem nu-

dato corpore ante arcam Dei, cū illā domum suam portandam curaret, spreuisset.

Abigail vxoris Dauidis vita.

ABIGAIL prudentiſſima & honeſta facie
fœmina, primū Nabad, qui genus à Ca-
leb duxerat, deinde illo mortuo Dauidi nupſit.
Quod quemadmodum euenerit, dicendum eſt.
Nabad quidem ſolitudinem Maon incolebat,
Vir locuples, quippe qui ouium tria milia, &
capras mille haberet. Is tondebat oues in Carme-
lo: quod cū Dauid, qui tum Vitans Saulis fu-
rorem in ſolitudinem Pharan ſe receperat, reſci-
uiſſet, miſit decem ad eum, qui primū ſuo no-
mine illi ſalutem dicerent, optarētque proſpera
& fauſta omnia: deinde commemorarent ſua in
ipſius opiliones beneficia, quandiu in illa ſolitu-
dine greges eius pauiffent: poſtremò eum roga-
rent, vt ad ſe eſculenta & poculēta, quaſi rela-
turus gratiā, mitteret. Quæ cū decem illi ex-
poſuiſſent, Nabad contemnere cœpit Dauidem,
illiūſque comites ſe ignorare dixit, & præterea
exortos eſſe ſeruos, qui dominorum conſpectum
fugerent. Itaque nec carnes pecorum quæ occi-
diſſet, tonſoribus ſuis, nec panem, nec vinum ſe
dempturum eſſe, ac daturum iis, quos ignoraret.

Dauid hac illius verba cum legati renunciaſſet,
 ita moleſtè tulit, vt ſtatim quadringentos gla-
 diis accinctos, ducentis ad ſarcinas relictis, in
 cum infeſtis animis eduxerit. Dum hac geruntur,
 Abigaïl hac Nabal vxor, quæ facta eſſet cer-
 tior a famulo ſuo, quæ extitiſſent officia Dau-
 dis in ipſum & ſocios, in ſolitudine, cum greges
 paſcerent, quàmque durum reſponſum vir ſuus
 legatis ea illi commemorantibus, reſque ad vi-
 ctum pertinentes petentibus, dediſſet, celeriter a-
 ſinos ſterni, et eos onerari quinque arietibus co-
 ctis, ducentis panibus, duobus vtribus vini,
 aliſque rebus ad victum neceſſariis, iubet, atque
 pueros cum eis antecedere. Ipſa in aſino ſedens,
 ſequebatur: iamque ad radicem montis perue-
 nerat, cum Dauid cum ſuis descendens ei factus
 obuiam, exprobrauit primum ſua in virum illius
 beneficia, deinde optauit & ſibi & ſuis mala
 omnia, ſi quid eorum quæ illius eſſent, reliqui
 faceret. Tum Abigaïl descendens ex aſino pro-
 iecit ſe ad pedes Dauidis, rogans eum ne impe-
 tu animi ferretur in Nabal, qui ſe ſtultum con-
 ſonans nomini ſuo præſtitiſſet, ne ſanguinem ef-
 funderet, neque iniurias ſuas vlciſceretur. Sic
 enim fore, vt & Deus ipſum ſeruaret, ſi qui in
 eum impetum facerent, & cum ab ipſo Rex Iſ-
 raelis conſtitutus eſſet, non caperet animo dolo-

rem ex recordatione effusi sanguinis sui, quæ non
 esset in culpa, cum eius legatos nõ vidiſſet. Ita-
 que acciperet munuscula, quæ libenti animo ipsa
 deferret, ac sui cum rex esset, meminisset, seque
 bonis afficeret. Dauid audita eius oratione, tan-
 tum abest, vt vel eius munera respuerit, vel eam
 & virum illius interfecerit, vt acceptis mune-
 ribus, gratias ei egerit, quod prohibuiſſet, ne ipse
 eadem faceret, vlciscereturque iniurias suas. ita
 eam dimisit. Ipsa cum domum rediisset, eo die
 hæc omnia viro non exposuit, quod eum ebrium
 videret: prima autem luce, cum ea illi narraſ-
 ſet, adco acerbè tulit, vt emortuum sit eius cor
 vi doloris: decimòque die, Dei nutu mortuus est.
 Quod cum Dauidi nunciatum fuisset, misit, qui
 eam ad se ducerent, vt vxorem duceret. Ipsa se
 indignam tanto honore & dicens, & sentiens,
 sed dignam quæ illius pueris pedes ablueret, in
 asina ad Dauidem cum quinque pedisequis ve-
 nit. Ita ei Abigail paulò post nupsit, cum iam
 Michol Phaltieli esset tradita. Ex ea Dauid in
 Hebron, vbi septem annis, ac sex mensibus re-
 gali potestate Iudæ præfuit, Cheleab, qui etiam
 Daniel dicitur, suscepit.

Bethſabee vxoris Dauidis vita.

BETHSABEE, etsi turpi iniustaque de causa
 Dauidi nupsit, tamen in sanctis fœminis ha-

benda est, præsertim cum vita eius posterior honestè iustèque acta, superiorem culpā correxisse videatur. Ego vtrunque narrare constitui, quòd facilius res intelligatur. Igitur Bethsabec Eliã, siue Amiele, patre nata est. Ea eleganti forma erat, primùmque nuptum data est Vriæ Hethæi, deinde Dauidi, cum iam Israeli atque Iudæ regia potestate præesset, hoc modo. Dauid in regia à pomeridiano somno inambulans, Bethsabec hanc, quam ignorabat, se abluentem domi suæ è regione viderat, eiùsque forma captus & ille-ctus, misit, qui primùm quænam esset, quærerèt, deinde eam adducerent, cum renunciatum esset, eam esse Bethsabec Eliam filiam, Vriæ Hethæi, qui tum in castris erat, vxorem. Cum venisset, cum ea concubuit, eoque concubitu cōcepit mulier: quod ipsa, cum rediisset domum, sentiens, regi significauit, fortassis ne re comperta, ex lege lapidibus obrueretur. Rex, ne ex se grauidata videretur, quamprimùm ex castris Vriam eius virum euocat, ut eum ad vxorē mitteret, atque ita conceptus filius illius esse diceretur. Sed contrà atque sperabat, Deo ita rem procurante, accidit. Nam etsi cum venisset, primùm cohortatione, deinde etiam iussu, missurum se illum ad vxorem sperabat, tamen nunquam hoc ei, etiam de industria bene poto, persuadere potuit. Affe-

rebat enim semper, nefas esse, nec licere sibi in lecto molli cubare, cum illius exercitus humi iaceret. Itaque scelus scelere cumulat, Vria dat epistolam ad Ioab ducem exercitus perferendam, in qua scriptum erat, Ut eum in loco locaret, in quo interficeretur ab hostibus. Eò interfecto, Bethsabée cum nuncius mortis viri perlatus esset, eum luxit. Cum eluxisset, accersivit eam Dauid, & duxit vxorē. Expletis autem mensibus constitutis partui, filium peperit, qui septimo die, supplicij stupri causa, Ut Deus per Nathan prophetam regi prädixerat, excessit è vita. Ex eius morte Bethsabée maximum animo cepit dolorem, quam rex consolatus est. Ea paulò post alterum peperit, Salomonem nomine, quo nemo vnquam homo sapientior fuit ad tempus, nemo prudentior. Dauid Bethsabée promiserat, hunc regia potestate secundum se esse præsaturū. Itaq; cum Adonias, eius ex Haggith vxore filius, palàm & publicè post mortē patris regnum se administraturū dixisset, nec eum ille propterea obiurgasset: ipsa, auctore Nathan propheta, qui eam sequuturus, & sermonē quem instituisset absoluturus erat, ad regē senectute cōfectū adiens, ei hoc in mentem redegit, cuius tamen voluntati obfisteret Adonias ipso inscio, qui iam regnaret, mactatis bubus & arietibus, inuitatis

liberis regiis præter Salomonem. Quod si fieret,
 fore, ut ipsa & Salomon in obscuris, infimæque
 conditionis hominibus haberentur. Itaque dum
 viueret, indicaret Israelitis omnibus, qui hoc ab
 illo expectarent, quem potissimum vellet sibi in
 regnum succedere. Nondum finem dicendi fece-
 rat, cum Nathan, sicuti pollicitus fuerat, adesse
 regi nunciatur. Introductus, quæsiuit ex eo,
 cum iam Bethsabée secessisset, ne res ab eis com-
 posita videretur, num Adoniam vellet, post
 se, imperium tenere, ac sedere in solio suo. Eum
 enim illo ipso die boues & arietes immolasse, in-
 uitaßéque omnes regios liberos, præter Salomo-
 nem, vniuersosque principes, præter se & Sa-
 doc, atque Banaïam Ioïadæ filium. Num hæc
 omnia iussu eius facta essent, nec ipsi quis post se
 ad regni gubernacula sessurus esset, indicasset?
 Dauid cum hæc accepisset, Bethsabée accersiri
 iubet. Ei rursus iurauit, se id illo die perfectu-
 rum esse, quod iam de Salomonis imperio factu-
 rum esse iurasset. Itaque Nathan, Sadoc sacer-
 doci & Banaïæ imperauit, ut adhibitis seruis
 suis Salomonem filium in mulam suam imposi-
 tum in Gihon ducerent, ibique eum Sadoc sa-
 cerdos, & Nathan, regem vngerent ac cōsecre-
 rent, & canente buccina prædicarēt, Viuat rex
 Salomon. Hæc cum gesta essent omnia, Ado-

nias certior factus, non modò de spe regni deiectus est, verùm etiam, spe salutis & vitæ penè amissa, ad aram quasi ad asylum cōfugit, eamque tenens, hoc optabat, vt Salomon ne se interficeret. Ille autē cum inde eduētum dimisit domum suam, cū dixisset iū, qui illum ad aram ea quæ commemorauit optare, nunciauerant, si ex virtute degeret, non moriturum esse, sin iniuste viueret, moriturum. Itaque cū ille, mortuo iam patre rege, Bethsabee eius matrem rogasset, vt à rege filio impetraret, vt Abisag Sunamitidem acciperet vxorem, atque illa ad eum in solio sedentem veniens, cū eam vt matrem ad dextram in solio sedere voluisset, hoc ab illo peteret, tantum abest, vt hoc impetrarit, cū ei antè quàm rem exponeret, nefas esse dixisset, se quicquam denegare, vt iusserit eam illi etiam regnū petere, iuraueritq; eū illo ipso die esse moriturū. Id quod iussu eius Banaias exequut⁹ est.

Saræ vxoris Tobix filij vita.

SA R A Raguele & Anna parentibus optimis nata est. Eam parentes vnam procreauerant, ob eamque causam charissimam habebant. Itaque spe propagandæ posteritatis ac generis sui, eam septem viris ordine nuptum de-

derant, sed eos sigillatim demonium quoddam
Asmodeus nomine, simulatque die nuptiis di-
 cto concumbere cum illa conabantur, cum ma-
 ximo & illius & parentum dolore, interfecit.
 Hūc eius dolorem auxit ancilla, quæ, cum illam
 ob culpam suam obiurgaret, ei eadem virorum
 suorum septem ita obiecit, vt quæreretur ex ea,
 num se, quemadmodum illos, interficere vellet.
 Ipsa his ancillæ verbis impulsæ, conscendit supe-
 rius cubiculum domus suæ, ibique triduum ni-
 hil cibi capiens, in precibus coniunctis cum la-
 chrymis, consumpsit. Tertio die absolutis preci-
 bus, Deum laudauit, qui iratus, tamen miseri-
 cordiæ recordaretur, afflictionisq; die, peccatis
 eorū qui se appellarent, & inuocarent, ignosce-
 ret. Itaque se ad eum confugere, aciemque men-
 tis intendere: petere se, vt sibi probrum obiectum
 elueret, aut certè mortem inferret. Eum probè
 scire, nunquam se appetiuisse virum, animum-
 que suum semper seruasse incorruptum omni li-
 bidine: nūquam se adiunxisse ludentibus, neque
 iis, qui leuia & inania sequerentur, sociam se
 præbuisse. Viro non libidinis explendæ causa,
 sed metu eius ac religione ductā, se nuptum da-
 ri voluisse: atque aut se illis septem indignā, aut
 illos se fuisse, quòd fortassis alij viro se destinaf-
 set, vel reseruasset: neque enim esse in hominum
 potestate

potestate eius consilium. Hæc atque alia eiusdem generis dicentem audiuit Deus. Tobias enim pater, qui, consumptis facultatibus suis in pauperum usum ac præsidium, Gabelo propinquo duris rebus decem talenta argenti, chirographo accepto, mutuò se dedisse recordaretur, Tobiae filio rem indicauerat, præceperatque ut eò proficisceretur argenti repetendi causa, illéque paratum se esse dixerat, sed viam scire se, ac propinquum nosse, & quâ ratione argentum repeteret, intelligere negauerat, cum pater dato chirographo eum monuit, ut tantum fidelem ducem itineris quæreret, cui mercedem daret. Egressus, ut quæreret, statim angelum Dei, Raphaelem nomine, inuenit, specie & figura adolescentis parati ad profectiorem, qui se & viam scire in urbem Medorum Rages, & Gabelum nosse rogatus respondit, perductusque ad Tobiam patrem, filium eò promisit se saluum & incolumem & ducturum esse, & reducturum cum argento. Ne longè abeam, Tobias pater utrique in via prosperè omnia optat euenire. Illi profecti, primo die vesperti ad Tigrim flumen perueverant. Tobias autem cum in flumen lauandi causa descendisset, grandis piscis ex profundo emergens absorbere eum conabatur, cum ille, se ab illo inuadi, Azariam appellans, (sic enim se vocari

derant, sed eos sigillatim demonium quoddam
Asmodeus nomine, simulatque die nuptiis di-
 cto concumbere cum illa conabantur, cum ma-
 ximo & illius & parentum dolore, interfecit.
 Hūc eius dolorem auxit ancilla, quæ, cum illam
 ob culpam suam obiurgaret, ei eadem virorum
 suorum septem ita obiecit, ut quæreretur ex ea,
 num se, quemadmodum illos, interficere vellet.
 Ipsa his ancillæ verbis impulsæ, conscendit supe-
 rius cubiculum domus suæ, ibique triduum ni-
 hil cibi capiens, in precibus coniunctis cum la-
 chrymis, consumpsit. Tertio die absolutis preci-
 bus, Deum laudauit, qui iratus, tamen miseri-
 cordiæ recordaretur, afflictionisq; die, peccatis
 eorū qui se appellarent, & inuocarent, ignosce-
 ret. Itaque se ad eum confugere, aciemque men-
 tis intendere: petere se, ut sibi probrum obiectum
 elueret, aut certè mortem inferret. Eum probè
 scire, nunquam se appetiuisse virum, animū-
 que suum semper seruasse incorruptum omni li-
 bidine: nūquam se adiunxisse ludentibus, neque
 iis, qui leuia & inania sequerentur, sociam se
 præbuisse. Viro non libidinis explendæ causā,
 sed metu eius ac religione ductā, se nuptum da-
 ri voluisse: atque aut se illis septem indignā, aut
 illos se fuisse, quòd fortassis alij viro se destinaf-
 set, vel reseruasset: neque enim esse in hominum
 potestate

potestate eius consilium. Hæc atque alia eiusdem generis dicentem audiuit Deus. Tobias enim pater, qui, consumptis facultatibus suis in pauperum vsum ac præsidium, Gabelo propinquo duris rebus decem talenta argenti, chirographo accepto, mutuò se dedisse recordaretur, Tobiae filio rem indicauerat, præceperatque vt eò proficisceretur argenti repetendi causa, illéque paratum se esse dixerat, sed viam scire se, ac propinquum nosse, & qua ratione argentum repeteret, intelligere negauerat, cùm pater dato chirographo eum monuit, vt tantum fidelem ducem itineris quæreret, cui mercedẽ daret. Egressus, vt quæreret, statim angelum Dei, Raphaelem nomine, inuenit, specie & figura adolescentis parati ad profectiõnem, qui se & viam scire in Urbem Medorum Rages, & Gabelum nosse rogatus respondit, perductusque ad Tobiam patrem, filium eò promisit se saluum & incolumem & ducturum esse, & reducturum cum argento. Ne longè abeam, Tobias pater vtrique in via prosperè omnia optat euenire. Illi profecti, primodie vesp̃eri ad Tigrim flumen peruenerant. Tobias autem cùm in flumen lauandi causa descendisset, grandis piscis ex profundo emergens absorbere eum conabatur, cùm ille, se ab illo inuadi, Azariam appellans, (sic enim se vocari

dixerat) clamauit . Angelus cum monet , vt
branchiis arreptum , in terram extrahat : extra-
ctus cum fuisset , vt exosset & exenteret , eiús-
que & cor & fel & iecur sibi reseruet : eas enim
particulas prodesse , adhibitas in remediis . Hoc
cum fecisset , quod reliquum erat , salsamen-
to conditum est , eoque vsi sunt in via , dum ad
Vrbem Rages venirent . Tobias autem , ange-
lum , vt sibi diceret , quis vsus esset earum par-
ticularum , quas reseruari iusserat , rogauerat ,
cum ille indicauit , si cordis particulam prunis
adhiberet , fumum eius profuturum esse contra
demonium , idque expulsurum siue ex viro , si-
ue ex muliere : sic , vt nunquam postea accessu-
rum esset ad eos : fel verò oculis adhibitum , cu-
randa albuginis vim habere . In via ab eo idem
quæsierat , vbi noctu diuersarentur , eique ille
responderat , ibi in proximo habitare Raguelem
propinquum suum , eiusdem tribus cuius esset , ad
quem rectè diuerterent : eique esse filiam vnā
tantum , cui Saræ nomen esset , quæ illi vxor
ducenda esset , itaque illam peteret : cum Tobias
dixit , hoc se auditione accepisse , illam datam es-
se nuptū septem viris , quos interfecisset dæmo-
nium . Proinde timere se , ne idem sibi eueniret :
quod si eueniret , ipse qui vnus esset parentibus ,
eis causam mortis afferret . Angelus cum vt se

audiat, monet: se enim indicaturum, quos solitus sit malus genius Vincere. In eos dixit, qui ita inirent coniugium, ut Deū à se & à mente sua abalienarent, libidinique ita darent operā, ut equus ac mulus, in quibus mens non inesset, nec ratio, demonium habere imperium & potestatem. Ipsum autem, cum illam accepisset, oportere triduo se ab ea continere, & tantum precari Deum cum illa: ita enim fore ut prima nocte, incenso piscis iecore, demonium fugaretur: altera nocte, in sanctorum Patriarcharum societatem admitteretur: tertia, ut munus consequeretur procreandi liberos saluos & incolumes: qua transacta, tum denique virginem acciperet, timore, ac religione Dei ductus, non amore explendae libidinis. Quod cum facturum se promississet Tobias, ingressi sunt Raguelis domum. Raguel etsi eos ignorabat, tamen hilari vultu excepit. Cum Tobiae, propinqui sui, filiū esse didicisset, cum lachrymis eum osculatus est, habitoque vltro citroque variis de rebus sermone, occidi arietem, & conuiuium apparari iussit. Cum apparatis omnibus eos ad prandium inuicaret, tum Tobias negauit se ibi quicquam cibi antè capturum esse, quàm ille ipsi filiam se nuptum daturum promitteret. Raguel, qui meminisset, quid septem superioribus contigisset, veritus, ne

idem propinquo eueniret, nutabat, nec habebat, quid responderet. Itaque Raphael confirmauit eum, monuitq; ne illi qui Deū timeret ac coleret, filiam dubitaret nuptum dare. Alium enim eā, ob eam causam, nō potuisse habere. Raguel cū dixisset, iam sibi non esse dubium, quin Deus preces suas cum lachrymis audiisset, atq; propterea se credere procuratum ab illo esse, vt illi ad se venirent, vt virgo alicui generis sui, ex lege Mosaica daretur, Tobiam hortatus est, ne eam sibi datum iri diffideret. Itaque acceptam filiaë dextram dextra illius tradidit, optans, ac rogans, vt Deus Abrahami, Deus Isaac, & Deus Iacob eis adesset, eosque coniungeret, ac beneficiorum suorum cumulum ad eos vellet accedere. Acceptaque charta, tabulas coniugij conscripserunt. A cœna paratum est eis aliud cubiculum, introductaq; Sara flebat, quòd, ne idem Tobiaë accideret, quod prioribus, vehementer pertimesceret. Eam Anna mater iussit esse bono animo, orans, vt Deus illi gaudium afferret, pro molestia superiorum temporum. Ad eam postea intromissus est Tobias, qui memor præcepti Raphaelis, iecoris particulam incēdit, tūque demum angelus demonium comprehensum vinxit in Aegypti solitudine. Hinc Tobias virginem ex Raphaelis præscripto hortatus est,

Ut surgerent, & illa ipsa nocte, atque sequenti,
& tertia, Deum precarentur. Se enim atque il-
lam tribus illis noctibus cōiungi cum Deo oportere: transacta autem tertia, in coniugio suo esse
mansuros. Se nanque & ipsam natos esse probis
parentibus, nec posse ita copulari, ut gētes quæ
ignorarent Deum. Surgentes autem pariter, in
commune precabantur Deum, ut se saluos &
& incolumes seruaret. Sara verò priuatim, ut
sui atque viri miseretur, seruaretque incolum-
mes. Parentes autem virginis, ante lucem fos-
sam parandam curauerant, ut in ea Tobiam, si
idem ei quod aliis accidisset, sepelirent: sed cū
mane virūque saluum & incolumem esse com-
perissent, primū Deo gratias egerunt, pro tan-
to in se beneficio, deinde fossam terrā complen-
dam curarunt: postremò instruxerunt lautifi-
cium conuiuiū, ad quod vicini inuitati & ami-
ci, eis gratulati sunt, Deoque egerūt gratias. In-
terim rogatu Tobiae Raphael, adhibitis quatuor
ex seruis Raguelis, duobusque camelis, syngra-
pham ad Gabelum pertulit, acceptaque pecunia,
eum ad nuptias domum Raguelis adduxit. Is
cū accumbentem mensæ Tobiam inuenisset,
gestiens gaudio eum osculatus est cum lachry-
mis, illique & vxori optauit fausta & prospere
omnia in coniugio. Rogabat generū Raguel,

214 Saræ vxoris Tobix filij vita.

Ut diutius secum maneret : quod cum impetrare non posset, ne quid aduersi patri & matri accideret, Saram ei tradidit, dimidiâmq; partem omnium quæ habebat, atque ita Vtrunque dimisit. Sara autem, septimo tantum die post Virum cum pueris & impedimētis venit: tumq; , Vtriusque causa, parētes Tobix, propinquis atq; amicis inuitatis, septē diebus maxima cum letitia conuiuium dederūt. Suscepit Verò ex ea Tobias septem filios, quos vidit Tobias pater, qui vixit post receptum aspectum quadraginta duos annos. Parentibus autem mortuis ac sepultis, sicut pater iusserat, migravit ad socerum & socrum, cum Sara vxore & liberis, quos saluos & incolumes inuenit in senectute, ad quam sanctè iustēque viuentes peruenerant. Ii cum priores excessissent è vita, reliqua pars ad eum & Saram vxorem venit. Tobias quidem nouem & nonaginta annos agens, mortuus est: Sara autem quandiu vixerit, inuenire non potui.

Oldæ prophetidis vita.

OLDÆ prophetis, vxor Sellum Thecuath filij, qui Hasram, vestium siue sacerdotaliū, siue regiarum custodem, patrem habuit, semel tantum, quantum ex diuinis libris intelligi po-

test, Vaticinandi munere functa est, atque id Iosia optimo rege Iudæ. Anno enim octauodecimo imperij sui (vnum autem & triginta annos regia potestate præfuit) cum templum Dei Hierosolymis sarcendum, restituendumque Saphan Esellæ filio, & Maasiam Urbis præfecto, atque Ioha Ioachaz filio, qui erat à commentariis, mandasset, atque ij efferrent pecuniam, quæ in templum illata fuerat: Helcias pontifex Saphan, qui scriba erat, exposuit se in tēplo librum legis Dei reperisse, qui per Mosē populo datus fuisset, eumque illi tradidit. Saphan scriba cum hoc regi nunciasset, Rex, libro iussu suo recitato, discidit vestem, præcepitque Helciæ pontifici, & Saphan scribæ, aliisque tribus ex suis, vt irēt precatum Deum pro se, atque vniuerso populo, consultumque de iis, quæ volumen illud completeretur. Deum enim in se, & illos, atque populum, vehementer concitatum esse, propterea quod maiores non seruassent, quæ liber ille profiteretur. Habitabat tum Hierosolymis Olda hæc, in secunda Urbis parte, cui cum illi hæc narrassent omnia, ipsa respondens, iussit eis renunciare illi qui ipsos misisset, Deum hoc dicere & cōfirmare, se urbē Hierosolyma eiúsque incolas oppressurum iis malis, quæ in eo libro scripta essent, quem regi Iudæ recitassent: cum enim furore in

locum illum ita concitatum esse, ut minimè sedaretur, quòd ipso deserto, diù peregrinis immolassent, ut eorum operibus ira excandesceret. Ei autem, à quo missi essent, Deum ipsum hoc significare dicerent: quòd verba legis audisset, eiusque animus mollis ac tener factus esset, atque ipse in conspectu suo se summisse gessisset, iis auditis, quæ in locum illum, eiusque incolas, scripta essent, atque ipsum veritus, & vestem lacerasset, & profudisset lachrymas, se ab ipso auditum esse sciret. Iam enim eum excessurum è vita esse, nec aspecturum mala illa omnia. Quæ cum regi renúciassent, ipse conuocatis vniuersis senibus Iudæ atque Urbis, cum eis in templum ingressus est, recitauitque in conspectu omnium verba omnia illius voluminis, (Deuteronomium autem fuisse dicitur) pepigitque fædus cum Deo, promisitque se eius præceptis omnibus obtemperaturum, perfecturumque omnia, quæ libro illo continerentur: nec tantum ipse, verum etiam omnes, qui aderant iurisiurandi religione obstrinxit, se eadem esse facturos. Ita Olda hæc prædixit excidium Hierosolymitanum, quod paulò post, Ioacim & Sedechia regibus, euenit.

IUDITH VIDVÆ, SAN-
ctissimæ fœminæ, vita.

IUDITH Merari, tribus Rubenina, filia, vxor autem Manassæ eiusdem tribus, in oppido Bethulia, cuius ciuis erat, mortuo viro suo, locuplete homine, in summa contignatione domus suæ, precandi causa, secretum cubiculum sibi fecerat, in quo cum virginibus suis clausa manebat, amictûque cili- cio ad renes, ieiunabat quotidie, præter quàm sabbatis, & noua luna, diebûsque festis Iudæo- rum. Ea, quæ & honestissima facie erat, & quod pluris faciendum est, religionem in Deum tantam cum eiusmodi forma coniunxerat, vt nemo de ea vnquam, nisi vt de sanctissima fœ- mina, loqueretur: cum triennio & sex mensibus post viri mortem in tali proposito, susceptoque consilio permanens, audisset, Oxiā tribus Si- meonina hominem, qui præfectus erat siue prin- cept oppidi cum Charmi, vniuersi populi quere- lis ac penè conuiciis coactum, vt plebem tumultuantem in officio contineret, promississe, nisi in- tra quintum diem Deus, quem colerent, auxi- lium mitteret, fore, vt oppidum dederetur Ho- loferni, qui missus à Nabuchodonosore rege

*Aſſyriorum, anno eius imperij duodecimo, cum
 centum viginti peditum milibus, & equitum
 duodecim, obſtructis fontibus, ex quibus Be-
 rthulini aquam hauriebant, poſtero die oppidum
 obſeſſurus erat: accerſiuit Chabri & Charmi
 preſbyteros ſiue ſenatores, eiſque expoſuit, ini-
 què egiſſe Oziam, qui populi tumultuantis
 querelis impulſus, ad quintum diem ſe oppidum
 Aſſyriiſ promiſiſſet dediturum, niſi Deus auxi-
 lium mitteret, quòd hoc ipſo omnes, qui nulli eſ-
 ſent, Dei potentiam tentare viderentur. Itaque
 factum illud eiſmodi eſſe, vt nõ miſericordiam
 eiſ commoueret, ſed potiùs concitaret iracun-
 diam, cùm ita eiſ commiſerationi tempus con-
 ſtituiſſent arbitrato ſuo. Quoniam autem, vt
 ita dicam, patiens eſſet clemẽsque Deus, qui
 non hominis inſtar minis moueretur, nec ira con-
 citaretur, omnes eiſ ſcleris pœniteret, proſu-
 ſisque lachrymis eum, & ipſa & illi rogarent,
 abiectis demiſiſque animis, vt pro humanitate
 clementiâque ſua ipſos reſpiceret atque tueretur,
 vt quemadmodum ſuperbia arrogantiâque ho-
 ſtium ipſorum animi fracti conturbati que erāt,
 ſic abiectiõne & ſummiſſione ſuorũ ſpirituum
 gloriarentur, qui non maiorum ſuorum ſclera
 & flagitia imitarentur, à quibus, ipſo vero
 Deo deſerto & abiecto, peregrinis diis cultus*

tributus esset ac veneratio, quam ob causam obiecti fuissent ab eo hostiū gladiis, direptionibus, & probris atq; ignominis, sed ignoraret alium Deum. Itaque se summissè gerentes expectaret ipsa & illi Dei consolationem & auxilium, qui afflicturus esset gentes, quæ in ipsos exorirentur, impetumque facerent. Illos autem, qui presbyteri essent populi, & ex quibus animi omnium penderent, oportere sermone suo animos eorum labentes erigere & confirmare, ut meminisset maiores suos atque ipsorum probatos esse multis variisque modis, num verè Deum colerent: ut Abrahamum, qui multis calamitatibus rebûsque aduersis probatus, amicus Dei effectus esset: sic Isaac, sic Iacob, sic Mosem, & omnes qui Deo grati acceptique fuissent, in multas miseras incidisse: eos autem, qui pericula & approbationes non metu & reuerentia Dei exceperant, sed mollitia animi in eum murmurassent, & à profligatore deletos esse, & interiisse morsu serpentium. Quapropter, ne ipsa & illi vlcerscerentur, aut acerbè ferrent ea, quæ ipsis accidissent: sed cogitantes, illa Dei flagra, quibus quasi serui corrigerentur, leuiora esse supplicia, quam pro sceleribus suis, non internecionis causa, sed emendationis, euenisse crederet. Illi, cum finem dicendi fecisset, veram esse eius orationem

dixerant ita, vt non haberent, quod possent improbare. Itaque rogabant, vt ipsa, quæ mulier sancta esset, Deumque timeret ac coleret, pro se Deum precaretur. Ipsa tum eos hortata est, vt quemadmodum id quod dixisset, Dei esse intelligerent, sic quod facere cogitaret, num à Deo profectum esset, experirentur: ac si Dei esse cognouissent, orarent eum, vt stabiliret consilium suum. Monuit ergo eos, vt illa ipsa nocte starent ad portam, per quam cum ancilla sua egrederetur, Deumque rogarent, vt sicuti polliciti esset, auxilium mitteret ad quintum diem: ipsi autem ne quærerent quid factura esset, dum eis ipsa nunciatum veniret, tantumque omnes Deum pro ipsa comprecarentur. Illi cum abiissent, orantes Deum, vt ei adesset, ipsa in cubiculum, quod precandi causa parauerat, ingressa, cilicio ad renes præcincto, aspersoque capiti cinere, se proiecit, strauitque in faciem, Deumque rogauit Simeonis progenitoris sui, vt qui ei præbuisset gladium, quo vlcisceretur stuprum oblatum à Sichem Dinæ sorori suæ, dedissetque mulieres Sichemitarum, earumque filias supplicij causa, capiendas & rapiendas, bonæque illorum diripienda seruis suis, qui ira incitati, & studio impulsî, ipsius honorem defendissent, sibi viduæ subueniret. Eum enim & illa excogitasse, & eis superio-

ra ac priora fecisse, & id factum esse quod voluisset: nãque vias eius paratas esse, eumque iudicia sua conclusisse providentia. Itaque Assyriorum castra illa ipsa hora aspiciere vellet, sicuti illa AEgyptiorum tum aspexisset, cum curribus suis, equitatu, ac multitudine sua freti, cursu servos ipsius illi quidem sequebatur: sed quoniam eos aspexisset, tenebris cecos se in mare submersissent, cum aquas ipse retorsisset: idem etiam Assyrius eveniret, qui multitudine hominum, gladiatorum, cõtorum, scutorum, iaculorum, lancearumque confisi gloriarentur, ignorarentque ipsum esse Deum, qui post conditum orbem bella solus frangeret. Erigeret ipse brachium suum, sicut iam inde ab initio fecisset, vique sua vim illorum exhauriret ac reprimeret: concideret ira sua vis eorum, qui se iactarent sancta eius violaturos, diruturosque aram ipsius. Faceret idem, ut Holofernes gladio suo iugularetur, capereturque per ipsam laqueo oculorum suorum, & labris siue verbis ipsius eum feriret. Daret sibi & in animo constantiam, ut eum eiusque vires contemneret, & vires ut eundem deleteret. Hoc enim ei laudi datum iri, si posterorum memoria proderetur, Holofernem deletum esse manu foeminae: praesertim cum non in multitudine eius vis & potentia cerneretur, neque in equo-

rum viribus ipsius voluntas, neque ab initio superbi ei fuissent probati, sed eorum qui abiectio essent animo, semper gratæ preces fuissent. Ipse ergo, qui Deus cælorum esset, cõditor aquarum, dominusque rerum omnium, quæ conditæ fuissent, se indignam ancillam ipsius audiret, precantem, ac multa sibi pollicentem de ipsius misericordia. Veniret ei in mentem testamenti sui, suggererétq; verba ori ipsius, & in animo confirmaret consilium, ut domus eius in sanctimonia ipsius permaneret, omnesque gentes cum esse Deum, nec alium præter ipsum esse, cognosceret. Quæ cum perorasset, quasi se à Deo auditam intelligeret, surgens accersuit ancillam suam, descendensque domum, detracto cilicio, detractisque vestibus lugubribus, corpus primum abluit, perfuditque unguento optimo, calamistratoque capillo, ac delibuto myrrha capite, induxit in pedes sandalia, in brachia brachialia & armillas, in aures inaures, in digitos annulos, omni que mundo muliebri se compsit: quinetiam Deus eam splendore quodam formaque tanta honestavit, propterea quòd non libidinis causa, sed fortitudinis hæc omnis ab illa assumpta esset compositio, ut omnium in se oculos converteret. Deinde datis ancillæ iis omnibus, quæ ex lege ad vitam necessaria erant, venit ad portam oppidi,

Vbi Oziam presbyterosque reperit, qui eius formam incredibilem mirati, illam egredi passi sunt, cum tantum precati essent, ut Deus illam gratiosam faceret, atque omne consilium, quod suscepisset, confirmaret ita, ut & ipsi laudi, & Hierosolymis gloriæ cederet. Cum ceteri qui aderant, ita evenire se velle dixissent, ipsa, subsequente pedisequa, egressa, prima luce in speculatores Assyriorum incidit, cum ex monte oppido proximo descenderet. Illi captam rogant, unde veniat, & quo proficiscatur. Ipsa Hebræam se esse respondet, seque propterea transfugisse quod intellexisset futurum, ut ciues sui in eorum venirent potestatem, qui illos cõtemnentes, se sponte sua ipsis dedere noluisent, spe alicuius humanitatis. Se hac causa ductam, id consilij cepisse, ut ad Holofernem transfiret, eique indicaret qua ratione, sine ullius suorum sanguine, eos se dedere cogeret. Speculatores audita hac eius oratione, cõtemplabantur eius formam, in eamque defixis oculis, cum stupore & admiratione maxima, primùm confirmauerunt, hoc sibi persuaderet, se non solum illo consilio sibi ac vitæ suæ consuluisse, verum etiam duci exercitus futuram gratissimam, atque ab eo inituram gratiam: deinde eam ad Holofernem in tabernaculum duxerunt, qui, ut primùm illam vidit,

eius amore captus est. Stipatores autem sui, ei dixerunt, non esse qui contemnere deberet Hebræos, qui tam formosas mulieres haberent, ne pro illis iurè ac meritò cum eis bellum gerere deberent. Ipsa proiciens se ad pedes illius, eum venerata est, quam cum iussu illius sui erexissent, primum iussit eam bono animo esse, quippe cum nemini vnquam nocuisset, qui Nabuchodonosori seruire voluisset. Quòd si ab illius popularibus contemptus non esset, nunquam se contra eos signum aut lanceam sublaturum fuisse: deinde, cur illis desertis ad se transisset, exponere. Iudith tum ita orsa est. Rogauit eum, vt verba sua benignè audiret, quæ si probaret, fore dicebat, vt Deus auxilium ferens, perfectam rem quam instituisset, daret. Testem enim esse Nabuchodonosorem regem orbis, testémque eius & vim, & potètiám, quam eò in illo integram esse vellet, vt eorum qui sceleribus se contaminarèt, animos emendaret ac corrigeret, ipsius opera illi non modò homines seruire, verùm etiam feras bestias obtèperare. Eius enim industriæ ac prudentiæ famam peruagatam esse ad omnes nationes, memoriæque posterorum proditum esse, ipsum vnum bonum ac potentem esse in toto illius imperio, eiúsque disciplinam in provinciis omnibus prædicari. Neque hoc latere, quid ei

Achior

Achior dixisset: neque ignorari, quid illi præcepisset. Constare enim Deum, quem coleret, sceleribus sic offensum & concitatum fuisse, ut per prophetas suos populo denunciauerit, fore, ut propter scelera sua affligendus aliis nationibus dederetur. Qui quoniam scelerum suorum sibi conscij essent, ipsum ab illis metui: præterea fame ac siti sic illos iam confectos esse, ut non in viuis haberentur, sed in mortuis: ob eamque causam instituisent pecora sua interficere, ut sanguine eorum sitim suam restinguerent ac sedarent. Postremò ea omnia, quæ nefas esset tractari, constituisse cõsumere. Itaque cùm hæc facerent omnia, non esse dubium, quin tradendi essent ad internecionem. Quæ cùm cognita haberet, se discessisse ab illis, missamque à Deo illi nūciatum. Se enim etiam tū, apud ipsum, Deum colere: quæ, si ei videretur, exitura esset eū precatum, qui sibi quando de illis sumpturus esset supplicium, enunciaturus esset: quod ipsa postea nunciatum veniret. Tūmq; fore, ut ille per mediam Hierosolymam, ab ipsa ductus, Hebræos omnes, quasi oues sine pastore, subigeret sub Nabuchodonosoris imperium. Hæc enim sibi prouidentia Dei enunciata esse: quæ, quoniam Deus eis infensus esset, ipsi missa esset nunciatum.

Placuit Holoferni, eiusque exercitui, hæc Iudith oratio: omnesque illius sapientiam adeò admirabantur, ut alij alijs dicerent, non esse mulierem in orbe simili forma & facultate dicendi præditam. Holofernes autem primum ei respondit, bene factum esse à Deo, qui illam præmisisset, ut populum manibus suis traderet: quoniamque illud eius promissum, bonum faustumque esset, si Deus ipsius id faceret, fore, ut & ipse eum coleret, & illa in regia Nabuchodonosoris plurimum posset, sic ut nomen eius in orbe terræ celebraretur. Deinde eam iussit, introire in locum, siue cellam, in qua thesaurum habebat reconditum, atque ibi manere. Præscripserat autem quid illi ex mensa sua quotidie apponeretur: sed cum ipsa ei significasset, nihil sibi fas esse capere eorum quæ præscripsisset, ne quid sceleris admitteret, exiis autem quæ attulisset, se capturam: atque ille quæsiuisset, cum ea quæ attulisset consumpta essent, quid ipsi præberet: eademque respondiisset, se illa omnia consumpturam non esse antè, quàm ea quæ cogitaret, perficeret: eam arbitrato suo facere passus est. Cum in tabernaculū illud interius introduceretur, Holofernes ei petenti concesserat liberum egressum triduo, noctu, & ante lucem, precatio-

nis gratia : itaque noctibus ipsis in Vallem Bethulinam exhibat , seque ibi in fonte abluebat : rediens autem , in ascensu montis Deum , ut sibi dux esset ad liberandum populum suum , rogabat . Cum redierat in tabernaculum , munda manebat , dum vesp̄ri cibum caperet . Quarto die , Holofernes cum domesticis suis cœnabat , occasionemque se nactum putans explendæ cum Iudith libidinis , Bagoæ spadoni negotium dederat , ut ei persuaderet , ut cum ipso cœnaret . Ipsa cum Holofernis volūtatem accepisset , indignam se respondit , quæ illius voluntati obssisteret . Itaque amicta ornatâque mundo muliebri , intravit in illius tabernaculum . Ille autem coniectis in eam oculis , vehementer animo permotus est : eamque læto animo accumbere , ac iucundè bibere iussit , hoc ipso , quod iniisset ab eo gratiam . Cum respondisset , se sanè bibituram , quippe quæ maiorem gloriam eod̄ die , quàm unquam in vita esset consequuta : & ipsa comedit ac bibit , quæ ancilla parauerat : & Holofernes ob eam lætus , tantum vini bibit , quantum nunquam in cœna una in vita hauserat . Vesp̄ri , Holofernes primus cubitum iuit , domesticiq̄ue eius se properè in tabernacula sua , quod onusti essent vino , receperunt , &

Bagoas, occluso cubiculi ostio, abiit. Iudith sola in cubiculo obseruabat insidiarum cædisque tempus, dato negotio pedisequæ, ut staret extra, ante cubiculum, & obseruaret. Cùmque Holofernem alto somno oppressum animaduertisset, stans ante lectum, Deum cum lachrymis solo motu labrorum precabatur, ut se corroboraret, iuuaretque in eare perficienda, quam instituisset, quod eius præsidio illam se posse facere speraret, ut, sicut promisisset, Hierosolymam urbem suam efferret. Quæ cùm dixisset, accessit ad columnam lecti, sicamque eius, quæ ad eam deligata pendeat, soluit, districtoque gladio, arrepto capillo, cùm rursus Deum, ut se corroboraret, precata esset, vno atque altero ictu ei præcidit caput. Paulò post egressa, caput ancillæ in pera condendum dedit: tumque profectæ, tanquam, pro more, precandi causa, per castra & vallem subiectam, ad portam oppidi perueniunt. Ipsa eminus vigilibus magna voce, ut intelligerent, dixerat, ut actutum aperirent: Deum enim secum esse, & cum ancilla, qui se fortem in Israele præstitisset. Vigiles cognita eius voce, presbyteros oppidi conuocarunt, omnesque ad vnum ei obuiam prodierunt cum facibus ardentibus. Ipsa cùm in aditum locum

ascendisset, indicto silentio, omnes hortatur, ut Deo laudem tribuant, qui non defuisset iis, qui in ipso spem collocarent, atque per ipsam ancillam suam perfecisset beneficium, quod Israelitis pollicitus fuisset, interfecissetque illa ipsa nocte hostem populi sui. Prolatùmque è perra caput ostendens omnibus, Holofernis ducis exercitus Assyriorum caput esse dicebat. Testem etiam Deum citabat pudicitie suæ. Omnes tum ei gratulari, eam laudare amplissimis verbis, sed maximè Ozias, qui eam mulieribus omnibus laudans anteponcbat. Suasit autem Iudith populo, ut prima luce caput Holofernis ex muro suspenderent, armatique factò impetu excurrerent foras. Sic enim fore, ut & speculatores cogerentur fugere ad ducem suum ad pugnam excitandum, & tribuni cùm eum in sanguine suo truncum inuenissent, timore perterriti se in fugam coniicerent. Ipsi ergo eos cùm fugere cognouissent, sine metu sequerentur, proptereà quòd Deus illos pedibus ipsorum obtriturus & deleturus esset. Bethulini sequuti consilium quod Iudith dedisset, suspendunt caput, armatique cum magno strepitu excurrunt. Quos cùm speculatores animaduertissent, cursu contenderunt ad tabernaculum Holofer-

nis. Ii Verò qui iam in tabernaculo erant, ante cubiculi vestibulum perstreptentes, illius excitandi causa, de industria tumultuabantur. Nemo enim pulsare fores aut intrare audebat. Duces & tribuni tandem coacti venire, cubicularius imperabant, ut introirent, eumque excitarent, nunciantes, Mures ex cauernis suis exisse, qui ipsos ausi essent ad prælium prouocare. Bagoas ingressus, non audebat propius accedere, quòd dominum cum Iudith consuetudinem habere ac dormire suspicaretur, sed ante cortinam stans, manibus strepitum edebat. Cùmque nullum motum iacentis aurium sensu acciperet, accedens propius, cortinam erexit, animaduersoque trunco corpore sine capite, exclamare cœpit cum lachrymis, & Vestem discidere. Ingressus inde in Iudith tabernaculum, cùm eam minimè offendisset, excurrrens foras, omnibus palàm & publicè dixit, Vnam Hebræam mulierem in domum Nabuchodonosoris regis dedecus intulisse: iacere enim Holofernis cadauer truncum sine capite. Hoc nuncio duces & tribuni exterriti, lacerarunt vestes suas, timorèque ac tremore consternati sunt. Ingens etiam in castris clamor excitatus est. Cùmque exercitus omnis causam tanti clamoris eadem Holo-

fernis accepisset, omnes mētis & consilij exper-
tes, se alij aliò palantes coniecerunt in fugam,
tanta cum trepidatione, vt nemo cum proximo
verbum faceret, sed demisso vultu omnes reli-
ctis sociis summa cum festinatione, ex manibus
Hebræorum, quos in se infestis animis venire
audierant, conabantur elabi. Quod cū illi co-
gnouissent, eos, clangentestubis, clamantésque,
sequuti sunt. Et quoniam Assyrii palantes di-
spersi que fugiebant, Hebræi autem vno agmi-
ne eos persequébantur: omnes, quos assequi po-
terant, debebant. Itaque Ozias, hoc cū intel-
lexisset, misit qui in oppidis regionibúsque Israe-
lis nunciarent. Quo accepto nuncio, delecti mi-
lites educti sunt ex cunctis vrbibus & regio-
nibus, qui eos persequendi & interficiendi non
antè finem fecerunt, quàm ad extremos fines
suos peruenirent. Qui autem Bethulie reman-
serant, ingressi in castra Assyriorum, prædam
& spolia, quæ illi fugientes reliquerant aspor-
tauerunt. Erat tum Hierosolymis pontifex Ioa-
chim. Is accepto huius victoriæ nuncio, cum sa-
cerdotibus Bethuliam, vidēda Iudith causa, ve-
nit. Iudith eis obuiam prodiit, quam tam ma-
gnis laudibus ornarunt, vt eam & gloriam
Hierosolymorum, & Israelis letitiam, & po-

puli sui honorem esse prædicarent. Hanc verò victoriam Dei benignitate ab ea partam esse dicebant, quòd pudicè castèque viuens, virum, præter suum, semper ignorasset. Populus porrò, ne ingratus iurè ac meritò dici posset, quicquid auri, argenti, gemmarum, vestium fuerat Holofernus, reliquàmque eius supellectilem Iudith dederunt. Ipsa illa omnia Hierosolymis Deo dedicauit, cum ei maximas & laudes tribuisset, & egisset gratias pro tam magno per se in populum collato beneficio. Dies festus tantæ victoriæ actus est ab vniuerso populo, cum ipsa, tribus mensibus continuis, institutumque est, ut quotiâs maxima cum latitia omnium celebraretur. Vixit autem Iudith castè ac pudicè ad centesimum quintum annum, sepultaque est cum viro suo: mortuam luxit populus omnis diebus septem.

Ester Abihàil filix vita.

ESTER Abihàil patre, tribus Beniaminæ, nata est. Ea cum Mardocheo patruo, qui illam, patre ac matre mortuis, adoptauerat, Babylonem à Nabuchodonosore rege, cum Iechoniam regem Iudæ ab-

duxit, captiua ducta, postea Artaxerxis regis Assyriorum vxor fuit, hoc modo. Artaxerxes tertio anno imperij sui magnificum dabat conuiuium in Vrbe Susa, regni sui capite, cunctis principibus ac ducibus Persidis ac Mediæ: eiúsque exēplo, Vasthi regina fœminas clarissimas excipiebat conuiuium. Septimo conuiuij die, Artaxerxes cū paulò hilarior esset, incaluissetque mero, septem spadonibus, qui ipsi ministrabant, præceperat, vt Vasthi, quæ forma excellebat, introducerent diademate redimitam, vt principes illi præstantem eius pulchritudinem cognoscerent, atque spectarent. Quod eius mandatum cū illa contempsisset, iratus Rex, rogauit sententiam septem Sapientum, quorum de consilio omnia agebat, quid sibi faciendum esse censerent. In iis Mamuchan iram regis iustam esse dicebat, propterea quòd, si id in Vasthi ferret, futurum esset, vt omnes Persarum Medorumque mulieres, illius exēplo, virorum suorum imperia contemnerent. Itaque censebat, ei lege sanciendum esse, vt virorum in mulieres imperium valeret, regnūque Vasthi adimendum esse, tradendūque præstantiori. Quod consilium cū regi probaretur, ac principibus qui aderant, seruique illius quærendas Virgines

in prouinciis præstanti forma dixissent, quæ cum adductæ fuissent, Rex ex eis formosissimam deligeret, Artaxerxes rem maturari iussit. Itaque aliæ ex aliis prouinciis, ex mandato regis, præstantissima forma Virgines, quotidie adducebantur: in his Ester, quæ producta in conspectum Artaxerxis, ab illo cæteris prælata & anteposita est, ac diademate ornata septimo anno imperij sui. Mardocheus, illius (ut dixi) patruus, pro foribus regij cubiculi sedebat. Is cum spadones duos regis, qui ianitores erant, in Artaxerxem coniurasse, eumque interficere velle comperisset, hoc Ester regina indicauit, Ester autem regi: qui, habita de coniuratione questione, conuictos in crucem agi iussit, atque hoc totum in Annales referri. Quod Mardocheo causam, non salutis modò, verum etiam maximi honoris, attulit. Nam cum Aman, Amadathi filius, à rege ita elatus fuisset paulò post, ut & principes omnes ei concederent, & iussu illius eum etiam cæteri venerarentur, nec Mardocheus, seruis regis illum monitionibus, hoc facere in animum induceret: atque Aman, qui non solum hoc audisset, verum etiam obseruasset, iracundia incitatus, non modò de illius morte, verum etiam de totius gentis inter-

necone cogitare cœpisset, eoque rem iam deduxisset, ut rex, illius falsis accusationibus impulsus, literas de vniuersa Iudæorum gente, vbi-
cunque reperiretur, delenda, diripiendisque eorum bonis, ad omnes provincias scripserit, & antequam dies eius delendæ venisset, Mardochæus ei factus obuiam non assurrexisset, quæ de causa, tanto in illum furore exarsit, ut ipse qui primus esset in regia, tamen nihil se esse, aut habere, quandiu videret Mardochæum, putare, diceret amicis, quorum de consilio, exatiandi animi causa, crucem ei parari iussit: tamen nec gens deleta est, & Aman ipse in crucem, quam Mardochæo crexerat, actus est, cum antea eum iussu regis in equo illius sedentem, atque ornatu regio amictum, & coronatum, per arcam vrbis antecessisset. Quod quemadmodum gestum sit, non alienum erit fusiùs, ac sigillatim exponere. Artaxerxes quidem, certis quibusdam causis ductus, Aman ita, ut dixi, extulerat, imperaueratque seruis suis, qui in foribus palatii versabantur, ut ei genu inflecterent, illumque more Persico venerarentur. Huic edicto Regis solus Mardochæus, qui se Iudæum esse iam dixerat, parère, etiam à collegis admonitus obiurgatusque, nolebat. Con-

temptum illi hoc interpretati, rem Aman nunciant, ut scirent, num permaneret in sententia: Aman, re non solum ab aliis audita, verum etiam per se comperta, acerbè tulit, tantàque in eum ira concitatus est, ut se iniuriam eiusmodi non ulturum existimaret, si illum solum affligeret ac malè perderet. Itaque Iudæos omnes ad vnum sibi delendos existimat. Adit ergo regem: ei narrat, dispersam esse per totum imperium suum gentem Iudæorum, quæ novis legibus uteretur, ipsiusque decreta contemneret. Hoc autem scire eum, non esse è re sua & regni, gentem illam pati insolescere licentia. Itaque si ei videretur, decerneret eam esse delendam: quod quò faciliùs ei persuaderet, decem milia talentorum argenti gazæ regiæ pensurum se esse promisit. Rex annulo ex digito suo detractò, & in illius digitum inducò, argentum quod polliceretur, illi manere voluit, dixitque fas ei esse, quid de gente Iudæorum vellet, statuere. Accitis scribis, res ad sortem relata est, quo in mense ac die Iudæorum interitus constitueretur. Erat tum decimus tertius Ianuarij dies, & iam duodecim annos rex obtinuerat regnum, sortèque incidit Decembris tertius decimus dies. Hoc quamprimùm Rex

per literas, quas annulo suo obsignauerat, imperauit præfectis, ac iudicibus omnium prouinciarum, ac primùm Susis tam crudele editum propositum & affixum est, conuiuium Rege & Aman vnà celebrātibus. Prior Mardocheus, cū rem accepisset, discissa veste, cilicium sumpsit, cineremque capiti aspersit, significandi doloris gratia. Ester regina posterior, à virginibus, quas ei rex attribuerat, intellexit: quæ, qualis esset, per nuncios ex ipso Mardocheo, cui ita amictō in palatium intrare non licebat, exquirat. Re, rei que causa exposita, ei suadet, vt Regem pro popularibus suis precetur. Eam enim, Dei prouidentia, ad regnum peruenisse, vt hoc faceret. Ipsa morem Persarum, ne quis, nisi antè virga porrecta accitus, ad regem adire audeat, opponit primùm: deinde eum monet, vt Susis Iudæos, qui tum essent, conuocet, horteturque, vt pro se Deum rogent, triduūque abstineant cibo & potu, quod etiam cum ancillis suis factura esset: ac tum denique ad Regem, etiam inuocata, certo mortis periculo proposito aditura. Mardocheus diligenter & officiosè mandatum eius curauit. Ipsa tertio die ornatu regio amicta, stabat in interiore vestibulo regie, quam Rex, eo ornatu

conspicatus, extenso bacillo aureo (ei enim valde placuerat) acciuit. Ingressa cum esset, eam rex rogauit, quidnam à se peteret: se enim illi dimidiam etiam regni partem, si peteret, daturum esse. Rogat eum, ut ipse & Aman postridie veniant ad conuiuium, quod eo die apparasset. Hoc facile à rege impetrauit. In conuiuium illo rursus ab ea idem quasiuerat, cum ipsa iterum inuitat utrunque in posterum diem ad conuiuium, in quo illi mentem suam aperiret. Eò die à conuiuium Aman latus & alacer redibat domum: pro foribus palatij Mardocheo sedenti factus est obuiam, qui non modò ei non assurrexit, sed ne motus quidem est ex loco, in quo sedebat. Ille dissimulata ira, cum peruenisset domum, Zaræ uxori, amicisque omnibus narrat, & enumerat omnes opes suas, multitudinem liberorum, gloriam qua à Rege præ cæteris principibus elatus fuerat, nouum denique honorem, quo à Regina affectus esset, cum ipsum secundum adhibuerat conuiuium: sed dicebat quandiu Mardocheum videret, illa omnia se pro nihilo ducere. Illi auctores sunt, ut ei crucem paret, in quam agatur postridie, iussu regis, ipsius rogatu. Curat de eorum consilio & sententia parandam crucem quinquaginta cu-

bitorum magnitudine. Noctem illam Rex insomnem duxit, prolatisque Annalibus, lenandi animi causa, cum legerentur, ventumque esset ad eum locum, qui patefactæ à Mardocheo coniurationis spadonum in ipsum, quam paulò antè commemoravi, mentionem faciebat: quærere cœpit, quid pro hac fide honoris ac mercedis Mardocheus consequutus esset. Cum servi nihil mercedis eum accepisse respondissent, atque ille rursus quæsisset, quisnam staret, in vestibulo, & illi Aman stare respondissent (is enim iam in interiore vestibulo erat, ut rogaret regem, ut Mardocheum suffigi cruci, quam ei erexerat, iuberet) eum accersiri iubet. Cum ingressus esset, eum rogauerat, quid faciendum censeret ei, quem ipse honestare vellet: cum ille, qui regem hoc de se dicere putaret, respondit, eum quem honorare & honestare vellet, induendum esse ornatu regio, & imponendum in equum regis, atque diademate regio ornandum eius caput, tumque ei, qui primum locum obtineat in principibus regis, tenendum & ducendum illius equum, ac per aream Urbis ita prædicandum, Sic honestabitur, quemcunque Rex voluerit honestare. Tum Rex, contrà atque ille sperabat, ei imperavit, ut

omnia quæ enumerasset, Mardocheo, qui pro foribus palatij sederet, faceret: nec, si saperet, quicquam eorum pratermitteret. Ita inuitus & coactus voluntate sua, Mardocheum, quem præ se contemnebat, ornatu regio sedentem in equo, iisdem verbis in vrbe prædicaui. Ille, qui hac re contemptum se duceret, operto capite tristis domum rediit, vxorique & amicis omnibus rem ordine narrauit. Sapientes, siue magi, quos in consilium adhibebat, ei prædixerunt, id quod post paulo illi euênit, si Iudæus esset Mardocheus, quem ita veneratus esset, fore vt illi non posset in posterum obsistere, sed eo spectante corrueret ac concideret. Nondum enim Magi finem dicendi fecerant, cùm spadones Regis eum, vt iret ad conuiuium, quod in illum diem Ester vtrique, vt dixi, apparauerat, monuerunt. In conuiuium cùm Rex vino, vt fit, incaluisset, Reginam monuerat, vt quod vellet peteret: cùm ipsa eum rogauit, vt si quid gratia apud ipsum valeret, sibi & suam & popularium suorum vitam donaret. Se enim atque illos addictos, deditosque esse neci & interneccioni. Qui si pro seruis, id quod optabat, venditi essent, malum illud, quod tolerabile esset, se a quo animo ac silentio laturam fuisse.

Quoniam

Quoniam autem in eum, qui Rex esset, totum illud redundaret, se acerbè ferre hostis odium. Cum rex quísnam is esset, rogasset, respondissetque eadem, Aman scelestissimum, quem cer-neret, esse: Aman repentè obstupuit, nec regis ac reginæ conspectum ferre poterat. Rex iratus surgens, in subiectū hortum arboribus consitum ingressus est. Interim Aman ad reginam quæ in lectulo, leuandi doloris causa, iacebat, veniens, rogabat eam, Vt saluti suæ consultum vellet. Rogantem rex reuersus cum offendisset, dicebat eum etiam reginam, se præsentem, domi suæ comprimere velle: nec dum verba omnia ex illius ore exierant, cum ministri faciem Aman operuerunt & obuoluerunt, Vnúsque spadonum Harbona nomine, dixit esse ibi in proximo crucē, quam ille Mardocheo parauisset. Rex statim præcepit, Vt in illam ageretur. Ita Aman iurè ac meritò accidit malum, quod iniquè & immeritò Mardocheo parauerat: contráq; ac sperauerat, mutata sunt omnia. Non enim solùm ille cruci suffixus est, quam Mardocheo, Vt dixi, præparauerat: verùm etiã locum dignitatis, atque honoris, quem in regia secundum regem primum tenuerat, eo mortuo, beneficio Regis Mardocheus adeptus est cum

annulo, cum illum regina patrum esse didicisset. Ester autem, accepta dono à rege Aman domo, ei præfecit patrum suum. Eadem, quæ interfecto hoste, id est, authore tam iniqui & crudelis edicti, facile id abrogari posse intelligeret, à rege impetrauit, ut literas scriberet, annulo suo obsignatas, omnium provinciarum imperij sui præfectis ac iudicibus, quibus superiores de nece Iudeorum scriptæ fuerant, ut scirent ac sibi persuaderent, illas fraude & scelere Aman, qui impulsus iniusto suo in Iudeos odio fuisset, esse scriptas. Itaque ne ex iis Iudeos interficerent, sed suis legibus vivere paterentur: multaque alia in eis scripta erant, quæ ad Mardochai, Reginaque & Iudeorum laudem pertinebant. Cum posteriores hæ literæ, mense tertio eiusdem anni datæ, superiores correxissent, atque adeò abrogassent: Iudei cœperunt, ut superiores, ulcisci iniurias suas. Iamque Susis quingenti ex hostibus interfecti erant, cum rex hoc reginae nuncians, quæsiuit ab ea, quid præterea peteret. Ipsa postulavit, ut quemadmodum illo die Susis factum esset, sic etiam postero fieret, decemque liberi Aman cruci suffigerentur. Is dies tertiusdecimus erat duodecimi mensis, quo die constituta fuerat

mors Iudæorū. Cū à rege hoc concessū fuisset post-
 tridie liberi decem Aman in crucē acti sunt
 Susi, & à Iudæis trecenti alij, in aliisque pro-
 uincijs iisdem diebus quinquaginta milia inter-
 fecta sunt. Hæc autē omnia visa sunt per quie-
 tem Mardochæo, anno secundo regnante Artaxerxe,
 calēd. Ianuar. cuius somnij post rei euen-
 tum memor, narrauit, paruum fontem, qui cre-
 uisset in fluuiū, & in lucem solēque versus es-
 set, Ester esse quā Artaxerxes duxisset vxorē,
 & reginam esse voluisset: duos dracones, quos
 vidisset, se esse & Aman: gētes quæ conueni-
 rant, eos esse, qui voluisset delere Iudæos: gētem
 autem suam, esse Israelē, quem Deus libera-
 set. Atq; hæc sunt, quæ de Ester scripta inueni.

Sufannæ Ioachim vxoris vita.



VSANNA Helciæ filia. Eam pa-
 rentes, cū boni essent, ita lege
 Mosæica erudierunt, vt in pri-
 mis Deum timere ac colere illam
 docuerint, ne eius voluntatem
 offendere, aut præcepta violare vnquam in
 animum induceret. Sic educatam, postquam
 apta coniugio fuit, Ioachim suæ tribus homini,
 cū diuiti, tum bonis moribus prædito, nuptum

dederunt. *Babylone* vir eius in ea captiuitate Iudeorum, quæ Nabuchodonosore rege, qui Hierosolyma cepit & diripuit, euēnit, primum locum honoris & dignitatus inter populares suos obtinebat. Itaque ad eum quotidie Iudæi confluebant, Iudicēsque duo, qui tum magistratus maximæ erat authoritatis, ibi ius dicebant iis, qui de re aliqua disceptabant. *Susanna*, quæ præstanti forma erat, cum virtute animi, corporis pulchritudinem ita coniunxerat, ut ne mortis quidem, aut ignominie, proposito certo periculo, unquam alterutram ab altera voluerit, aut potuerit diuellere: id quod ex iis, quæ sequuntur intelligi poterit. Iudices illi duo, qui iam senes erant, cum in *Susannæ* adibus, iuris dicundi (ut dixi) causa, quotidie versarentur, eamque cernerent meridie, cum iam populus discessisset, in pomarium, quod adibus adiunctum erat, exeuntem, & ambulantem, forma illius capti, Dei metu deposito, obseruabant tempus, quo explere possent cum illa libidinem suam, cum tamen principio neuter alteri hoc se velle indicasset, quod pudore prohiberentur. Nam postea mentem suam vterque alteri aperuit, cum ad prandium venissent, & inde digressi, disiunctique inter se, rediissent. Ibi enim

causa reditus exposita, id est, libidine, qua vterque ad eum diem, neutro alteri indicante, toto impetu in Sufannæ pudorem ferebantur, constituerunt tempus, quo eam solam inuenire possent. In tam fædo turpique consilio suo cum permanerent, dedita opera dicto die in pomarium, ignara & inscia Sufanna, concesserant, contemplantésque illam, ex loco insidiarum, pro more eò ingredientem, nactos se occasionem explendæ libidinis ex eo putauerunt, quòd puellis duabus præcepisset, vt sibi oleum & odores, quibus se ablueret ac perfunderet, afferrent. Nam cum per posticum occluso pomarij ostio regressæ essent, vt facerent quod domina iussisset: tum denique surgentes illi, ad eam currerunt, conabanturque illi persuadere, vt secum concumberet, primùm ab opportunitate loci, quòd soli essent, nemòque eos videret: deinde minis & metu, quòd nisi assentiretur, & concederet quod peterent, pro testimonio dicturi essent adolescentem ei stuprum obtulisse, ob eamque causam ab illa emissas puellas fuisse. Sufanna, quæ in tanto vel pudoris, quo nihil ei carius erat, amittendi, si assentiretur, vel mortis, si non assentiretur, discrimine versari se videret, hoc tantùm illis respondit, quod ab

omnibus in tali re, *Usurpandum est.* Se quidem
 Vtrinque in angustum locum compelli, pro-
 pterea quod si id quod Vellent faceret, in mor-
 tem se precipitem daret, mortem animi intelli-
 gens: sin minus faceret, ex eorum manibus non
 elaberetur: sed malle se sine opere in eorum ma-
 nus incidere, quàm peccare Deo, & illius offen-
 dere voluntatem. Itaque magna claraque voce
 clamauit, Vt ij, qui domi erant, intelligerent.
 Clamauerunt etiam senes, eorùmque alter cur-
 rens horti ostium aperuit. Famuli audito clamo-
 re subito accurrerunt, Vt quid esset cognosce-
 rent: senibusque narrantibus non id quod res
 erat, sed quod confinxerant, erubuerunt, quod
 nunquam de domina quicquam tale dici audi-
 uissent. Postero die, populus domum Ioachim
 pro more conuênit. Conuenerunt etiam senes illi
 duo, qui populum admonuerunt, Vt Susannam
 accerferent. Cum venisset, deducta à propinquis
 & liberis omnibus, operto & obuoluto vultu,
 doloris causa, eius faciem senes primùm ape-
 riri iusserunt, Vt vel aspectu illius suam satia-
 rent libidinem: deinde cum flerent illius pro-
 pinqui, & ij omnes qui eam norant, ipsa autem
 cœlum intueretur, spe sua in Deo collocata, ad-
 motis manibus eius capiti, pro testimonio dixe-

runt, cùm ambularent soli in horto arboribus
 consito, ingressam esse illam cum duabus puel-
 lis, quas cùm dimisisset, occlusissetque fores, ado-
 lescentem quendam, qui esset abditus, venisse
 & concubuisse cum ipsa: se verò, qui essent in
 angulo pomarij, cùm scelus animaduertissent,
 ad eos cucurrisse, ac illum quidem, quem nō po-
 tuissentprehendere, quòd ipsis esset robustior,
 aperto ostio effugisse: Susannam autem, cùm ca-
 ptam interrogassent, quisnam is adolescens es-
 set, noluisse dicere. Eis multitudo, quòd senes
 essent, iudicesque populi, crediderunt: Susan-
 namq; poena capitis, ex lege, cōdemnarunt. Ipsa
 exclamans voce magna, Deum precata est, ut
 ipse, qui sicut animi consilia intelligeret, ac sciret
 omnia antè quàm fierent, ita senes illos falsum
 testimonium in ipsam dixisse sciret, se respice-
 ret, quæ morte mulctaretur, cùm tamen culpæ,
 quam illi maliciosè obiecissent, non esset affinis.
 Infontem illam Deus audiuit. Cùm enim ex
 sententia illa, duceretur ad mortem, spiritum
 sanctum adolescentis, cui nomen Danieli erat,
 excitauit, qui cùm exclamasset, se non esse par-
 ticipem, nec socium sententiæ, qua Susanna
 iniuste condemnata, moreretur: coniectisque in
 eum oculis, omnes quærerent, quidnam diceret:

ipse stultos illos appellauit, qui non ex veritate æstimata eius causa, illam condemnassent. Itaque reuenterentur ad iudicium, quò rem diligentius exquirerent: falsos enim testes esse eos, quorum illam condemnassent testimonio. Omnes tum redire, senes eum rogare vt assideret, cui Deus adolescenti senilem dedisset sapientiam. Cùm assedisset, testibus inter se disiunctis ac secretis, ab altero quæsiuit, ita vt alter vocem non exaudiret, si Susannam vidisset in scelere, subter quam arborem vidisset. Cùm respondisset, subter Lentiscum, mentitum eum esse dixit periculo capitis. Dei enim angelum astare, qui, accepta à Deo sententia, illum medium discerperet. Eo dimisso, alterum iussit venire: qui rogatus, subter prinum eos se vidisse respondit, cùm Daniel illum etiam mentitum esse dixit in perniciem suam. Manere enim angelum Dei, qui gladium haberet, quo ipsum medium secaret, & vtrunque interficeret. Omnes qui aderant, cùm hac illorum tam contraria testimonia cognouissent, sublato clamore Deum laudauerunt, qui seruaret eos, qui in se spem collocassent: conuictosque senes falsi testimonij, ex lege, morte mulctarunt. Sic insons & innocens Susanna, Dei benignitate, cuius

fidem implorauerat, absoluta est, Helcia & uxore eius, Deo pro illius liberatione & absolutione, cum Ioachim ac propinquis omnibus, gratias agentibus.

MATRIS SEPTEM FRAT-
rum Machabæorum vita.

MVLIER quædam, cuius nomen literis diuinis non est traditum, Antiocho rege Demetrii filio, in Iudæa, tanta constantia fuit, vt septem filios non solum grauissimis cruciatibus, acerrimisque suppliciis interfici, quod suilla carne vesci nollent, videre sustinuerit, verum etiam patria lingua, ad perferenda illa omnia potius, quam id facerent, cohortata sit: atque ipsa, quæ toleranda liberis censuerat, postea fortianimo pertulerit. Id quod quemadmodum & quo ordine gestum sit, narrare institui, vt ea laudata beata matre, matres exemplum documentumque, quo liberis in tali re consulere ac dare consilium debeant, habere possint & clarissimum, & optimum. Antiochus quidem, qui cuperet Iudæos à patriis legibus, id est, diuinis, ad eas quibus utebatur, tra-

ducere, vetuerat, ne quis Iudeus suilla carne abstineret: multisq; cõprehensis, eos vefci cogebat grauißimis cruciatibus: in his, matrem hanc, septemq; eius liberos. Sed nulla vi, nullisque suppliciis, etiam exquisitissimis & grauißimis, perficere potuit, vt illi nefario cibo se inquinarent, prudentissima matris & præceptis quondam instituti, & tũ corroborati consilio & authoritate. Ea enim etsi illos omnes vnius diei spacio sibi eripi cernebat, tamen eorum mortem a quo animo ferebat spe immortalitatis, atq; adeò ad illam fortiter tolerãdam cum aliis verbis, tum his incitabat. Negabat quidem scire se qualis eorum ortus in vtero suo fuisset, quæ neque animum & vitam eis dedisset, neque singulorum membra finxisset. Hoc autem scire se, Deum mundi conditorem, qui hominis ortum molitus esset, omniumque instituisset originem, spiritum illis iterum, atque vitam, redditurum esse, quòd præ legibus ipsius se vitamque suam contemnerent. Hac eius oratione inflammati sex primi, & corroborati, non solum in tormenta exquisita, cum maxima & Antiochi, & omnium qui aderant, admiratione, se dederunt libentissimè, verum etiam liberè in tormentis pœnisque ipsis, regis crudelitatem reprehenderunt. Quod acerbè

ille ferens, qui se contemni hoc ipso putaret, cum septimum nec spe amicitiae, opum & honorum, nec metu suppliciorum in sententiam suam posset traducere, ad extremum matrem ad se euocauit, eiq; suaserit, ut postremi filij saluti consuleret. Ipsa, quam multis ille verbis hortatus fuerat, cum suaseram se promississet filio, cum patrio sermone rogabat primum, ut sui miseretur, quæ mater illum filium in utero nouem mensibus gestasset, quæ triennio lacte aluisset paruulum, quæ denique usque ad illam educasset ætatem: deinde ut cælum, & terram, eaque omnia quæ complexu suo continerent, contemplaretur, Deumque illa omnia & homines ex nihilo effecisse intelligeret. Sic enim fore, ut carnificem non timeret, sed dignum se fratribus suis suscepta morte præberet, atque ita illum cum eis in cælo reciperet. Quibus ille matris verbis animatus, acrius quam ceteri in tyrannum inuectus est: ob eamque causam crudelius in eum ille animaduertit. Mater autem ipsa, liberos septem, quos ita ad vitam gloriamque præmiserat sempiternam, ad extremum, supplicium, quæ prodita non sunt memoriæ, magno animo toleratis, sequuta est.

DE SIBYLLIS.

QVONIAM Sibyllæ à Perionij argumento non sunt alienæ, siue in diuinorum Vatum, siue in sanctarum mulierum Veteris testamenti nomenclaturam referantur: de his nonnulla, chartæ inanitates repleturi, narrabimus: Nam & ante Christum vixerunt, & Paganis id fuerunt, quod Iudæis sancti Prophetæ: & in eorum numero deputandæ videtur, inquit Augustinus, qui pertinent ad Ciuitatem Dei, ut & nomen satis ostendit. Sibyllæ enim deflexio Laconum est, apud quos σίος dicitur Deus: & Βύλλα, quasi βάλν, consilium. Sunt autem decem numero, ut Firmianus refert, tametsi recentiorum plerique libros omnes Sibyllinos, aut vnus, aut saltem pauciorū esse contendunt. Sed hæc ex ipsarū historiis explicatiū constabunt.

Prima nomine Sambetha Chaldaea seu Persica, ex stirpe Noë fuit, ac Alexandri Macedonis gesta, perinde atque Daniel, prædixisse fertur, vnde & eius meminit Nicanor, cum res Alexandri conscriberet. Non dubium, quin ab Hebræis, quibus cum Chaldæis & Persis assiduū fuit cōmercium, cognitione Dei, sine qua munus Propheticum cuiquam tribui non solet,

Lib. 18.
cap. 23.
de Ciuit.

Lactant.
lib. 1. ca. 6.

imbuta fuerit. Hanc nonnulli confundunt cum Erythræa, quod ad finem libri tertij Oraculorum sibyllinorū, quæ nuper Græcè reperta sunt, tradat se Nurum esse Noë, cūque eo euasisse ex diluio, & Babylone profectam vaticinari per Græciam, falsoque ex Erythra natam dici, aut etiam ex Circe & Gnosto.

2 Altera Libyssa, cuius meminit Euripides in Lamie prologo. Eius cetera ignota sunt.

3 Delphica, quæ Delphis nata est, de qua Chrysippus locutus est in eo libro, quem de Diuinatione composuit.

4 Italica, ex Italiæ finibus. Huius filius Euan-
der, vt scribit Liuius, Panis fanum, quod Lu-
percum appellatur, in Latio condidit. Cumæam
ex Italiæ ciuitate, cuius Næuius in libris belli
Punici, & Piso in Annalibus meminērāt, La-
Etantius nominat. Cum hac congressus AE-
neas traditur ab Ouidio in Metamorphosi, vbi Metamor.
Sibylla inquit sibi à Phœbo prorogatam esse vi-
tam, seque iam septem secula, id est septingen-
tos annos, vixisse, & adhuc trecentos esse dura-
turam. Ea ipsa esse videtur, quam Virgilius
Deiphoben Glauci filiam facit.


5 Præcipuam & nobilem præter ceteras Ery-
thraam fuisse commemorant Græcorum Ari-

sto Chius & Apollodorus Erythraeus, Nostorum Varro & Fenestella. Græcis Ilium petentibus prædixit & periturâ Troiam, & Homerum mendacia scripturum. Eius carmina, quæ Romam Legati, Erythras à Senatu missi, deportarunt, à consulibus Curione & Octavio, in Capitolio deposita sunt. Mira de Christo vaticinata est, de quo & Acrostichidem, quam attigit Cicero 2. de Diuinatione, ubi disputatio est de Rege appellando, ita composuit, ut primæ versuum literæ has voces redderēt, ἰησοῦς χριστός, θεοῦ υἱός, σωτὴρ, σωγός. Iesus Christus, Dei filius, Saluator, Crux. Aristoteles libro de Mirabilibus narration. eandē cum Cumana esse existimat. Cumis, inquit, in Italia, ostenditur quoddam cœclaue subterraneum Sibyllæ vatis, quam diutissimè vixisse, & virginem permansisse perhibent: quæ esset Erythraea quidem, sed à quibusdam incolis Italiæ Cumæa, ab nonnullis Melanchræna vocaretur.

6 Samia nomine Phyto, de qua Eratostenes in antiquis Annalibus Samiorum reperisse se scriptum prodidit.

7 Cumana, quam nonnulli Cumæam etiam vocant, Amaltheæ nomen habuit, eadēque Demophila, vel Herophila, à quibusdam Para-

xandra nominatur. Ea est quæ Tarquinio Pri-
 sco Regi (Gellius Superbum fuisse ait) nouem
 libros obtulit, quorum tres in sacrarium conditi, Gellius
lib. 1.
cap. 19.
 Sibyllini appellati sunt. Ad eos, quasi ad oracu-
 lum, quindecim viri adibāt, cū dij immortales
 publicè consulendi essent. Omnium autē Sibyl-
 larum libri ita in Capitolium reconditi sunt, ut
 Cumeæ prorsus abditis sint, nec in vulgus prolati,
 quoniā quæ in Italia euentura essent apertè pro-
 nunciarent, alij fuerint omnibus cogniti, quod
 Romani imperij statū & fata minus tangerēt.
 Extat in Bucolicis Virgilij Ecloga sumpta ex Ecl. 4.
 huius Vaticinationibus, quæ ita placuit Euseb.
 Casariensi, ut extremo lib. de Vita Constantini
 eius interpretationē suscepit. Ac certè in ea illa
 dicuntur, quæ non nisi de Christo accipi possunt.
 8 Helleſpontia in agro Troiano nata est, vico
 Marmisso, aut Marpeſſo, (nam variāt codices)
 apud oppidū Gergithium, quā scripsit Heracli-
 des Ponticus fuisse Solonis & Cyri temporibus.
 9 Phrygia vaticinata est Ancyra.
 10 Tyburtina nomine Albunea, Tyburi co-
 lebatur ut dea, iuxta ripas Anienis, cuius in
 gurgite simulachrum eius inuentum esse dici-
 tur, manu librum gestans. Eius sacra Senatus
 in Capitolium tranſtulit. F I N I S.







1-6-

